


O LE EKALEΣIA A IESU KERISO O LE AU PAIA O ASO E GATA AI • JANUARI 2015

OLE LIAHONA



**Ezra ma
Flora Benson:
Lotogatasi i
le Galuega a
le Alii, i. 32**

**Aoao e Aoao Atu e pei ona
Aoao Mai le Faaola, i. 24**

**O le Tagata Aupito Sili Ona Taua
i Lou Olaga, i. 56**

Lima laiti, Eseesega Tele, i. 64



*"O le mea lelei le
masima: ae afai e
magalo le masima,
pe se a se mea e
faamai a'i?"*

Luka 23:34

Tauagavale: Tafa o Ata i le
taumalulu i le Matafaga o
Ein Gedi o le Sami Mate ma
masima i le pito mai i luma.



O SAVALI

4 Savali a le Au Peresitene Sili Mulimuli i Perefeta

Saunia e Peresitene Thomas S. Monson

7 Savali a Faiaoga Asiasi O Uiga o lesu Keriso: Atalii Usiusitai

TUSIGA FAAALIA

18 O A Mea O Le A E Filifilia?

Saunia e Elder Russell M. Nelson
I se taimi o lou olaga pe a tele le mau filifiliga, ia mautinoa o loo e faia filifiliga sa'o.

I LE FAAVAA

Ata mai le faaaloaloga a le Faletusi o Talafaasolopito o le Ekalesia. I totonusi o le faavaa pito i luma: ata na Pueina e Gilad Mass.

24 O A Ituaiga Faiaoga e tatau Ona Avea Ai i Tatou?

Saunia e le Au Peresitene Aoao o le Aoga Sa
E mafai e le Faaola ona aoao tatou i le mea sili, i le ala e aoao atu ai Lana talalelei.

28 Fautuaga Faaperofeta ma Faamanuiaga o le Malumalu

Saunia e Elder Koichi Aoyagi
Pe a tatou mulimuli i le perofeta ma avea le tapuai i le malumalu o se mea e faamuamua, o le a tafe mai faamanuiaga i o tatou olaga.

32 O Ma'ua ma Flora: O se Paaga Tutusa i le Galuega a le Alii

Saunia e Aaron L. West
Aoao pe na faapefea ona fesoasoani le faaipoiopoga alofa, lagolagosua na olioli faatasi ai Ezra Taft Benson ma lona faletua o Flora, i le Peresitene lona 13 o le Ekalesia.

MATAGALUEGA

8 Tusigāmanatu o le Konafesi Oketopa 2014

10 Tatou te Talanoa ia Keriso: Se Itula e Mataala faatasi ai ma la

Saunia e Maritza Gonzales Espejo

12 O Tatou Aiga, O Tatou Auaiga: O Le Auala i se Aiga Faavavau

Saunia e Garth ma Sandy Hamblin

14 Ataata: Lagomumū

Saunia e David Wright

15 Auaunaga i le Ekalesia: O se Pateta mo le Faiaoga


Saunia e Bonny Dahlsrud

16 Tala Fou o le Ekalesia

38 O Leo o le Au Paia o Aso e Gata Ai

80 Seia Tatou Toe Feiloai: E Mafai Faapefea ona Ou Iloa Ua Faamagaloina A'u e le Alii?

Saunia e Peresitene Harold B. Lee



42

- 42 Fefautuaai Faatasi E le Aunoa: Fonotaga Faaleaiga mo Ulugalii**
Saunia e Nichole Eck
Auala e amata ai le faia o fonotaga faaleaiga anoa, ma faamanuiaina.

- 46 O Le Lototele e Faaipoipo ai**
Saunia e Christian Hägglund
Sa ou iloaina o le faaipoipoga o le laasaga lea e sosoo ai mo a'u, ae sa ou manao e faatali seia ta'u mai e le Alii ia te a'u le mea e fai.



50

48 Autu o le Mutuale 2015

Saunia e Au Peresitene Aoao o Tamaitai Talavou ma Alii Talavou
O le autu a le Mutuale i le tausaga lenei e fesoasoani tatou te malamalama ai i auala e sili ona lelei e auaua atu ai i le Tama Faalelagi.

50 Tasi le Laa i le Taimi

Saunia e Hillary Olsen
Ua faasoa mai e le autalavou i Italia auala o loo latou auaua atu ai i le Atua ma o latou loto, manatu, mafaufau, ma malosi atoa.

53 Auaua atu i le Atua ma Lou Loto, Manatu, Mafaufau, ma le Malosi Atoa

Efaapefea ona e faatinoina le autu o le Mutuale o le tausaga lenei? O ni nai manatu nei.

55 Pepa Lautele o loo I Ai se Savali: O Atu**56 Aisea e Taua ai Iesu Keriso i Lo'u Olaga?**

O mafuaaga nei e lima e avea ai le Faaola ma tagata aupito sili ona taua i lou olaga.

60 Auala e Ausia ai Sini e Faavavau

Saunia e Elder Robert D. Hales

61 O Le Auala Na Ou Iloa Ai: O Le Totonugalemu o Lo'u Olaga

Saunia e Roberto Pacheco Pretel
Keriso i le Atu Amerika? Atonu na sese faifeatalai.

62 Tuusao i le Mataupu**63 Tuuina atu o le Meaalofa Sili ona Lelei**

Saunia e Mariela Rodriguez



Vaai pe mafai ona e mauaina le Liahona o loo natia i le lomiga lenei. Faaiteite: Su'e se nofoa i luga o le pasi.



72

64 Fesoasoani Mai ia i Matou!

E pei o nei fanau, e mafai ona e faaali atu e te alofa e ala i le sueina o auala e fesoasoani atu ai i isi.

66 Lu'i o le [Faitauina] o Mau o le Feagaiga Fou

O lenei gaoioiga o le a fesoasoani e te faitauina ai ni nai fuaiupu mai le Feagaiga Fou i vaiaso taisati o lenet tausaga.

69 Faia o se Mea Lelei i Lo'u Taimi

Saunia e Clayton W.

70 O La Tatou Itulau**71 Molimau Faapitoa: E mafai faapefea ona fesoasoani tusitusiga paia ia te a'u?**

Saunia e Peresitene Boyd K. Packer

72 O Le Auupega Lilo

Saunia e Jessica Larsen

O Iiy o le tagata aupito tino laititi lea o le matou vasega ae faapefea ona ia fesoasoani ia matou manumalo?

74 Taimi o Tusitusiga Paia: O se Malaga e Aoao e uiga ia Iesu Keriso**76 O le Lisi o le 10-Pito i Luga a Abby**

Saunia e Rosemary M. Wixom

O a au sini e 10-pito i luga o lou olaga?

77 Faatusa o Tagata mai Mau o le Feagaiga Fou: Iesu o loo Aoao Atu i le Malumalu**78 Tatalo i luga o le Pasi**

Saunia e Mitzy Jiménez Ramírez

JANUARI 2015 VOL. 39 NU. 1

O LE LIAHONA 12561 890

O Le Lomiga Faamaonia Faa-Samoa a le Ekalesia a lesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Apostolo e Toasefululuua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautau: Mervyn B. Arnold, Christoffel Golden, Larry R. Lawrence, James B. Martino, Joseph W. Sitati

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Lisa C. López

Au Tusitusi ma Faatonutonu: Brittany Beattie, David Dickson, David A. Edwards, Matthew D. Flitton, Lori Fuller, Garrett H. Garff, LaRene Porter Gaunt, Mindy Anne Leavitt, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBergh, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, Mandie M. Bentley, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolumiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopu. Totogi mo le Tausaga Atua \$0.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuanu, Saina, Kalautia, Siekislovakia, Tenimaka, Take, Igilisi, Esitonua, Fiti, Finelani, Farani, Sihamani, Eleni, Hanikeri, Initu, Iselani, Initonesiä, Italia, Japani, Kiripati, Korea, Latvia, Litunia, Malakasa, Maselua, Monokolia, Nouei, Polani, Potukale, Romania, Rusia, Samoa, Saina (ua faafagofineira), Silovenia, Sipaniro, Suetena, Swahili Tagaloka, Tahiti, Tai, Toga, Lukureini, Urutu, ma Viatenam. (E eseese lava gagana.)

© 2015 Puletaofia e le Intellectual Reserve, Inc. Ua taofia aia tatua uma. Lomia le i lounata Setete o Samoan.

E mafai ona kopu tala ma ata o le Liahona mo le toe faaogaina i lotu po o le aiga ae ia le faia ai ni pisinisi. E le tatau ona kopu ni tala po o ni atu po afai o faasa mai i le laina o loo ta'ua le i le ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

January 2015 Vol. 39 No. 1. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga e aofia ai tusiga ma gaoioiga e mafai ona faaaoga mo afiafi faaleaiga.
O manatu nei e lua.



Auala e Ausia ai Sini e Faavavau, itulau e 60, ma le **"Lisi o le 10-Pito i Luga a Abby,** itulau e 76: I le amataga o se tausaga fou, atonu tou te mafaufau ma lou aiga i ni sini mautinoa e te faamoemoe e ausia e le tagata lava ia, ma ausia o se aiga. Mafaufau e faitau le tusiga a Sister Rosemary M. Wixom e uiga i sini e 10-pito i luga o le olaga a se tamaitai talavou, ma fai atu i lau fanau e fai ni lisi o ni a latou lava sini. Atonu foi o le a faamanuiaina lau fanau matutua mai se talanoaga e uiga i le tusiga a Elder Robert D. Hales e uiga i sini e faavavau ma le taua o le faia o ni fuafuaga ina ia ausia na sini. Ia uunaia tagata o le aiga e tusi i lalo a latou sini ma tautau i se nofoaga e iloagofie ai i totonusi o le tou pale.

"Lu'i o le [Faitauina] o Mau o le Feagaiga Fou, itulau e 66: Mafaufau e amata le lu'i o le faitauina o le Feagaiga Fou o se aiga. E mafai ona outou amata i le fai atu i tagata taitoatas i le aiga e faasoaa atu se tala e sili ona fiafia i ai mai le soifuaga o lesu Keriso. Ona, asiasi faatasi lea o se aiga i le gospelart.lds.org po o le scripturestories.lds.org e maua ai vitio ma faatufugaga o ata e o faatasi ma le faasologa o la outou faitauga. Po o le mafaufau foi e faatino vaaiaga mai le Feagaiga Fou a o faasolo la outou faitauga.

I LAU GAGANA

O loo maua le Liahona ma isi tusi a le Ekalesia i le tele o gagana i le languages.lds.org.

AUTU I LENEI LOMIGA

E ta'u mai e numera le itulau muamua o le tusiga.

Agalelei, 89

Aiga, 12, 28, 32, 42, 46

Alofa, 15

Aoao atu, 24

Aoaoga, 18

Auauna atu, 15, 38, 41, 48, 50, 53, 55, 64

Ezra Taft Benson, 32

Faaaloalo, 72

Faaipoipoga, 28, 32, 42, 46

Faiiuga, 4, 6, 18

Faamagaloga, 80

Faamanatuga, 10

Faaosoosoga, 14

Faitalia, 18

Feagaiga Fou, 66, 68, 81, 87

Finauga, 62

Galuega faafaifeatalai, 40, 53, 55, 67

Galuega faalemalumalu, 12, 28

Iesu Keriso, 7, 10, 24, 56, 61, 74

Konafesi aoao, 8

Liua, 12

Mataupu Faavae o le Faatuatua, 69

Muai olaga, 18

Ola faavavau, 14, 60, 76

Perofeta, 28, 32

Salamo, 12, 39, 80

Sini, 60, 76

Tatalo, 95

Togiola, 10

Tusitusiga Paia, 66, 71

Usiusitai, 7



Saunia e Peresitene
Thomas S. Monson

MULIMULII Perofeta

Sa ou tautua i le neivi a le Iunaite Setete i le tau faa-iuiuga o le Taua Lona II a le Lalolagi. Sa avea a'u ma se seila, o se tulaga sili ona maualalo i le neivi. Ona ou ausia ai lea o tulaga o se Seila i le Vasega Muamua, ona sosoo ai lea ma lo'u ausiaina o le tulaga o le Fai Faailoga [Yeoman] i le Vasega Tolu.

Na ma'ea le Taua Lona II a le Lalolagi, ma mulimuli ane ona faamaloloina ai lea o a'u mai o'u tiute faamiliteli. Ae sa ou faia se faiiuga, afai ou te toe foi atu i le militeli, ou te fia tautua o se taitai ofisa sinia. Sa ou mafaufau, "E le toe i ai ni umukuka gasu mo a'u, le toe oloina ni fola, pe afai e mafai ona ou aloese ai."

Ina ua uma ona faamaloloina a'u, sa ou auai i le Neivi Faaleoleo a le Iunaite Setete. Sa ou alu i po uma lava o le Aso Gafua i faataitaiga. Sa ou suesue malosi ina ia ou agavaa ai faaleatamai. Sa ou su'e i ituaga uma o suega eseese e mafai ona mafaufauina: faalemafaufau, faaletino ma faaelagona. Mulimuli ane, ona oo mai lea o le tala matagofie: "Ua taliaina oe e maua le pule faatonu o se vaega amata i le Neivi Faaleoleo a le Iunaite Setete."

Sa ou faaaliina atu ma le fiafia i lo'u toalua o Frances, ma ou fai atu, "ua ou mauaina! ua ou mauaina!" Sa ia fusi ia te au ma fai mai, "Sa e matua galue malosi e ausiaina."

Ona i ai lea o se mea na tupu. Sa valaauna a'u e avea ma se fesoasoani i le au epikopo o la'u uarota. O le fonotaga a le aufono a le epikopo sa faia i le afiafi lava lea e tasi na fai ai foi la'u fonotaga o faataitaiga a le neivi. Sa ou iloa sa i ai se feteenaiga leaga tele. Sa ou iloa na leai so'u taimi e faataunu faatasi ai ou tiute o le Neivi Faaleoleo *ma* o'u tiute i le au epikopo. O le a se mea na tatau ona ou faia? Na tatau ona faia se faaiuga.

Sa ou tatalo e uiga i ai. Ona ou alu lea vaai le tamalii sa avea ma o'u peresitene o le siteki a o ou laitiiti, o Elder

Harold B. Lee (1899–1973), i le taimi lena a'o avea o ia ma se tasi o le Korama a Aposetolo e Toasefululua. Sa ou nofo faasaga atu ia te ia mai i le isi itu o le laulau. Sa ou ta'u atu ia te ia lo'u matuai faatauaina o lena tofiga o le pule faatonu i le militeli. O le mea moni, sa ou faaali atu ia te ia le kopi o le tusi o le tofiga na ou mauaina.

Ina ua mavae sina taimi na mafaufau loloto ai i le mataupu, sa ia saunoa mai ia te au, "O le mea lenei e tatau ona e faia, Uso Monson. Ia e tusi atu i le Ofisa o Mataupu o le Neivi ma ta'u atu ia i latou, ona o lou valaauga o se tasi o le au epikopo, ua le mafai ai ona e taliaina lena tofiga o le pule faatonu i le Neivi Faaleoleo a le Iunaite Setete."

Sa matua'i o'u faanoanoa lava. Sa ia faaopoopo mai, "Ona e tusi atu lea i le taitai ofisa sili o le Vaega Lona Sefululua o le Neivi i San Francisco ma ta'u atu ia i latou ua e manao e faamalolo mai oe mai le au faaleoleo."

Sa ou fai atu, "Elder Lee, e te le malamalamā i le militeli. Ioe, o le a latou teena le tuuina mai ia te au lena tofiga o le pule faatonu pe a ou musu e talia, ae o le a le faamatuuina mai a'u e le Vaega Lona Sefululua o le Neivi. Faatasi ai ma le alia'e ane o le taua i Korea, e mautinoa lava o le a valaaau mai i se alii ofisa e leai sona tofiga pule faatonu. Afai e toe valaaau mai ia te a'u, e sili atu lo'u toe foi atu o se taitai pule faatonu, ae o le a ou le mafai lena mea pe afai ou te le taliaina lenei tofiga pule faatonu. E te mautinoa o le faatuaga lenei ua e manao ou te mauaina?"

Sa tuu mai e Elder Lee lona lima i luga o lo'u tauau ma ia saunoa mai i se auala faatamā, "Uso Monson, ia faateleina lou faatuatua. O le militeli e lē mo oe."

Sa ou alu i le fale. Sa ou toe tuuina le tusi o le tofiga pule faatonu ua pisia i loimata i totonu o lona teutusi faatasi ma le tusi na aumai ai ma teena ai le taliaina. Ona ou tusia lea o se tusi i le Vaega Lona Sefululua o le Neivi ma talosagaina



Semanu ou te le maua le tofiga a le Ekalesia ua ou umia i le taimi nei pe ana ou le mulimuli i le fautuaga a Elder Harold B. Lee.

le faamalolo mai o a'u mai le Neivi Faaleoleo.

O le faamalolo mai o a'u mai le Neivi Faaleoleo sa i ai i le vaega mulimuli na faagaoioia a o lei oo i le amataga o le Taua a Korea. Na faapea ona valaauna i ai la'u vaega o le militeli. E ono vaiaso talu ona valaauna au e avea ma se fesoasoani i le au epikopo, ae valaauna a'u e avea ma epikopo i la'u uarota.

Semanu ou te le maua le tofiga a le Ekalesia ua ou umia i le taimi nei pe ana ou le mulimuli i le fautuaga a se perofeta, pe ana ou le tatalo e uiga i lena faaiuga, pe ana ou le maua se agaga faafetai e uiga i se upumoni taua: o le poto o le Atua e tele lava ina foliga mai o se mea faavalevalea i tagata.¹ Ae o le lesona silisili e tasi e mafai ona tatou aoaoina i le olaga nei e faapea, a fetalai mai le Atua ma usiusitai i ai Lana fanau, o le sa'o i latou i taimi uma lava.

Ua ta'ua e faapea o le talafaasolopito e faalagolago lea i faaiuga laiti, ma e faapena foi i o tatou olaga. O faaiuga e iloa ai faasinomaga. Ae e le o tuua i tatou e aunoa ma se fesoasoani i a tatou faaiuga.

Afai e te fia vaai i le malamalamo o le lagi, afai e te fia lagona musumusuga

a le Atua Silisili Ese, afai e te fia maua lena lagona i totonus o lou loto e faapea, o loo taijalaina oe e lou Tama Faalelagi, ona mulimuli lea i perofeta a le Atua. A e mulimuli i perofeta, o le a e i ai i teritori saogalemu. ■

FAAMATALAGA

1. Tagai i le 1 Korinito 2:14.

AOAO ATU MAI LENEI SAVALI

E le toatele tagata o le Ekalesia o le a maua ni fautuaga mo na'o ia lava mai i se Apostolo, e pei ona maua e Peresitene Monson. Ae e mafai lava ona faamanuiaina i tatou pe a tatou mulimuli i aoaoga a perofeta ma apostolo. Mafaufau e faitau le saunoaga a Peresitene Monson mai le konafesi aoao na mavae atu (manatua foi ana saunoaga amata ma faaiu). Vaavaai mo ni faatonuga patino po o ni valaaau e faatino. E mafai ona outou talanoaina mea ua e aoaoina ma i latou o loo e asia ma mafaufau i ni auala e faaaoga ai le fautuaga a Peresitene Monson.

Mo ni manatu i le auala e aoao atu ai lenei savali i le autalavou ma tamaiti, tagai i le itulau e 6.

Fautuaga mo Filifiliga Faigata

Sa ta'ua e Peresitene Henry B. Eyring, Fesoasoani Muamua i le Au Peresitene Sili, e uiga i se taimi na ia mulimuli ai i fautuaga faaperofeta. A'o faagasolo se tasi o konafesi aoao, sa uunaia ai e Peresitene Ezra Taft Benson (1899–1994) tagata o le au paia ia o ese mai le aitalafu—ae maise lava o aitalafu e faamonia i fale [mokesi].

Sa saunoa Peresitene Eyring: "Sa ou faliu atu i lo'u toalua ina ua maea le sauniga ma fesili atu, 'E te manatu e i ai se auala e mafai ona ta faia ai lena

mea?' I le taimi muamua sa ma lē iloa se auala." Ae i lena afiafi sa ia mafau-fau ai i se la fanua na tausagā e le'i faamanuiaina lava a la'ua taumafaiga e faatau ese atu. "Sa ma faalagolago i le Atua ma le . . . savali a Lana auauna, [o lea] na ma faia ai se telefoni. . . . Sa ou faalogoina se tali lea e oo mai i le asō o faamalosia ai pea lo'u faatuatua i le Atua ma Ana auauna." O le aso lava lena na tuu ai e se tamalii sana ofo i le fanua a le au Eyrings mo se aofaiga sa na o sina mea lava na tele ai nai lo le

la mokesi. Sa le'i umi ae saoloto le au Eyrings mai aitalafu (tagai i le "Faala-golago i le Atua, Ona Alu Lea ma Faia, Liahona, Nov. 2010, 72–73).

Atonu e le o i ai sau mokesi e totogi, ae o le fautuaga faaperofeta e mafai ona tatalaina ai oe iinei ma le taimi nei i ni faaiuga faigata e faatatau i le galuega, aoga, o se misiona, ma tafaoga faamasani. la talanoaina ma lou aiga po o lau tupulaga, e uiga i auala e mafai ona e mulimuli ai i le perofeta pe afai tou te faia ni faaiuga.

TAMAITI

Su'e Lou Auala

Eao ona tatou faia ni filifiliga se tele ia toe foi atu ai i lo tatou Tama Faalelagi. E mafai ona tatou faia filifiliga e sili ona lelei pe a tatou mulimuli i le perofeta.

Saili ia maua lou ala i le auala lavelave. A e oo mai i se faaiuga, vaai atu i le fautuaga a le perofeta!


 **Faitau tusitusiga paia**
Alu i le taumatau

 **Tatalo**
Alu i lalo ona taumatau ai lea

 **Faasoa atu lau molimau**
Alu i le taumatau

 **Fesoasoani i isi**
Alu i lalo ona agavale ai lea

 **Alu i le lotu**
Alu i luga



Ia suesue ma le agaga tatalo lenei savali ma saili ia iloa mea e faasoaa atu. O le a mafai faapefesa e le malamalama i le sofiuaga ma le matafaioi a le Faaola ona faateleina lou faatuatua ia te Ia ma faamanuiaina ai i latou o loo e tausia e ala i le faiaoga asiasi? Mo nisi faamatalaga, alu i le reliefsoociety.lds.org.

O Uiga o Iesu Keriso: Atalii Usiusitai

O se vaega lenei o le faasologa o Savali a Faiaoga Asiasi e faaalia ai uiga o le Faaola.

O le mulimuli i faataitaiga a Iesu Keriso o le usiusitai, e faateleina ai lo tatou faatuatua ia te Ia. “Pe o se mea la e ofo ai,” o le saunoaga lea a Elder Jeffrey R. Holland o le Korama a Apostolo e Toasefululu, “le filifilia muamua ma taulamua e Keriso e faamatalaina o ia lava e faatatau i lona tamā—e alofa ia te ia ma usitai ia te ia ma gauai atu ia te ia e pei o le atalii faamaoni sa i ai o ia? . . . O le usiusitai o le tulafono muamua lea o le lagi.”¹

Ua aoao mai tusitusiga paia “a tatou maua se faamanuiaga mai le Atua, e maua i le usiusitai i lena tulafono ua faavae ai i luga” (MF&F 130:21). E tuputupu ae lo tatou faaleagaga a’o tatou faalatalata atu i le Atua e ala i le usiusitai, ma valaaulia le mana o le Togiola a le Faaola i o tatou olaga.

Na saunoa mai Elder D. Todd Christofferson o le Korama a Apostolo e Toasefululu, “A tatou savavali i le usiusitai i mataupu faavae ma poloaiga o le talalelei a Iesu Keriso, tatou te olioli i se soloaiga faifai pea



o faamanuiaga na folafolaina mai e le Atua i Lana feagaiga ma i tatou. O na faamanuiaga e maua ai punaoa tatou te manaomia e galulue ai nai lo le tau faagaoioia e galulue a’o tatou ola ai i le olaga. . . . O le usiusitai tatou te maua ai le pulea sili atu o o tatou olaga, o le mana sili atu e o mai ma o atu ai, e galulue ai ma fatufatua’i.”²

Mau Faaopoopo

Luka 22:41–46; Mataupu Faavae ma Feagaiga 82:10; 93:28

Mafaufau i le Mea Lenei

O a nisi o faataitaiga o le usiusitai o loo i ai i tusitusiga paia?

Faatuatua, Aiga, Toomaga



Mai Tusitusiga Paia

E mafai ona tuuina atu i se isi tagata le malosiaga faaleagaga lea e maua mai i le usiusitai e le aunoa i poloaiga? o le fesili lea a Elder David A. Bednar o le Korama a Apostolo e Toasefululu. “O le tali e manino lava . . . e leai.”³

O le faataoto i taupou e toasefulu o se faataitaiga lea o lenei mataupu faavae. E ui o taupou uma na ave a latou lamepa e “fetaiai ma le faatoafaiava,” ae sa na o le toalima sa popoto na ave suau i a latou lamepa. O le isi toalima sa vālea aua “sa leai se suau ia te i latou.”

Ona sau ai lea o le alaga i le tulua o po: “Faauta, ua sau le faatoafaiavā; inā o ia outou e faafetaiai ia te ia.” Na teuteu e taupou uma a latou lamepa, peitai sa leai ni suau a taupou vālea. Sa latou fai atu i taupou popoto, “aumai ni a outou suau ma matou; auā o le a mamate a matou lamepa.”

Na tali mai taupou popoto, “E leai; ne’i le lava ia i matou ma outou: ae o . . . ma faatau mai ni a outou.” Ma a’o ō taupou vālea, na sau le faatoafaiavā, ona o ai lea o taupou popoto faatasi ma ia, ona “pupuni ai lea o le faito-toa.” (Mataio 25:1–13).

FAAMATALAGA

- Jeffrey R. Holland, “The Will of the Father in All Things” (Brigham Young University devotional, Jan. 17, 1989), 4, speeches.byu.edu.
- D. Todd Christofferson, “O Le Mana o Feagaiga,” *Liahona*, Me 2009, 21.
- David A. Bednar, “Faaliliuina i le Alii,” *Liahona*, Nov. 2012, 109.

TUSIGĀMANATU O LE KONAFESI O OKETOPA 2014

“O le mea ua fai atu ai A’u o le Alii, ua ‘Ou fai atu ai; . . . pe i lo’u lava leo po o i le leo o a’u auauna, ua tutusa lava” (MF&F 1:38).

A o e suesueina le konafesi aoao ia Oketopa 2014, e mafai ona e faaaogaina nei itulau (ma Tusigāmanatu o le Konafesi i lomiga i le lumana) e fesoasoani ai ia te oe e suesue ma faaaoga aoaoga talu ai nei a perofeta soifua ma aposetolo ma isi taitai o le Ekalesia.

MATAUPU FAAVAE UA FAAMAMAFAINA



O Loo Taitaiina i Tatou e Perofeta Soifua

I le tausaga ua tea, ina ua ausia e Peresitene Monson le matati'a o le lima tausaga o le auaunaga o se Peresitene o le Ekalesia, sa ia toe manatunatu ai i lona 50 tausaga o le auaunaga faaapostolo ma faia ai le saunoaga lenei: . . . ‘Ou te faamautinoa atu ia te outou o le Ekalesia o loo saogalemu lona taitaiga. O le faatulagaga ua faatulagaina mo le Aufono a le Au Peresitene Sili ma le Korama a Apostolo e Toasefululu ua faamautinoa ai [ia i tatou] o le a i ai peia i taimi uma le saogalemu o lona taitaiga ma po o le a lava se mea e ono oo mai, e leai ma se mea e ono popole ai pe fefe ai. O lo tatou Faaola, o Iesu

Keriso, le o loo tatou mulimuli i ai, le o loo tatou tapuai i ai, ma le o loo tatou auauna i ai, o loo i ai pea i le taitaiga [o le Ekalesia].¹


“Peresitene Monson, matou te faafetai atu mo na upumoni! Ma e matou te faafetai atu mo lou soifuaga atoa o faataitaiga ma auaunaga tuuto. . . . Matou te lagolagoina oe, e le na o le siilima ae ma o matou loto atoa ma taumafaiga faapaiaina.”

Elder Russell M. Nelson, “Lagolagoina o Perofeta,” *O Le Liahona*, Nov. 2014, 76.

FAAMATALAGA

1. “Savali mai ia Peresitene Thomas S. Monson,” *Church News*, Feb. 3, 2013, 9.

FOLAFOLAGA FAAPEROFETA



Ala o Keriso

“A o tatou taumafai e tuu Keriso i le totonugalemu o o tatou olaga e ala i le aoaoina o Ana afioga, e ala i le mulimuli i Ana aoaoga, ma e ala i le savavali i Ona ala, ua la folafola mai e faasoa mai ia i tatou le ola e faavavau lea na la maliu ai ia maua. “E leai se isi taunuuga e maualuga atu i lo lenei, ia tatau ona tatou filifili e talia Lana aoaiga ma avea ma Ona soo ma faia Lana galuega i o tatou olaga atoa. E leai se isi lava mea, leai se isi lava filifili tatou te faia, e mafai ai ona avea i tatou ma tagata e sili atu i lo le tagata e mafai ona la faia e avea ai i tatou.”

Peresitene Thomas S. Monson, “Ia Mafaufau i le Ala o Ou Vae,” *O Le Liahona*, Nov. 2014, 88.



UA FAAMANU- IAINA TAGATA UMA E ALA I LE ANAPOGI

"Ou te molimau atu i wavega, faaleagaga ma faaletino, lea e oo mai ia i latou o e ola i le tulafono o le anapogi. . . . la faataua lena avanoa paia tai masina, ma ia limafoai i lau

taulaga anapogi ma isi foai agaalofa, faaleaoaoga, ma faifeautalai pe a talafeagai ai ma tulaga. Ou te folafola atu o le a agalelei le Atua ia te outou, ma i latou o e maua le toomaga ona o outou ma o le a faamuia i lou igoa e faavavau."

Elder Jeffrey R. Holland, "Pe Le o i Tatou Uma Ea o Ni Tagata Aisi?" *O Le Liahona*, Nov. 2014, 42.



O TALI MO OE

E tuuina mai i konafesi taitasi, pero-feta ma taitai ni tali musuia i fesili atonu o i ai a tagata o le Ekalesia. Faaaoga lau lomiga o Novema 2014 pe asiisi i le conference.lds.org e sue ai tali i fesili nei:

- E faapefea ona tasi le Tama Faalelagi ma lesu Keriso? Tagai Robert D. Hales, "O Le Ola e Faavavau — ia Iloa lo Tatou Tama Faalelagi ma Lona Alo, o lesu Keriso," 80.
- O le a le molimau ma e faapefea ona ou maua se molimau? Tagai Craig C. Christensen, "Ua Ou Iloa Nei Mea Mo Au Lava Ia," 50.
- O le a se mea ou te faia a o sailia ni tali i au fesili? Tagai M. Russell Ballard, "Nofo i Totonu o le Vaa ma Pipiimau!" 89.

TUSIAINA O MEA E TUTUSA

MALUMALU

E laugaina i nisi taimi e le silia ma le toatasi se failauga le autu lava e tasi o le talalelei. O le mea lea sa saunoa i ai ni failauga se toatolu e uiga i malumalu:

- "E mafai ona tatou maua musumusuga ma faaaliga i totonu o le malumalu — faapea ai foi ma le mana e taulimaina ai faigata o le olaga." — Sister Linda K. Burton, "Saunia i se Ala Sa Le'i Iloa Lava," 111, 112.
- "E ala i le agaga faafaleleina o le malumalu, e mafai ai ona tatou aoaoina le mea moni, le mana, ma le faamoemoe o le Togiola a le Faaola i o tatou olaga patino." — Sister Neill F. Marriott, "Faasoaina Atu o Lou Malamalama," 118.
- "Afai e ao ona matou maua ia faamanuiaga uma ua tuuina mai ma le agaalofa e le Atua, e tatau ona taitai atu lo matou auala faalelalolagi i le malumalu. O malumalu o se faailoaga lea o le alofa o le Atua." — Sister Jean A. Stevens, "Afafine o le Feagaiga a le Atua," 117.



Ina ia faitau, matamata, pe faalogologo foi i lauga o le konafesi aoao, asiisi ane i le conference.lds.org.

SE ITULA E MATAALA FAATASI AI MA IA

Saunia e Maritza Gonzales Espejo

se tasi aso na ou sauni ai e tuuina atu se tautalaga i le sauniga faamanatuga. Sa ou suesue i le tusiga “O Le Togiola a Iesu Keriso” na saunia e Elder Jeffrey R. Holland o le Korama a Aposetolo e Toasefululua i le *Liahona* o Mati 2008. I lana tusiga, na faamataala ai e Elder Holland se miti a Elder Orson F. Whitney (1855–1931) lea na ia vaai ai i le Faaola i le Faatoaga o Ketesemane. Na faamatalaina e Elder Whitney ia tiga ma puapuaga na ia vaaia o onosa’ia e le Faaola. Ona ia tusia lea:

“E le’i umi ae tulai o Ia ma savali atu i le mea na tootutuli ai [le] au Aposetolo—ua momoegapepe! Sa Ia fagufagu lemu i latou, ma faafeala, ma i se leo o le aoaiga agavaivai, ma le le faaalia o se ita po o le otegia, na fesili atu ai ia i latou pe le mafai ea ona latou mataala faatasi ma Ia i se itula e tasi. . . .

“O le foi atu i Lona nofoaga, na toe tatalo ai o Ia ma toe alu atu foi ma maua atu ua toe momoe foi i latou. Sa Ia toe fafaguina i latou, apoapoa’i atu ia i latou ma toe foi atu ma tatalo e pei ona sa faia muamua. Na faatolu ona tupu lenei mea.”¹

A o ou faitauina lenei mea, na oo mai le agaga o faaaliga i lo’u mafaufau. I lena lava taimi, sa ou iloaina

ai o le ala e mafai ona ou “mataala faatasi ai ma Ia i le itula e tasi” sa i ai i le ala ou te taulimaina ai le sauniga faamanatuga i Aso Sa taitasi. Talu mai lena taimi, ua ou aoaoina ai o se itula lenei e mafai ona tatou tatalo atu ai i lo tatou Tama Faalelagi i se auala e sili atu ona anoa. O le tatalo e taua i taimi uma, ae o le i ai o le Agaga i lena itula o le faamanatuga o se avanoa e siitia ai i tatou lava e latalata atili atu i le Tama Faalelagi

ma lo tatou Faaola, o Iesu Keriso. A taulai atu o tatou manatu i le Alii, i se tasi itu, o loo tatou i ai faatasi ma Ia i lena taimi o le tiga lea na Ia onosaia a’o tauaveina i Ona lava luga a tatou agasala. O se taimi e faailoa atu ai le tiga na Ia puapuagatia ai mo i tatou.

E taua tele le sauniga faamanatuga ia te au. Ia te au, o le itula lea o le faaolataga e le iu. Ua avea o se taimi paia lea ou te manatua ma tuuto ai i le tatalo ma i le agaga e faamamalu



O SE TAIMI MIGAO, MAFAUFAU LOLOTO

“[O le faamanatuga] e tatau ona avea o se taimi mamana, migao, ma le mafaufau loloto. E tatau ona faaosofia ai lagona ma musumusuga faaleagaga. Ona o lenei itu, e le tatau ai ona faatopetopea. E le o se mea e tau ina ‘faatino’ ina ia faataunu ai le faamoemoega moni o le sauniga faamanatuga. O le faamoemoega moni lea o le sauniga. Ma o mea uma o loo tautalagia pe lagiina pe talosagaina i na sauniga, e tatau ona ogatasi ma le mamalu o lenei sauniga paia.”

Elder Jeffrey R. Holland o le Korama a Aposetolo e Toasefululua, “Tou te Faia Lenei Mea ma Faamanatuga ia te Au,” *Liahona*, Ian. 1996, 79.



ai au feagaiga, ma mulimuli i le faataitaiga atoatoa o lo'u Faaola. Ou te iloa o loo soifua o Ia ma alofa ia te au. Ou te iloa ua na o Lana taulaga ma Lona toto lea na faamaligiina, e mafai ona faaolainaina ai i tatou uma. Ou te iloa e moni lenei mea aua a o ou galue i le "mataala faatasi ma Ia," ua faapea ona faamalamalamaina ai lo'u malamalama, ua faamanuiaina ai lo'u olaga, ma ua loloto atili ai la'u vaai mamao e uiga i le ola e faavavau i Lona afioaga. ■

E alala le tusitala i Ica, Peru.

FAAMATALAGA

1. Orson F. Whitney, ta'ua i le Jeffrey R. Holland, "O Le Togiola a Iesu Keriso", *Liahona*, Mat. 2008, 33.

E MAFAI FAAPEFEA E LE TAGOFIA O LE FAAMANATUGA ONA SUIA LO'U OLAGA?

I le konafesi aoao o Oketopa 2012, na aoao mai ai Elder Don R. Clarke, "Afai tatou te saunia faalelei mo le faamanatuga, e mafai ona tatou suia o tatou olaga." Ona ia fautuaina mai lea o ni "mata-upu faavae se lima e mafai ona faamanuiaina ai o tatou olaga a o tatou fetagofi atu ma le agavaa i le faamanatuga":

1. La i ai se lagona o le lotofaafetai mo le Togiola a lesu Keriso.
2. La manatua o loo tatou faafouina feagaiga o le papatisoga.
3. Saili ia lagonaina le faamagaloina o a tatou agasala.
4. Saili musumusuga mo tali i o tatou faafitauli.
5. Aai ma feinu i le faamanatuga ma le agavaa ina ia mafai ona faatumuina i tatou i le Agaga Paia.

Na folafola mai Elder Clarke: "O le a avea pea le sauniga faamanatuga ma sauniga sili pe afai o le faamanatuga o le totonugalemu lea o a tatou tapuaiga."¹

FAAMATALAGA

1. Tagai i le Don R. Clarke, "O Faamanuiaga o le Faamanatuga, *Liahona*, Nov. 2012, 104–06.

O LE AUALA I SE AIGA FAAVAVAU

Saunia e Garth ma Sandy Hamblin

O le taimi lava na liliu mai ai, sa naunau ai lava le aiga o 'Akau'ola ia oo atu i le malumalu.

I le taeao o se tasi o Aso Sa, ina ua uma se inugapia ma se inuga 'ava ma ni uo i se taimi umi o le po, sa toe foi atu Siope 'Akau'ola o Toga i le fale ae ona vaiai ai se aiga o laei ni ofu lelei o le Aso Sa. Sa talitaliē ma talanoa a o latou savavali faatasi. Sa mafaufau Siope pe o le a se mea ua mafua ai ona latou fiafia, o lea na ia mulimuli ai ia i latou e vaai po o fea na o i ai.

Na vaai atu Siope ua ulufale le aiga i se falelotu o le Ekalesia o le Au Paia o Aso e Gata Ai. Sa ia autilo atu i le faamalama a'o taunuū atu isi tagata. Sa vaiai le fiafia o susulu mai i o latou foliga a o saofafai faatasi aiga ma pepese i viiga tapuai.

Sa faasolo mafaufauga o Siope i lona toalua, o Liu. O le alofa lea na la lagonaina i le taimi muamua na la faaipoipo ai ua mou atu. Na manao Siope e toe maua mai lena alofa. Sa ia faanatinati atu i le fale ma ta'u atu i lona toalua ua ia maua le ala e fesoasoani ai ia manuia lo latou aiga: e tatau ona latou auai i le Ekalesia.

O lena lava aso na alu atu ai Siope i le maota o le epikopo i lona nuu. Sa iloa e le epikopo ia Siope, na vaai o onaonā solo i le alatele. A o la talanoa, na vaiai e Siope le masalosalo i foliga o le epikopo, ae sa mausalī lava lana faaiuga; sa ia ta'u atu ma le le fefe i le epikopo ua manao e papatiso. Sa tu le epikopo, valaaulia Siope i totonusi.


[o lona maotal], ma amata ona aoao atu ia te ia le talalelei a Iesu Keriso.

Sa musu Liu i le taimi muamua ae na vaavaai atu i le suiga malie o lana tane mo le lelei. Sa amata ona faaalu e Siope ni taimi se tele ma le la fanau ma faaali atu le alofa faateleina i lona toalua ma le aiga e ala i ana amioga. O lea na amata ai loa ona fai lesona a Liu, ma e lei umi ae papatisoina loa i la'ua.

A o lata ina atoa le tasi o le tausaga talu ona la papatiso, sa mafaufau le aiga o Akau'ola i faamanuiaga matagofie o le malumalu. Na fai mai Siope, "Afai e sili atu le maoae o faamanuiaga o le malumalu nai lo o faamanuiaga ua matou mauaina mai le papatisoina, se'i manatu la i le matagofie tele o faamanuiaga o le malumalu." E ui i lo latou mananao ina ia faamauina, ma ona sa faia ni galuega mo le toe faafouina o le malumalu i Toga, o lea o le a latou faatali ai i le sili atu ma le tausaga, pe fai foi se malaga taugata i Niu Sila po o Fiti e auai atu ai i le malumalu.

Sa mafaufau loloto le aiga ma tatalo mo se mea e tatau ona fai. Na iu ina latou filifili e fai se nonogatupe laitiiti. A o faatali mo le faamaonia [o le nonogatupe], sa faapea ona faatamaia le faletupe sa faagasolo ai le latou nonogatupe i se malaia. O le a tolopoina uma nonogatupe seia oo i le tausaga na sosoo ai.


Sa lagona e Siope ma Liu le lotovai-vai. Sa latou nonofo faatasi i lo latou



potu malolo laitiiti ma tatalo mo se vavega. A o latou tatalo ma fefautuaai faatasi, na oo mai le tali: "Sa ou vaai faalemafafau i le veni a le matou aiga o ataata mai ia i matou, ma na ou iloa ai o le tali lea i a matou tatalo," o le tala lea a Siope. Sa mafai ona latou faatauina atu le veni i le aso na sosoo ai, ma faatau ai ni pepa malaga i le vaalele i Fiti mo lo latou aiga e toalima.

Sa latou taunuū atu i Nadi, Fiti, i le leva o le po, faatasi ma se fanau lelavava e toatolu ma se tietiega umi o loo loma latou te o atu ai i le malumalu i Suva. Fai mai Liu, "Sa ou iloaina, o le tele lava o lo matou taumafai ina ia latalata atili atu i le maota o le Alii, o le tele foi lea o le taumafai o Satani ia matou faavaivai ae matou te le'i mauaina le faamanuiaga."

A o saofafai ai i le malae vaalele ma taumafai e filifili po o le a le isi mea o le a latou faia, sa faapea ona fesoasoani atu ia i latou se tamaitai e faafesootai le mea e faamautu ai ma



le auala e malaga atu ai i Suva i le aso na sosoo ai i se tau taugofie nai lo o le tau na masani ona i ai. Sa latou lagonaina na auina mai e le Atua se agelu e fesoasoani ia i latou.

Sa latou taunu i le malumalu i le aso na sosoo ai. "A o matou ulu atu i le malumalu, sa ou lagonaina se filemu ma se toafimalie i lo'u loto," o le tala lea a Liu. "Ou te lei vaai muamua i se mea na sili ona mamā ma pa'epa'e e pei o totonu o le malumalu. Na oo mai se manatu i lo'u mafaufau: Afai o le malumalu o se fale na faia e le tagata ma ua ese le matagofie, ai lava se mataina o le maota ua folafola mai e le Tama Faalelagi mo i tatou!"

O lo latou aafiaga i le malumalu na suia ai olaga o le aiga. Fai mai Liu, "O le taimi atoa na matou i ai i Fiti, sa ou vaaia ai le alofa o lo tatou Tama Faalelagi ia i matou. A tatou filifili e mulimuli ia te Ia, Na te vaaia lelei i tatou."

Sa faaaauau pea ona oo mai faamanuiaga matagofie mo le aiga o Akau'ola ina ua latou toe foi mai. Sa maua uma e Siope ma Liu ni sikolasipi i le iunivesite, maua ni tikeri faafaiaoga, ma sa faafaigaluegaina i le Aoga Maualuga a Liahona.

A o faiaoga ai, sa amata ona la matauina ni tamaiti na manaomia se nofoaga e nonofo ai. O nisi taimi e taitoatasi, ae o le tele o taimi e

taitoalua ma taitoatolu, na amata ona tu'itu'i atu tamaiti i le faitotoa o Siope ma Liu. Ma sa ave i latou e Siope ma Liu latou te nonofo faatasi. O le taimi nei e toa 20 tagata o loo nonofo i si o latou fale laitiiti. E i ai isi a la tamaiti e toalima na "vaetamaina" o e ua o ese atu e aooga i le kolisi pe auauna atu faamisiona.

Ua iloa e Siope ma Liu o nei tamaiti o le a tutupu ae ma manuia pe a faaali atu i ai le alofa ma le faavae i o latou olaga. O i latou o e sa le o ni tagata o le Ekalesia ua taliaina le talalelei ma o loo faatupulaia pea lo latou mananao e auauna atu faamisiona. E valaau e Siope ma Liu ia tamaiti uma o loo i lalo o le la tausiga o le *la* fanau, ae e valaau e tamaiti uma ia Liu ma Siope o Tina ma Tama. Ua iloa e le auaiga o Akau'ola ua matuai faamanuiaina i latou ma e fiafia lava e faasoa atu nei faamanuiaga i isi. ■

O tusitala e mai i Alaska, ISA, ma o loo auauna atu i se misiona i Toga.



LAGOMUMŪ

Saunia e David Wright

Pe o taula'i atu la tatou vaai i taui e faavavau—po o se isi mea?

O ni nai tausaga ua mavae, sa ou galue ai i se nofoaga e ta'u o Aguateca e duesue ai gaoioiga a tagata na soifua i le tele o tausaga ua mavae, o loo i se vaega matagofie ma le mamao ese o Kuatemala, lea e na o se malaga umi i se vaa i le Vaitafe fepiopioa'i o Petexbatún e mafai ona oo atu i ai.

I se tasi afiafi na matou toe foi atu ai i Aguateca ma nisi o tagata duesue i le uma ai ona faaalu o lena aso i se nofoaga e le mamao. A o matou malaga atu i le vaa i le vaitafe, ma sa na o le ūū filemu o le afi o le vaa ma le feī o iniseti na faalogoina i tua atu, sa ou faalagolago i le autafa o le vaa, ma fiafia i le tietiega toafimalie ma le po na le oso ai se masina, ae na ese lava foi le manino. A o mulimuli atu le vaa i le ataata fepiopioa'i o le vaitafe, sa ou taumafai e faatumau lo'u iloa o le faatonutonuina [o le ala] e ala i le sueina o le Fetu i Matu. O nisi taimi na mou ai le Fetu i Matu i tua o ataata o laau na laina i luga o le auvai, ae e le umi lava ae toe vaaia foi.

I se tasi o pioga i le vaitafe, sa ou le vaaia ai foi le Fetu i Matu i tua atu o tumutumu laau. O le taimi lava na liliu ai agai i saute le vaa, sa vave lava ona ou toe iloaina atu, sa ou lagona lo'u pei o se tautai atamai, ma mitamita i le mafai pea ona tumau lo'u taulaiga. Ae peitai, ina ua mavae se minute o le matamata atu pea i ai, sa ou iloaina, sa ou sese: ou te le'i vaaia le Fetu i Matu po o se fetu foi. Sa ou matamata i se lagomumū.

O le taimi lena na ou iloa ai o le tele o "fetu" sa i o'u luga a'e, o le mea moni o ni lagomumū sa felelei filemu solo i le mafanafana o le ea o le po. O le mea e ofo ai, o le susulu o se vaega o ia lagomumū i luga a'e sa toetoe lava a tutusa ma le susulu o fetu ma aniva mamao, ma o le femilosaiga ma feliuaiga o le vaa i luga o le vaitafe na faigofie ai ona fenumia'i le lua lea.

"E faapefea ona ou sese i se tama'i lagomumū mo se fetu lea e toetoe a le uma le mumūsaesae?" O o'u mafau-fauga ia. Sa manino le tali: sa na o se faafitali lava o le vaaiga mamao. O si malamalamā e tau le iloa ma tau le umi o lagomumū na tutusa lava ma fetu ona o lagomumū sa na o ni nai futu na i ai i o'u luga a'e, ae o fetu sa mamao lava. Mai la'u vaaiga mamao, na toeitiiti lava tutusa le lua lea.

E pei o le lagomumū, o tofotofoga ma faigata e foliga lapopo ona e latalata mai. Ae, o faamanuiaga ua folafola

mai, e pei o fetu, e mafai ona foliga mai e mamao lava.

O le faanenefu o la tatou vaaiga faaleagaga e mafai ona tele ni ona taunuuga. O le tele lava o le mamao o e iloa atu o taui, o le tele foi lea o le faaosooosoina o i tatou e mafaufau e mafai ona faatuai le aso o lo tatou salamo ae mafai lava ona tatou toe foi atu i lo tatou Tama Faalelagi ia maua mai lo tatou tofi e faavavau (tagai Alema 34:33–34). Tatou te ono amata masalo-salo i le taui e faavavau pe filifili foi e sili atu le manaia o le faamalie o le tagata o le lalolagi i le taimi nei nai lo o le faatalitali mo faamanuiaga ia e ono oo mai i se taimi umi mulimuli ane. Tatou te ono matata'u i tauiviga malolosi ma faifai pea o le olaga atoa e faasaga i le agasala po o le leai o se faatuatua o le a fesoasoani mai lo tatou Faaola ia i tatou e tetee atu i tu'iga a Satani.

E i ai taimi e aluese ai a tatou vaaiga e faavavau; o le lu'i, ia vave lava ona toe maua mai. E ui ina mafai ona ofoina mai e le lalolagi ni taui matagofie, ma taufaasese, ae e mafai ona tatou vaai atu ia Iesu Keriso a'o tatou folau atu i femilosa'iiga ma feliua'iiga, o le olaga ma talitonu o Ia moni lava e "tauia i latou o e saili ma le filiga ia te ia" (Eperu 11:6).

Ua leva tausaga talu ona ou tietie i lena vaa i luga o le vaitafe, ae e oo mai i le asō, ou te tu pe a ma fetaia'i ma faaosooosoga ma faamanatu ia te a'u lava, "Ua na o se lagomumū." ■
E alala le tusitala i Uosigitone, ISA.



O SE PATETA MO LE FAIAOGA

Saunia e Bonny Dahlsrud

Sa ou aoaoina, ou te le tau tuuina atu ni faailoaga mamaalu o auauana i taimi uma lava.

O se faailoaga faatauvaa o le alofa e tutusa lava le manaia.

Le avea ai ma se faiaoga i le aoga tulagalua mo le sili atu i le 25 tau-saga, na ou maua ai le tele o mea malie mai a'u tamaiti aoga laiti. O faamatalaga le uigā, o ata tusi, ma galuega taulima fatufatua'i o meaalofa masani ia. Ae peitai, o le tausaga na te'a nei, o le taimi muamua lea na ou mauaina ai se pateta.

“O se pateta mo le faiaoga,” o le fai mai lea o Ema laitiit i ma le mitamita ina ua sau i la'u kesi, “ona e le'i i ai sa'u apu.” O se pateta e le telē tele, na fufulu mamā, ma manaia e fua atu i mea tau pateta. Sa ou faafetai atu ia te ia ma tuu i luga o la'u kesi. Sa ou vaaia le susulu o mata lapopoa lanumoana o Ema i le mitamita i soo se taimi e tilotilo i ai i le aluga o le aso.

Ina ua tuua le aoga, a o ou galue i la'u kesi, sa le mafai ona tatali lo'u manatu i le pateta ma se ataata alofa. E ese le faigofie o le vaai a tamaiti i mea, ma o lena pateta masani, na aoao mai ai e Ema se mea taua. Na silia ma se vaiaso na ou tuua ai i luga o la'u kesi ona sa avea ma se faamanatu ia te au.

I le avea ai ma se faiaoga asiasi ma se uso i la'u uarota,

sa ou manao e auauana atu i isi, ae sa ou faatalitali i taimi uma mo se “apu” ona ou faatoa faaaluina lea o le taimi e fesoasoani ai. Afai sa ou pisi tele, ma lē mafai ai ona faia se sitiū faaopoopo, pe afai foi na ou manao e tuuina atu se fugalaau faapitoa ae ou te le'i alu i le faleoloa fugalaau, na ou le amanaiaina le leo malū ma le ititi o musumusuga a le Agaga e uiga i se tasi o manaomia la'u auauana.

Sa ou faatalitonuina a'u lava e faapea, “O le a ou faia se mea i le faaiuga o le vaiaso lenei, pe a i ai so'u taimi.” “E leai se tagata e manaomia a'u i le asō.”

Ae faapefea pe afai o loo manaomia moni a'u e se tagata? Ae faapefea pe afai ou te lei le amanaiaina le uunaiga e asiasi atu i se tuaoi matua po o se tina talavou e lei leva ona maliu

lana tane? Mata e mafai ona ou fesoasoani atu pe auauana atu foi, ma le mea e mafai ona ou ofoina atu i lena taimi—o se “pateta”?

Sa ou aoaoina se lesona telē mai ia Ema lea o loo ou taumafai malosi e faatinoina. Afai e le o i ai sa'u apu, ou te aveina atu se pateta, ma ua o'u faia nei. Ou te le faatali e fai se sikiū po o la'u pai kulimi tipolo faapitoa; nai lo o lena ou te faatauina se pusa kuki. E le masani ona ou alu atu i le faatau fugalaau, ae e mafai ona ou afe atu mo se talatalanoaga e aunoa ma se fugalaau. E manaia tele foi se kata e fai i le fale, ae e faapena foi se valaau puupuu atu i le telefonu. E le faapea e tatau lava ona faia se faailoaga maoae o se auauana i taimi uma lava. E tutusa lava ma le manaia o le faia o se faailoaga faatauvaa o le alofa.

Ua i ai nei i lo'u fale le pateta, ae ou te manatu o le a ou le aia lava. E avea o se faamanatu faifai pea e auauana atu pe a uunaia ai a'u. O le taimi nei, ou te tuuina atu le mea ou te maua nai lo o le faatali mo se taimi mulimuli mai. O se pateta mo le faiaoga sa o se meaalofa moni aupito sili ona manaia. ■

E alala le tusitala i Iuta, ISA.



TALA FOU O LE EKALESIA

Asiasi i le news.lds.org mo se faaopoopoga o tala fou ma mea e tutupu i le Ekalesia.

Uunaia e Mea e Manaomia ia Tamaiti Aoga Seminare ina ia Siitia le Aoaoina

O mea fou e manaomia mo le faauuga o le seminare lea o le a fesoasoani i tamaiti aoga ina ia "siitia le aoaoina" o loo faagaoioia i le Ekalesia atoa. E aofia i mea e manaomia, lea o le a faaaoga i le amataga o suesuega o lenei tausaga o le Mataupu Faavae ma Feagaiga ma le talafaasolopito o le Eklesia, ni elemene tetele se lua:

1. O le a manaomia ona faitauina e tamaiti aoga ia tusi o mau o loo latou suesueina mo le tausaga, e faaopoopo atu i le mauaina o ni tog i fua

O tamaiti aoga seminare i Guyana, Amerika i Saute, o loo suesueina faatasi ia tusitusiga paia.



i le auai ma se faamaoniga faalelotu mai le latou epikopo po o le peresitene o paranesi. O le faitauina o mau na faamamafa mai i le taimi ua tuanai, ae ua avea nei ma se mea manaomia mo le faauuga.

2. O le a manaomia ona pasiina e tamaiti aoga ia sailiiliga faaleaoaoga e lua kosi i le aluga o le tausaga, ma se sikoa ia le itiiti ifo ma le 75 pasene. O le sailiiliga e tasi o le a faia i le afa o le tausaga ma le lona lua i le faaiuga o le tausaga faaakatemia. O sailiiliga o le a taulimaina muamua lava i le malamalama i mataupu faavae autu ma le faaogaina o mataupu faavae o le talalelei i olaga o aso uma.

O mea fou e manaomia e le seminare—faatasi ai ma le *Tala'i La'u Talalelei: O Se Taiala mo le Galuega Faafafeautalai* ma le mataupu aoaoina a le autalavou i Aso Sa, *Sau, Mulimuli Mai ia te Au*—o le a maua ai e le autalavou le avanoa ina ia ola tutoatas i a latou molimau, faaloloto lo latou malamalama i le talalelei, ma faateleina lo latou tomai e faasoa atu lo latou malamalama ao latou saunia mo olaga faaleauaunaga ma faalesoo.

O le a maua e tamaiti aoga i le faaiuga o tausaga uma, a le o se tusi faamaonia e tau atu ai ua latou faameainia mea e manaomia talafeagai (e aofia ai faitauga ma iloilogia) po o se tusi faamaonia o le aloaiaina e tau atu ai ua latou ausia tulaga manaomia o le auai. ■

Ua Faatuina e le Lui o le Faavasegaina o Igoa se Talafaamaumau

S a faatuina e tagata auai i le Lui o le Faavasegaina o Igoa Faavaomalo se talafaamaumau fou mo le toatele naua o tagata auai i le faavasegaina o igoa i luga o le Initoneti i le aso e tasi. O se aofaiga e 66,511 volenitia na o i luga o le Initoneti i le aso 22 lulai, 2014, e maimoa i ata o talaafamaumau faasolopito ma tusia le faamatalaga ina ia faaaaofia ai i le utofaamatalaga sailili i le FamilySearch.org. O le faamaumauga e tasi le aso lea sa i ai o volenitia e 49,025 sa faatuina ia lulai 2012 i le vevela o taumafaiga o le faavasegaina o igoa a le I.S. Census i le 1940.

Na maua mai ai foi i le lui le aofaiga mauluga lona lua tuufaatasi (faavasegaina po o le siakiina) o talafaamaumau ua auina atu, e sili laitiiti atu lava i luga ma le 5.7 miliona. (O faamaumauga taitasi e faavasegaina e volenitia e toalua ma toe iloiloina e se volenitia lona tolu, ua iloga o se tagata e siakia, e faamautinoaina le lelei ma le sa'o.)

"Sa auai a matou tagata o le au paia, talavou ma matutua, ma se loto fiafia," na fai mai ai Epikopo Crouet i Toulouse, Farani. "O se aafiaga ina a matagofie."

Fai mai Christopher Jones o Uelese, "Sa faatulagaina la matou afiafi faaleaiga ina ia mafai e i matou uma ona faavasegaina ia igoa—lua matua ma tamaiti e toafitu mai le 18 tausaga i le 5 tausaga. Sa tauina mai e i latou uma, i le avea ai ma se aiga sa matou faavasegaina ni igoa e silia ma le 900 faamaumauga!"

Fai mai Natalie Terry o Bangkok, Taialani, e fiafia o ia e auai i le aso o le faavasegaina o igoa i le lalolagi atoa faatasi ai ma lana tama teine e 13 tausaga. Ma sa fai mai Chris Shead o Chorley, Egelani, sa mafai ona ia maua pe a ma le 30 igoa fou o aiga, e aofia ai "se teineitiiti na maliu i se taimi faatoa mavae lona papatisoga ma sa pau i avanoa i le va o faamaumauga o igoa." ■



Na saunoa mai Elder David A. Bednar e saunia e ala o faasalalauga faaleagafesootai se avanoa uigaese e faasoa atu ai le talalelei.

Ofoina atu e se Apostolo se Fautuaga e uiga i Ala o Faasalalauga Faaleagafesootai

Eamata atu i lenei nofoaga i le aso, “Ou te apoapoi atu ia te outou ina ia faatumulia le lalolagi i savali ua tumu i le amiontu ma le upumoni, o savali e moni, faagaeetia, ma tauleleia, ma ia faatumulia ai le fogaelele e pei o se lolo,” sa saunoa ai Elder David A. Bednar o le Korama a Apostolo e Toasefululua i se lauga o le Vaiaso Aoga a le Iunivesite a Polika Iaga i le aso 19 Aokuso, 2014.

“Ou te tatalo o le a le na o lo tatou auai i se lologa lea e vave ona faatupulaia ma vave ona toe mouese atu,” sa ia saunoa mai ai i se savali lea sa taulai atu i le mana o ala o faasalalauga faaleagafesootai e fesoottai atu le upumoni. Sa ta’ua e Elder Bednar lo tatou vaitaimi o se “vaitau tulagaese i le talafaasolopito o le lalolagi,” lea ua faamanuiaina ai i tatou i “se faagsologa alualu i luma o taulagalaga ma fatufatuga lea ua mafai ai ma faanatinaiina le galuega o le faaolataga.”

“Pe a ma le 40 pasene o la tatou autau faafaifeatalai i le lalolagi atoa ua le o toe mamao ae faaaogaina ia masini faafuainumera e avea ma mea faigaluega i le galuega o le liua, faatumauiina, ma le faatoaagaina mai,” sa ia

saunoa mai ai. “Ou te mautinoa ua tatou iloaina foi le auala ua faateleai ai e tekinolosi le galuega o talafaasolopito o aiga ma le malumalu, suesuega a le tagata lava ia ma aiga o tusitusiga paia o le talalelei toefuataiina, ma ua mafai ai ona tatou aoao, vaai, ma tofo i le lalolagi i ni auala mataina.”

Sa ia faasino i ni taumafaiga o ala o faasalalauga faaleagafesootai talu ai nei lea e aofia ai le vitio o le Eseta na gaosia e le Ekalesia, *Because of Him*, ma sa silia ma le faalima miliona ona maimoaina i atunu ma teritori e 191, o le faailoga #didyouthinktopray, lea na oo atu i le silia ma le 40,000 talanoga e uiga i le manaomia o le tatalo.


O nei mea ma isi taumafaiga ua “na o sina tamai sinasina,” sa ia saunoa ai, valaau atu i Au Paia o Aso e Gata Ai ina ia “fesoasoani e faaliliu le sinasina i se lolovai.” Sa ia saunoa mai foi afai e faaaoga le ala o faasalalauga faaleagafesootai:

- “E le tatau ona tatou soona faateleina se mea, faalautele, pe faafoliga i se isi, po o se mea e le o avea ai i tatou. E tatau ona faatuatuaina ma anoa a tatou anotusi.”

- “O a tatou savali e tatau ona faagaeetia ma siitia, nai lo le tauupu, finau, faasala, po o le faamaasi.”
- “Ia lototele ma lototoa, ae le o le faamaualuga, i le lagolagoina ma le puipuia o o tatou talitonuga, ma aloese mai le finauga. I le avea ai ma soo, o la tatou faamoemoega o le faaaoga lea o alaata o ala o faasalalauga faaleagafesootai e avea o ni auala o le puipuiga o le malamalama ma le upumoni o le talalelei toefuataiina a Iesu Keriso.”
- “Ua tele naua taimi e mafai ona faamaumauina, tele naua mafutaga ua afaina pe ua faaleagaina, ma ua mafai ona faalavelave le faaaoga sese o tekinolosi i mamanu o le amiontu. E le tatau ona tatou faatagaina e oo lava i le faaaogaaga lelei o ala o faasalalauga faaleagafesootai e pulea le faaaogaina lelei ma sili atu o o tatou taimi, malosi, ma punaoa.”
- “E le tau manaomia le avea o i tatou ma ni tagata ua atamamai i ala o faasalalauga faaleagafesootai. Ma e le manaomia lo tatou faaaluina o le tele o le taimi i le fatuina ma le faasalalauiina atu o savali faigata.” ■

*Talosia ia outou filifili e avea ma se malamalamama
i le lalolagi, e fesoasoani e laveai fanau a le
Atua, ia maua le olioli, ma iu ai ina maua
le faamanuiaga o le ola e faavavau.*





Saunia e Elder
Russell M. Nelson

O Le Korama
a Aposetolo e
Toasefululu

O A MEA O LE A E **FILIFILIA?**

*Na tofia outou e lo outou Tama Faalelagi e fausia
le malo o le Atua i le lalolagi i le taimi nei,
ma saunia tagata e talia le Faaola.*

Tle avea ai ma ni “autalavou o le tofi tautupu,”¹ o outou o atalii ma afafine moni o le Atua, na soifua mai i lenei taimi faapitoa i le talafaasolopito o le lalolagi mo se faamoemoega sili ona paia. E ui lava o tulaga faatauaina mama ma faalelotu o le lalolagi nei, e foliga mai ua fai ifo i le salafa o le lalolagi, ae o le autalavou o lenei Ekalesia e tatau ona avea ma ni avefu'a a le Alii ma ni sulu o le malamalamala e tosina mai ai isi ia te Ia. O o outou faasinomaga ma faamoemoega e tulaga ese lava.

O le a lou faasinomaga? O outou o fanau o le feagaiga lea na osia e le Atua ma Aperaamo ina ua folafola atu ia Aperaamo e faapea, “o lau fanau o le a faamanu-iaina ai ituaiga uma o le lalolagi” (Galuega 3:25; tagai foi i le 1 Nifae 15:18; 3 Nifae 20:25). O outou foi o “fanau o aso na folafolaina,”² i lenei vaitau o le talafaasolopito o le lalolagi lea ua tele ina folafola atu ai le talalelei i le salafa o le lalolagi atoa.

O le a lou faamoemoega? O outou le usoga sa muaifaauuina i le muai olaga e tauaveina le perisitua (tagai i le Alema 13:2–3). Ae o outou tuafafine, sa muai filifilia outou a'o le'i faavaeina le lalolagi e fanauina ma tausia fanau a le Atua; o le faia o lena mea, ua outou faamamaluina ai le Atua (tagai i le MF&F 132:63). Pe ua outou mafaufau ea tuafafine i le uiga moni o le avea ma soa-foafoa a le Atua?

O outou taitoatasi o alii talavou ma tamaitai talavou sa tofia e lo outou Tama Faalelagi e fausia le malo o le Atua i le lalolagi i le taimi nei, ma saunia tagata e talia le Faaola pe a oo i le taimi e pule ma nofotupu ai o Ia o le Mesia o le Meleniuma. O lo outou tofi tautupu, faasinomaga, faamoemoega, ma le tiute paia ua tulaga ese ai outou mai isi tagata uma.

Ae e le mafai e o outou tofi, po o lo outou muai faauuina i le muai olaga atoa ai ma tiute ona faaolaina pe faaeaina ai outou. O le a outou faia lena mea e ala i a outou faaiuga fai toatasi ma a'o outou filifili e faaaoga le mana o le Togiola a le Alii i o outou olaga. O le mataupu faavae maoae e faavavau o le fitalia e taua tele i le

fuafuaga a lo tatou Tama. O lea la, o outou o le autalavou o le tofi tautupu, o le a le mea o le a e filifilia?

Pe o le a e filifili e faateleina lou aoaoina?

O le aoaoina o lau mea lena ia maua. E leai se tasi e mafai ona ia mauaina mo oe. Po o fea lava o e i ai, atiina ae se naunautaiga loloto e aoao. Mo i tatou i le avea ai ma ni tagata o le Au Paia o Aso e Gata Ai, o le mauaina o se aoaoga e le na o se avanoa; o se tiutetauave faalelotu. “O le mamalu o le Atua o le malamalama” (MF&F 93:36). E moni lava, o a tatou aoaoga o le a aogā mo i tatou i le faavavau.

“Soo se mataupu autu o le atamai tatou te maua i le olaga lenei, o le a tu mai faatasi ma i tatou i le toetetu.

“Ma afai e maua e se tagata le poto ma le tomai sili atu i le olaga lenei . . . , o le a maua e ia le avanoa tele atu i le lalolagi a sau” (MF&F 130:18–19).

O se vaiga mamao faapena o le a fesoasoani e te faia ai filifiliga lelei e uiga i le aoaoina.

Aua le fefe e tulitulimatagau au sini—e oo lava i au miti! Ae ia silafia e leai se auala ‘alo e tau atu i le tulaga silisili ma le tomai. O le aoaoina o le eseesege lea i le va o le *moomoo* maimau pe ana mafai ona e fesoasoani atu i isi tagata ma le *mafai* ona fesoasoani atu ia i latou.

O le a le ituaiga olaga o le a e filifilia?

E tatau ona tulaga ese lou olaga mai isi. Tou te silafia le upu a Paulo i le taulealea o Timoteo: “Ia fai oe ma faaaaoao o e ua faatuatua, i le upu, ma le amio, ma le alofa, ma le loto, i le faatuatua, ma le le gaoia” (1 Timoteo 4:12).³ Filifili ia tulaga ese ou manatu ma amioga mai ia i latou o le lalolagi. Filifili ia tulaga ese ou foliga vaaia, ma iloa ai se faatosinaga mo le lelei o le a avea ai oe. E pei ona ta’ua i se tasi taimi e Ardeth G. Kapp, o lē sa avea muamua ma pere sitene aoao o Tamaitai Talavou, “E le mafai ona avea oe ma se tagata faaola pe afai e tutusa ou foliga vaaia ma isi tagata taelee uma i luga o le matafaga.”⁴

I le avea ai ma autalavou o le tofi tautupu, ua maoae lo outou amataga i le olaga, ae e i ai foi sa outou tiutetauave faaopoopo. “Aua o ia o lē ua tuu atu i ai mea e tele, e tele mea ua manaomia mai ai” (MF&F 82:3; tagai foi i le Luka 12:48). O se vaega o lena mea e manaomia o le avea ma se tagata ua lesitala. Ina ua papatisoina outou, ua outou toe auai moni i le autau a le Alii.⁵ I le muai olaga, sa outou tutu mo Iesu Keriso i le taimi o le Taua i le Lagi. Ma o lenei o loo

faaaauau pea iinei i le lalolagi le taua i le va o autau o le lelei ma le leaga. E moni lava! (Tagai i le Faaaliga 12:7–9; MF&F 29:40–41). I le itu a le Atua o loo i ai Iesu Keriso, na muai faauuina e avea ma Faaola o le lalolagi (tagai i le 1 Nifae 10:4). I le isi itu o loo i ai Satani—o se tagata fouvale, o se e faaumatiaina le faitalia (tagai i le Mose 4:3).⁶

O le fuafuaga a le Atua ua faataga ai le fili e faaosoosoina oe ina ia mafai ona faaaoga lou fitalia e filifili ai le lelei nai lo le leaga, filifili e salamo, ia filifili e o mai ia Iesu Keriso ma talitonu i Ana aoaoga ma mulimuli i Ana faataitaiga. O se tiutetauave ma se faatuatuaga ina a maoae!

O lou saoloto e fai a oe lava [filifiliga] e matuai taua i lou alualu i luma ma lou fiafia e faavavau, lea foi e fai ai e le fili ni taumafaiga sili atu ona maoae e faavaivaia ai [lou saolotoga] (tagai i le 2 Nifae 2:27; 10:23).

Pe o le a e faatulagaina ni mea e faamuamua e fesoasoani ia te oe i le faiga o au filifiliga?

O au filifiliga o le a lē na o le va o le lelei ma le leaga. O le tele lava o ni filifiliga e i le va o ni filifiliga lelei se lua. E le o upumoni uma na tutusa le foaoaina, o lea e manaomia ai ona e faatulagaina mea e faamuamua. I lou tulitulimatagauina o le malamalama, ia iloa o le upumoni sili ona taua e mafai ona e aoaoina e mai le Alii. I Lana Tatalo Faatoga i Lona Tama, na faamaonia ai e le Faaola lava Ia le mea lenei. Na fetalai o Ia, “O le ola e faavavau foi lenei, ia latou iloa oe le Atua moni e toatasi, atoa ma Le ua E auina mai, o Iesu Keriso lea” (Ioane 17:3). E sili atu i isi mea uma o loo outou saili e aoaoina, saili ia iloa le Atua, lou Tama Faalelagi, ma Lona Alo, o Iesu Keriso. Ia outou iloa i La’ua ma alolofa ia i La’ua, e pei ona ou [iloa ma alofa ia i La’ua].

O le isi mau e uiga i mea e faamuamua, na fesoasoani ia te a’u i lo’u olaga o le: “Ae ia outou muai saili le malo o le Atua, ma lana amiontonu; ona faaopoopoina atu lea o ia mea uma ia te outou” (Mataio 6:33).

E sili atu nai lo soo se mea i lenei lalolagi, tou te manaao e fai filifiliga e tau atu i le taunuuga tupito ma le mamalu o le ola e faavavau. O le mamalu sili lena o le Atua mo outou (tagai i le MF&F 14:7; Mose 1:39). Filifili le ola e faavavau e avea ma mea aupito sili ona e faamuamua! Suesue i tusitusiga paia, e pei o le vaega e 76 ma le 88 o le Mataupu Faavae ma Feagaiga, ina ia malamalama atili ai e uiga i faamanuiaga eseese o loo faatalitali mai mo i latou o



*O le toatele o tagata
e le'i oo i le taimi
latou te maua ai
upumoni paia ma
e le o iloa po o fea e
su'e i ai. Ae o outou
o le autalavou o le
tofi tau tupu ua o
mai e laveai i latou.*

e filifilia le ola e faavavau, ma i latou o e e lē [filifilia le ola e faavavau]. Filifili le ola e faavavau e avea ma mea aupito sili ona e faamuamuaina, ona e matauina lea o le sologa lelei o isi filifiliga.

O ai o le a e filifilia lua te fegalegaleai?

O le a outou miōmiō faatasi ma le toatele o tagata lelei o e talitonu foi i le Atua. Pe o i latou o ni tagata Iutaia, Katoliko, Porotesano pe Mosalemi, ua silafia e tagata faatuatua e moni lava o loo i ai upumoni a'ia'i. O loo i ai i e talitonu i le Atua se iloatino. O e talitonu e usiusitai ma le lotomalie i tulafono faalemalo ma tulafono faalelagi, e oo lava i tulafono ia atonu e le faamalosia.

Faatasi ai ma lau tautinoga e usitai i tulafono faalemalo ma tulafono faalelagi, e te tu ai i se moli lanumumu, e tusa lava pe le o vaaia ni isi taavale. I le avea ai ma se atalii o le Atua e te iloa, e tusa lava pe le maua oe e leoleo, o le gaoi ma le fasioti tagata e sese, ma o le a iu ina faamasinoina ai oe e le Atua. Ua e silafia o taunuuga o le le usitaia o tulafono e le gata ina faaletino ae faavavau foi.

A o e soifua i lou olaga, o le a e masani foi i tagata o e e le talitonu i le Atua. O le toatele o i latou e le'i oo i le taimi latou te maua ai upumoni paia ma e le o iloa po o fea e su'e i ai. Ae o outou o le autalavou o le tofi tau tupu ua o mai e laveai i latou. I ni aofaiga toatele, ua outou taliaina le valaau a perofeta a le Atua mo ni faifeautalai se toatele. Matou te matuai faafetai mo outou uma taitoatas!

A o outou femiōmiōa'i ma tagata le talitonu, ianofouta atonu e i ai ni nai tagata e le popole moni mo lou manuia (tagai i le MF&F 1:16; 89:4). O le taimi lava e te iloatino ai lena mea, sola ese vave mai ai i latou ma aua nei toe foi atu i ai, (tagai i le 1 Timoteo 6:5–6, 11).

O le mea e faanoanoa ai, o le a e feiloai atu i tagata o loo latou matua saili faatapito se mea lea e foliga mai ia i latou o se fiafiaga, e ave ifo i latou i lalo i se tifato maseesee o le agasala. Ia faaeteete i lena tifato maseesee! O soo se tuinananu i le agasala o le a na'o sina taimi lava, ae o mafau-faugua atuatuvalue o le agasala ua faatumulia i le popole ma le ta'usalaga e faavavau. O le mimiloina faaamioleaga o le tuufaatasiga na mamanuina faalelagi e faatasia ai le

tane ma le avā ua na o se mea noa taufaasese. O aafiaga faasāina e aveesea mai ai le uiga loloto ma mea matagofie e manatuaina.

Pe o le a e filifilia le saoloto po o le pologa?

Ua taape solo au a le amioleaga. O le mea moni o loo outou nonofo i teritori a le fili.⁷ Ua faateteleina le mala faataumaoi o ponokalafi. Na te maileia ai i latou uma o e gauai atu i ana mailei taufaasese.

O lenei mea na muai silafia e le Alii, lea na fetalai mai, “Ma o lenei ou te faailoa atu ia te outou se mealilo, o se mea lea o loo faia i totonu o potu faalilolilo, e aumai ai lo outou faafanoga i le āluga o taimi, ma sa outou le iloina” (MF&F 38:13; tagai foi i le fuaiupu e 28).

Mafaufau po o le a le toatele o tagata o loo i totonu o potu faalilolilo o loo saili e faaumatia lou olaga ma lou fiafia! O faaosoosoga i le tino, e le o se mea fou. Na lapatai mai le Apostolo o Peteru e uiga i lenei lava mailei ina ua ia tusia:

“Latou te maileia i tuinanau o le tino . . . o e na matuā sosola ese. . . .

“Ua latou folafola atu ia te i latou le saolotoga, a o i latou lava ua fai ma pologa o le amioleaga: auā pe a toilalo se tasi i se tasi, ua nofo pologa o ia ia te ia” (2 Peteru 2:18–19).

Aloese mai lena pologa, ou uso e, ma tuafafine pele. Afai o loo e matamata i polokalafi i le taimi nei, tuu nei loa! Saili le fesoasoani mai lou epikopo. E leai se tasi e lava sona poto na te faatoilaloina ai na o ia le fili, pe afai ua latou onanā i ponokalafi. E pei lona faataumaoi o le lepela, e faavaisu e pei o le fualaa oona o le [meth], ma e aati e pei o le vailaau malosi o le [lye].

Pe o le a e filifili e mulimuli i le Alii po o manatu faafilisofia o tagata?

Suesue ma le toto'a le “O Le Aiga: O Se Folafolaga i le Lalolagi.”⁸ Ua osofaia le aiga i le lalolagi atoa, ae o upumoni o le folafolaga i le aiga o le a faamalosia ai oe.

E tatau ona e malamalama i le ogaoga o taunuuga o le tetee o le lalolagi i le taimi nei i le faauigaga o le faaipoipoga. O le finauga i le vaitau lenei o le fesili lea pe mafai ona faaipoipo ni tagata se toalua o le itupa e tasi. Afai e i ai sau fesili e uiga i le tulaga o le Ekalesia e faatatau i lenei mea po o soo se faafitauli tawa lava, ia mafaufau loloto i ai ma le agaga tatalo, ona gauai atu lea i savali a perofeta soifua. O a latou upu musuia, faatasi ai ma musumusuga

mai le Agaga Paia, o le a avatu ai i lou mafaufau se mala-malamaga atoatoa ma moni.⁹

“O le finauga i le faaipoipoga ua na o le tasi lea o le mau feeseseaiga o le a luitauina ai lou lumanai. I le faasagatau atu i leo malomaloā o le fili, o outou, i le avea ai ma tagata talavou o le tofi tautupu, o le a outou filifili e tutu atu mo le Alii ma Lana upumoni.

Na valoia e le Apostolo o Paulo le tulaga pagatia o o tatou aso (tagai i le 2 Timoteo 3:1–5). O lana faaaliga sa'olele e uiga i le faatafunaga faaleagaga o o tatou aso, na sosoo mai ai ma lana faaiuga faamalosiau, e ta'u mai ai ia i tatou le ala e tumau ai i le saogalemu: “Talu foi ina o e tama itiiti ua e iloa Tusi Paia, e mafai ona faapoto ai ia te oe e iu ai i le ola i le faatuatua ua ia Keriso Iesu” (2 Timoteo 3:15).

Ou te faaopoopo atu i lana fautuaga: Ia suesue pea i tusitusiga paia. Ia faia pea mea e atiae ai lou faatuatua ia Iesu Keriso. Ona mātāu lea o filifīlia poto e ta'ina atu i ai oe e fai.

O lou faatuatua ia Iesu Keriso ma Lana talalelei o le a e maua ai le lototele e faaipoipo ma aumai ai fanau i totonu o lou aiga a o e talavou ma mafai ona e fanauina. A oo ina e matua e pei o a'u, o le a e faatauaina lau fanau, fanau a lau fanau, ma a latou fanau, e sili atu nai lo soo se lauiloa po o oa ia semanu e maua mai.

E faapefea ona e saunia mo lau faatalanoaga patino ma le Faaola?

O outou o le autalavou o le tofi tau tupu e le'i atoatoa i le taimi nei. E leai ma se tasi o i tatou ua atoatoa. O lea la, faatasi ai ma i matou uma, tatou te matuai faafetai mo le Togiola a le Faaola, ua aumaia ai le faamagaloga atoatoa pe a e salamo faamaoni. Ua e iloa foi o lou nofo ai iinei i le olaga faitino e fai si puupuu. I se taimi, o le a faauu ai outou uma taitoatasi mai lenei olaga maaleale ae agai atu i le lalolagi e sosoo ai.

O loo faatalitali mai le Aso Faamasino mo i tatou taitoatasi. Ua ou iloa “o le leoleo o le faitotoa o le Paia e Toatas i o Isaraelu; ma na te le faaaogaina se auauna iina” (2 Nifae 9:41). Ioe, o i tatou taitoatasi o le a i ai se faatalanoaga faaletagata lava ia ma Iesu Keriso.

O aso taitasi i le lalolagi e te maua ai le taimi ma le avanoa e saunia ai mo lena faatalanoaga. Faamolemole ia iloa le mea lenei: A e filifili e ola i le itu a le Alii, e le tuua lava na o oe. Ua tuuina mai e le Atua ia te oe le gafatia e maua ai Lana fesoasoani a'o e uia le auala sili ona lamatia o le olaga



Filifili ia tulaga ese ou manatu ma amiooga mai ia i latou o le lalolagi. Filifili ia tulaga ese ou foliga vaaia, ma iloa ai se faatosinaga mo le lelei o le a avea ai oe.

faitino. A o sasaa atu ma le filiga, ma le naunautai lou loto ia te Ia i le tatalo i aso taitasi, o le a Ia auina mai Ana agelu e fesoasoani ia te oe (tagai i le MF&F 84). Ua Ia tuuina mai le Agaga Paia ia i ai i ou autafa a o e ola agavaa. Ua Ia tuuina mai ia te oe tusitusiga paia ina ia e taumafa atoatoa ai i afoga a Iesu Keriso (tagai i le 2 Nifae 9:51; 32:3). Ua Ia tuuina mai ia te oe upu ia faalogo i ai mai perofeta soifua.

O ai o le a tuu i ai lou faatuatuaga?

Ua e iloa o le Atua o lou Tama. E alofa ia te oe. E finalo o Ia ia e fiafia. Ia tuu atu lou faatuatuaga ia te Ia (tagai i le 2 Nifae 4:34; 28:31). Ia taula'i atu lau vaai i Lona malumalu paia. Ia e agavaa e maua ou sauniga o le faaeeega paia ma le faamauga. Tumau i le faatuatua i na feagaiga, ma toe foi atu soo i le malumalu. Ia manatua, o lau sini tupito o le maua lea o le faamanuiaga silisili a le Atua, o le ola lea e faavavau (tagai i le MF&F 14:7). O sauniga o le malumalu e taua tele mo lena faamanuiaga (tagai i le MF&F 131:1–3).

Ou te valaaulia outou e suesue ma le agaga tatalo i le faamatalaga faatusitusiga paia o o outou faasinomaga, faamoe-moega, ma faamanuiaga (tagai i le MF&F 86:8–11). Ioe, o

outou moni lava o le autalavou o le tofi tau tupu, na foafaina i le faatusa o le Atua. O outou o suli moni faaletulafono, ia tofotofoina ma suesueina. Talosia ia outou filifili e avea ma se malamalama i le lalolagi, e fesoasoani e laveai fanau a le Atua, ia maua le olioli, ma iu ai ina maua le faamanuiaga o le ola e faavavau. ■

Mai se saunoaga i le faigalotu a le Ofisa o Aoga a le Ekalesia, "Autalavou o le Tupuaga Tautupu: O Le Mea E te Filifilia?" na fofogaina atu i le Iunivesite o Polika Iaga-Hawaii i le aso 6 Setema, 2013. Mo le saunoaga atoa, alu i le cesdevotional LDS.org.

FAAMATALAGA

1. "Tumau Tumau," *Viiga*, nu. 160.
2. "O le Faamoemoe o Isarelū," *Viiga*, nu. 161.
3. O le upu Eleni *anastrophe*, lea na faaliliuinā mai ai le *talanoaga o lona uiga o se olaga agai i luga*.
4. Ardeh Greene Kapp, *I Walk by Faith* (1987), 97.
5. "Ua Tatou Tauto i le Taua," *Viiga*, nu. 157.
6. E faamatala e nisi tagata le faitalia o le *filifili saoloto*, ae o lena faamatalaga e le faatusitusiga paia. E na o le *faitalia* o loo talanoa mai ai le mau (tagai i le MF&F 101:78).
7. Tagai i le Boyd K. Packer, "Fautuaga i le Autalavou," *Liahona*, Nov. 2011, 18.
8. Tagai "O Le Aiga: O Se Folafolaga i le Lalolagi," *Liahona*, Nov. 2010, 129.
9. Fai mai le folafolaga musuia a le Ekalesia e uiga i le aiga: "O le aiga ua faauuina e le Atua. O le faaipoipoga i le va o le alii ma le tamaitai e taua i Lana fuafuaga e faavavau. ("O Le Aiga: O Se Folafolaga i le Lalolagi," *Liahona*, Nov. 2010, 129).

OA ITUAIGA Falaoga E TATAU ONA AVEA AI I TATOU?

*Afai tatou te mananao
moni e avea e faapei o le
Faaola, e tatau ona tatou
iloa aoao atu i le ala na Ia
aoao mai ai.*

**Saunia e le Au Peresitene
Aoao o le Aoga Sa**



**Tad R. Callister, peresitene (ogatotonu);
John S. Tanner, fesoasoani muamua
(agavale); ma Devin G. Durrant, feso-
soani lua (taumatau)**

Na toeitiiti lava faamaeaina le misiona a le Alii toetu i le Atu Amerika. E lei leva atu, na afio ifo ai o Ia mai le lagi, ma aumai le malamalama e aveese ai le pogisa lea na ufitia ai laueelele o sa Nifae ma sa Lamana i le mavae ai o Lona maliu. Sa ia aoao atu ma molimau atu ma tatalo. Sa Ia faamanuiaina, taliina fesili, ma faatuina Lana Ekalesia. O le taimi la lenei, a o sauni o Ia e tuua Ona sooo, sa Ia tuuina atu ia te i latou se tiute lea atonu na faatumulia ai i latou i le mautinoa:

“Ua outou iloa mea e tatau ona outou faia i la’u ekalesia; ona o galuenga na outou vaai na ou faia, o mea ia tou te faia foi.

“... O lea, o a ituaiga o tagata e tatau ona outou i ai? E moni, ou te fai atu ia te outou, e pei lava o a’u nei” (3 Nifae 27:21, 27).

Na valaaulia i tatou e Iesu ia [tatou] faapei o Ia, ma o se tasi o Ona uiga faaalia maoae o Lona mafai lea ona aoao atu. O Ia o le Faiaoga Sili. Ina ia avea faapei o Ia, e tatau foi ona avea i tatou ma faiaoga sili atu ona alolofa ma suia ni olaga, e le gata i le lotu, ae faapea foi i o tatou aiga. Ina ia avea


faapei o Ia, e tatau ona i ai so tatou manao loloto e aoao atu e pei ona Ia aoao mai.

Fesili ma Valaaulia

E masani ona aoao mai Iesu e ala i fesili ma valaaulia. Mafaufau i se faataitaiga mai le taimi na Ia faaluina faatasi ma Ona sooo i le konetineta o Amerika. I se taimi a’o latou tatalo, na faaali mai le Faaola ia i latou ma fetalai muamua atu i se fesili valaaulia: “O le a se mea ua outou mananao ou te tuu atu ia te outou?” (3 Nifae 27:2). E faapefea ona e tali atu pe afai e fesili atu le Faaola ia te oe i le fesili lenei?

Na tali atu le au sooo: “Le Alii e, matou te mananao se’i e fofoga mai ia te i matou le igoa matou te faaigoa ai lenei ekalesia; ona o loo i ai ni finauga i totonus o le nuu e faatatau i lenei mataupu” (3 Nifae 27:3).

Na tali e Keriso la latou fesili i se tasi o Ana fesili: “Latou te le’i faitau ea i tusitusiga paia, ia ua fai mai e ao ina outou ave i o outou luga le suafa o Keriso, o lo’u igoa lea?” (3 Nifae 27:5). Na faamanatu atu e lenei fesili i Ana tagata aoao e tatau ona latou tuu ni taumafaiga i le taliina o a latou lava



fesili, ma o tali i le tele o fesili e mafai ona maua i tusitusiga paia.

Ona Ia faaiuina lea i le faamanatu atu i le au soo le taua o Lona suafa. O Ana fetalaiga na valaaulia ai i latou ia faia ma folafola atu ia i latou se faamanuiaga: "Ma o soo se tasi na te ave i ona luga lou igoa, ma tumau seia oo i le iuga, o ia lava lea o le a faaolaina i le aso gataaga" (3 Nifae 27:6).

O se Faataitaiga o le Aoao Atu

I nai fuaiupu puupuu nei, ua tuuina mai ai e Iesu Keriso ia i tatou se faataitaiga faalelagi o le aoao atu. Sa Ia amataina i se fesili faatupu manatu na fuafuaina ia iloatino ai manaoga o Ana tagata aoao. Ona Ia faatalitali lea ma faalogo atu i a latou tali.

Ina ua uma ona tali atu ana tagata aoao, ona Ia fesoasoani lea ia i latou ia maua le mea sa latou sailia e ala i le

faasino atu o i latou i tusitusiga paia.

Mulimuli ane, sa Ia tuuina atu ni valaaulia se lua ma folafola atu se faamanuiaga matagofie ia i latou o e naunau e faatino Lana valaaulia. O le metotia faafaiaoga a Keriso i le tulaga lenei e mafai ona aoteleina i mataupu faavae nei e lima:

1. Fai atu ni fesili aoga.

Sa fesili le Faaola, "O le a se mea ua outou mananao ou te tuu atu ia te outou?" O lenei fesili e valaaulia ai ni tali eseese. A o tatou fai atu ni fesili faapena, ua tatou fesoasoani i tagata aoao e faamatala mai mea o loo latou mananao e aoao, ma tatou fesoasoani ia i latou e taulai atu i na mea e sili atu ona taua; tatou te fa'a auai i latou i le aoaoina o mea aogā.

2. Faalogo i au tagata aoao.

Sa faafogoga atu Iesu Keriso a o latou fai mai, "Le Alii e, matou te mananao

se'i e fofoga mai ia te i matou le igoa matou te faaigoa ai lenei ekalesia." E ala i le faalogo ma le toto'a, tatou te saunia lelei ai e taulai atu i manaoga o o tatou tagata aoao.

3. Faaaoga tusitusiga paia.

Sa faamanatu atu e Keriso i Ona soo, "Latou te le'i faitau ea i tusitusiga paia, ia ua fai mai e ao ina outou ave i o outou luga le suafa o Keriso, o lo'u igoa lea?" E tatau i le faiaoga ma le tagata aoao ona faaalu ni taimi i tusitusiga paia e saunia ai mo lesona. O le suesue i tusitusiga paia o se vaega autu lea o sauniuniga faaleagaga mo faiaoga ma tagata aoao.

4. Valaaulia au tagata aoao e faatino loa.

Sa valaaulia e le Alii Ona soo e (1) tauave Lona suafa i o latou luga ma (2) tumau e oo i le iuga. Fai mai le *Tala'i La'u Talalelei*, "E seāseā lava, pe afai e i ai, ona e talanoa atu i tagata pe aoaoina i latou e aunoa ma le tuuina atu o se valaaulia ina ia faia se mea o le a faamalolosia ai lo latou faatuatua ia Keriso."¹ O se fautuaga lelei lenei, e le mo na o faifeatalai, ae mo faiaoga uma o le talalelei.

5. Faamanatu atu i tagata aoao ia faamanuiaga folafolaina o le usiusitai.

Ma le mea mulimuli, na folafola mai e Iesu Keriso i Ana tagata aoao, o i latou o e faatinoina Ana valaaulia "o le a faolaina i le aso gataaga." E masani ona folafola mai e Keriso Ana faamanuiaga silisili mo lo tatou usiusitai (tagai i le MF&F 14:7). E mafai foi ona tatou faia lena mea e tasi, i le avea ai ma faiaoga o Lana talalelei.

O faataitaiga o loo i luga ua faapupula atu ai ni nai metotia taua faafai-aoga na faaaoga e le Faaola. E le gata i lea, o nisi taimi sa Ia aoao mai e

ala i faataoto po o tala faatusa. E i ai taimi sa Ia luiina ai ma na oo lava ina aoaiina ai le au faitio. Ae o taimi uma sa Ia aoao atu ai ma le alofa, e oo lava foi ia i latou na Ia aoaiina (tagai i le Faaaliga 3:19).

Alofa i Au Tagata Aoao

E tatau foi ia i tatou ona aoao atu ma le alofa ma le alofa mama pe afai o le a tatou aoao atu i le ala a le Faaola. O le alofa e tau fai matai una ai le loto o le faiaoga ma le tagata aoao, ina ia mafai ona "faagaeetaina ma olioli faatasi i laua uma" (MF&F 50:22).

O se faataitaiga manino o le alofa o le Faaola mo Ona tagata aoao e mafai ona maua i le 3 Nifae lea sa Ia tatalo ai mo tagata, tutulu faatasi ma tagata, ma faamanuia i tagata. A o tatalo atu o Ia i Lona Tama mo i latou, na lagona e sa Nifaē Lona alofa: "E leai se tagata e mafai ona malamalamai le olioli lea na faatumuina ai o matou loto i le taimi na matou faalogo ai ia te ia o tatalo atu i le Tama mo i matou" (3 Nifae 17:17).

Sa tutulu fiafia o Ia mo i latou ma faamanuiaina i latou ona o lo latou faatuatua, sa matuai maoae Lona alofa:

"Amuia lava outou ona o lo outou faatuatua. Ma o lenei faauta, ua atoatoa lo'u olioli.

"Ma ina ua uma ona ia fetalai mai o nei upu, sa tutulu o ia" (3 Nifae 17:20-21).

"O le malosi o le alofa e mafai ai ona aoaoina mea e tele. O loo tusia i tusitusiga paia sa "fiafia atu ona fofoga ia i latou" ma "sa matalatala o latou loto ma sa malamalamai i o latou loto" (3 Nifae 19:25, 33).

Ia Uunaia Au Tagata Aoao e Molimau Atu

Sa tuuina atu foi e le Faaola i Ona tagata aoao avanoa e faasoaa atu ai a latou molimau. "Mo se faataitaiga, ina ua maliu atu Iesu i le laueelele o Kaisareia Filipo, ona fesili atu ai lea o ia i ona soo, ua faapea atu, Pe se a le upu a tagata ia te au le Atalii o le tagata, po o ai?

"Ona latou fai mai ai lea, o le upu a isi, o oe o Ioane le papatiso: a o isi



o Elia; a o isi, o Ieremia, po o se tasi o le au perofeta.

“Ona fetalai atu lea o ia ia te i latou, A o outou, pe se a le outou upu ia te a’u, po o ai?

“Ona tali mai ai lea o Simona Peteru, ma faapea mai, O oe o le Keriso, o le Alo o le Atua soifua” (Mataio 16:13–16).

Ina ua uma ona faasoa atu e Peteru lana molimau, sa folafola atu e Keriso ni faamanuiaga ofoofogia ia te ia:

“Amuia oe Simona Paiona: aua e le se tagata na faaali atu ai ia te oe, a o lo’u Tama o i le lagi.

“Ou te fai atu nei au ia te oe, O Peteru oe, ou te ati ae foi la’u ekalesia i luga o lenei papa; e le mafai foi e faiototoa o seoli ona manumalo i ai.

“Ou te avatu foi ia te oe ki o le malo o le lagi: o se mea foi e te fusifusia i le lalolagi, e fusifusia foi lea i le lagi: o se mea foi e te tālā i le lalolagi, e tatalaina foi lea i le lagi” (Mataio 16:17–19).

I le taumafai e avea ma faiaoga sili, o i tatou foi o le a masani ona fai atu fesili e uunaia ai tagata aoao e faasoa mai a latou molimau, e ala ia latou upu ma i o latou lagona. O le a tatou valaaulia tagata aoao e saili ni aafiaga e atinae ai ni molimau patino i o latou olaga i aso taitasi. Ona sosoo ai lea, afai e lagona le Agaga i le siosiomaga i le potuaoga po o le aiga, o le a lagona e o tatou tagata aoao le to’alelei i le faasoaina atu o aafiaga faaleagaga ma molimau i le tasi ma le isi.

Ola i Mea e Te Aoao Atu

Sa aoao atu Iesu Keriso i isi ia faia mea na Ia faia (tagai i le 3 Nifae 27:21)—e mulimuli atu ai ia te Ia (tagai i le Mataio 4:19). Sa soifua o Ia i mea na Ia aoao mai, ma faapea ai ona Ia aoao mai e ala i faataitaiga.

Sa ia aoao mai e uiga i le auaunaga e ala i le auauna atu. Se lesona ina a mataina mo Ona soo ina ua Ia mulumuina o latou vae! “O lenei afai o au le Alii, ma le Aoao, ua ou mulumuina o outou vae, e tatau ona outou femulumuluai o outou vae.

“Aua ua ou avatu le faaaao ia te outou, e pei ona ou faia ia te outou, ia faapea lava e outou ona fai” (Ioane 13:14–15).

Sa ia aoao atu e uiga i le alofa e ala i le alofa. “O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou, ia fealofani foi outou”.

Sa ia aoao atu e uiga i le tatalo e ala i le tatalo. Ina ua uma ona faia ni tatalo na o’oo’o le patino ma matuai musuia, ia na le mafai ona tusia, na Ia fetalai mai, “Ma e pei ona sa ou tatalo faatasi ma outou ia faapea lava ona outou tatalo i la’u ekalesia. . . . Faauta o a’u o le malamalama; ua ou faatuina se faataitaiga mo outou” (3 Nifae 18:16).

U tuuina mai e Iesu Keriso se mamanu mo faiaoga uma o le talalelei o e naunau e aoao atu i Lona ala. E ui ina tatou le atoatoa e pei ona sa i ai o Ia, ae e mafai lava ona tatou taumafai ma le maelega e ola i mea tatou te aoao atu. I upu o le pese a tamaiti, e tatau i faiaoga ona mafai ona faapea atu, “Fai e pei ona ou faia; mulimuli mai ia te au!”²

Aoao Atu i le Ala a le Faaola

Ua valaaulia faiaoga uma o le talalelei ia faaaoga mataupu faavae autu e ono nei, lea e atagia mai ai le ala na aoao mai ai le Faaola:

1. Alofa ia i latou e te aoaoina.

- Saili atu i tagata taitoatasi.
- Taulai atu i manaoga o ou tagata aoao.

2. Saunia oe lava ia faaleagaga.

- Ola i mea e te aoao atu.
- Iloa punaoa o loo maua.

3. Aoao atu e ala i le Agaga.

- Fesoasoani i ou tagata aoao ia iloa le Agaga.
- Avea ma se faiaoga aoaogofie.
- Fatufatua’i se siosiomaga e aoao ai.

4. Iloaina o le talalelei faatasi.

- Faatutu ni faamoemoega maualuluga.
- Uunaia ou tagata aoao e molimau atu.
- Fai atu ni fesili anoa.
- Faalogo i ou tagata aoao.

5. Aoao atu le aoaoga faavae.

- Faaaoga tusitusiga paia.
- Faaaoga tala ma faataitaiga.
- Folafola atu faamanuiaga ma molimau atu.

6. Ia valaaulia ou tagata aoao ia faatino.

- Fesoasoani i ou tagata aoao e faataitai.
- Tulitatao ia valaaulia.

A o tatou faaaogaina nei mataupu faavae, o le a avea i tatou o ni faiaoga sili atu ona lelei, ni tagata aoao sili atu ona lelei, ni matua sili atu ona lelei, ma ni soo sili atu ona lelei o Iesu Keriso. Aua ua Ia poloaii na tatou e “aoao i le tasi” “ma le filiga,” i se auala “e mafai ona faagaeetia ai o tagata uma” (MF&F 88:77, 78, 122). Talosia ia iloa mai i totonu o i tatou, e i latou uma o e tatou te aoaoina se mea e uiga i le Matai o Faiaoga, ma ia le gata e o ese mai aafiaga [o le aoaoina] ma ni aoaoga, ae ia latou suia foi. ■

FAAMATALAGA

1. *Tala’i La’u Talalelei: O Se Taiala mo le Galuega Faafaifeautalai* (2004), 212.
2. “Do As I’m Doing,” *Children’s Songbook*, 276.



Saunia e Elder
Koichi Aoyagi
O Le Fitugafulu



FAUTUAGA FAAPEROFETA MA **Faamanuлага o le Malumalu**

Ao avea au ma se alii talavou, na asiasi atu ai i Iapani ia Elder Spencer W. Kimball (1895–1985), a o avea ma se tasi o le Korama a Aposetolo e Toasefululua, ma sa saunoa i se konafesi na ou auai. Ou te manatua pea lana fautuaga: “E tatau ona o tagata talavou i ni misiona, ma e tatau ona latou faaipoipo i le malumalu.”

Sa ou lagonaina le uunaia e le Agaga Paia ma tonu ai o le a ou auauna atu i se misiona ma faaipoipo i le malumalu, e ui lava ina sa le'i i ai se malumalu a Iapani i le taimi lena.

I le taimi lena, sa 19 o'u tausaga ma o lo'u tausaga lua lea i aaoaga i le iunivesite. Sa tetee malosi o'u matua, o e sa le o ni tagata o le Au Paia o Aso e Gata Ai i la'u faaiuga e auauna atu i se misiona. I aso uma, sa ou tatalo ai ina ia tuuina mai le la faatagaga ma faamanuiga. O le ono masina mulimuli ane, na tali mai ai le Alii i la'u tatalo.

Na fai mai o'u matua ia te a'u, “Ua tatou feagai ma faigata tautupe, ma ua le mafai ona ma toe totogia lau aoga ma le tausiga o oe. “E amata atu nei ua tatau ona e tausia oe lava ia. E le afaina foi ia ma'ua pe afai e te alu i se misiona!”

Sa ou maua mai le faamanuiga a o'u matua, o lea na ou le toe ā'oga ai, faia se misiona faakamuta i le Ekalesia, ona amata ai lea ona su'e sa'u galuega e maua ai se tupe mo se misiona talai. Faatasi ai ma le fesoasoani a le Alii, sa ou maua ai ni galuega se tolu! O aso uma lava sei vagana ai Aso Sa mo le tausaga na sosoo ai, sa ou tilivaina ai nusipepa mai le 3:00 i le vaveao seia oo i le 7:00 i le taeao, tapena ni fale mai le 9:00

Ou te molimau atu a tatou tatalo mo le taitaiga, mulimuli i perofeta soifua, ma fai le malumalu o se mea e faamuamua i o tatou olaga, o le a taitai ma faamanuia i tatou e le Tama Faalelagi.

i le taeao seia oo i le 4:00 i le afiafi, ma faigaluega o se kuka mai le 5:00 i le afiafi e oo i le 7:30 i le po. Ona sui lea o o'u lavalava ma ou galue o se faifeatalai a le itu i le po.

Ina ua 22 o'u tausaga, sa valaauna a'u i le Misiona a Matu i Sasae Mamao. E ala mai i la'u auaunaga faamisona sa ou oo ai i le olioli silisili na ou lagonaina, maua ni avanoa se tele na ou iloa ai le alofa o le Atua, ma maua ni faamanuiga se tele. Sa faamanuiaina foi lo'u aiga i le taimi o la'u auaunaga ina ua toe faaleleia luitau o mea tau tupe a o'u matua.

Mulimuli i le perofeta

Ina ua faamaeaina lau misiona, sa uunaia a'u e le Agaga e mulimuli i le vaega lona lua o le fautuaga a Peresitene Kimball ma aua nei faatuai le faaipoipo i le malumalu. I le tausaga na muamua atu, na amata fuafua ai e tagata o le Ekalesia i Iapani se malaga i le Malumalu o Sate Leki. Ona sa toe tolu masina alu le latou malaga, sa ou tatalo ma

anapogi ina ia taitaiina atu a'u i se tamaitai talavou agavaa e mafai ona ou aveina atu i le malumalu.

O se taimi puupuu mulimuli ane sa ou auai atu ai i se gaoioiga a le Ekalesia i lo'u nuu o Matsumoto. A o o'u i ai iina, sa ou feiloai ai ia Shiroko Momose, o lē sa aoga i le aoga maualuga lea sa ou aoga ai foi ina ua ou auai i le Ekalesia. Sa vave ona faamautu mai e le Agaga o ia lea sa sauniga sui mo na tuaa. O le faia o na sauniga na fesoasoani ma te lagona ai le latalata atu ia i latou. Sa ma iloaina sa faatumulia i latou i le fiafia ona o a ma'ua taumafaiga.

Na le'i leva ona ma tafafao faamasani ma Shiroko a'e ou fai loa i ai ma te faaipoipo. Sa ia faafiafaina a'u ina ua ia taliaina, ae sa ia faateia au i lana tala na sosoo mai ai.

"Ua ou matua fiafia lava e iloa o lou Alii o lo'u Alii lea", o lana tala lea. "Ina ua latou faasilasilaina mai le malaga i le Malumalu o Sate Leki, sa ou moomoo lava ou te fia alu ai. Sa tele taimi na ou tatalo ai ia fesoasoani mai le Alii ia te a'u e saili se tasi e mafai ona ou faaipoipo i ai iina. Pe a ma se tausaga ua mavae, na ou iloa ai e ala i le Agaga a o o'u tatalo, e tatau ona ou faatali mo oe ma o le a e faamalamalama mai ia te au pe a foi mai lau misiona."

O se aafiafa maoae faaleagaga lena mo i ma'ua, ma na faamalosia ai la ma'ua faaiuga e faaipoipo i le Malumalu o Sate Leki. Sa itiiti se ma tupe na i ai mo le malaga, ae ma te lei faatagaina lena mea e faavaivaia ai i ma'ua. E oo ane i le taimi lena ua ma iloa a ma faalagolago i le Alii ma tausia Ana poloaiga, e fesoasoani mai o Ia ia i ma'ua e ausia mea na semanu e le mafai ona ma faataunuina.

Sa ma ole atu i lo tatou Tama Faalelagi i le tatalo ma faia a ma'ua taumafaiga uma e saili ai le tupe na manaomia. O na taumafaiga faatasi ai ma le fesoasoani tautupe mai se tasi o uo a Shiroko, na mafai ai ona ma auai atu faatasi ma le Au Paia Iapani o e na malaga atu i le Malumalu o Sate Leki.



USIUSITAI—O SE TAIALA FAATUATUAINA

Ua uma ona tosi e se Tama Faalelagi alofa lo tatou ala ma sauniga se taiala faatuatutuaina—o le *usiutai* lea. O se iloa o le upumoni ma tali i a tatou fesili silisili e oo mai ia i tatou pe a tatou usiusitai i poloaiga a le Atua."

Thomas S. Monson, "O Le Usiusitai e Aumaia Ai Faamanuiaga," *Liahona*, Me 2013, 89.

E le mafai ona faamatalaina le olioli na ma lagonaina i le faamauina o se ulugalii e faavavau. O le a le mafai lava ona ma faagaloina lena aafiafa. O le mea na faaopoopo mai i lo ma'ua olioli o le ma sailia lea o augatupulaga e lima o o ma'ua tuaa ma sauniga o latou igoa mo galuega o le malumalu. A o ma i ai i le Aai o Sate Leki, sa ma faataunuina ai sauniga sui mo na tuaa. O le faia o na sauniga na fesoasoani ma te lagona ai le latalata atu ia i latou. Sa ma iloaina sa faatumulia i latou i le fiafia ona o a ma'ua taumafaiga.

Sa avea i ma'ua o se ulugalii fou matitiva faatoa faaipoipoina, ae sa ave le ma faamuamua i le auai atu i le malumalu, ma mulimuli ane, sa fai ma ma o atu i le Malumalu o Laie Hawaii pe a talafeagai ai ma mea tautupe.

Faamanuiaina i le Malumalu

Na saunoa le Perofeta o Iosefa Samita, "E sili atu ona tatou manaomia le malumalu nai lo se isi lava mea."¹

I le ata o le faaolataga a le Atua, o le malumalu e taua i lo tatou fiafia e faavavau ona tatou te faia ai sauniga paia ma sauniga o le faaolataga iina. Ua ta'u mai e le Bible Dictionary, o le malumalu o le nofoaga tapuai e sili ona paia i le lalolagi ma o "se nofoaga e mafai ona afio mai ai le Alii."²

Afai tatou te faamamaluina a tatou feagaiga o le malumalu ma o mai i le malumalu "ma ni loto maualalalo, i le mama, ma le mamalu, ma le amio sa'o,"³ o le a tatou lagonaina le Agaga Paia ma maua le malamalama ma le poto atili. Pe a tatou tuaa le malumalu, o le a tatou tuaa ua faaaauupegaina i le mana mai le Alii ma Lona suafa i luga o i tatou, ma Lona mamalu e siomia ai i tatou, ma Ana au agelu e leoleo i tatou (tagai i le MF&F 109:13, 22).

Ina ua ma toe foi atu i Iapani i le ma'ea ai o le ma faaipoipoga, na faataunu folafolaga a le Alii i lo'u olaga a o ou sueina se galuega tumau.

E Faataunu e le Alii Ana Folafolaga

Sa na o sa'u galuega faavaitaimi na i ai i le taimi na fanau ai le ma tamaititi muamua. Sa ma matuai fiafia lava, ae na ou iloaina o le a le mafai ona ou tausia lo matou aiga lea na faasolo ina toatele e aunoa ma se galuega tumau. Sa amata ona ma tatalo faatauanau mo se fesoasoani a le lagi.

Ae ou te le'i alu atu i la'u misiona, sa ou fia faigaluega ai i se galuega i se atunu i fafo. Ae ina ia faafaigaluega e se kamupani o matata eseese, o le mea masani e tatau ona avea se tagata talosaga ma se tagata faauu mai se iunivesite



ma na umia ni tusipasi faapitoa. Sa le'i maea la'u aoga i le iunivesite ma sa leai ni o'u tusipasi, ae a o ma tatalo, sa ma lagonaina o le a faamanuia i ma'ua e le Alii ma saunia se galuega mo a'u.

Sa ou filifili e su'e i suega a tagata talosaga mo ni galuega a nisi o kamupani o matata eseese e ui lava i le le lava o a'u aoaoga. O kamupani muamua e lua sa le'i taliaina ai a'u, ae na i ai so'u aafiaga mataina ina ua ou talosaga atu i le kamupani lona tolu.

I Iapani i lena vaitaimi, sa toaititi lava ni tagata o le Eklesia sa i ai, ma o le toatele lava o tagata sa faailoga tagata i le Eklesia. Ina ua faatalanoaina a'u e ni sui se toatolu o le kamupani lona tolu, sa latou tilotilo i le talaga o o'u tomai ma tulaga faaleaoaoga, ma iloa ai o au o se tagata o le Au Paia o Aso e Gata Ai. Sa amata ona latou fesiliglia a'u e uiga i le Eklesia, ma talosagaina mai ni tali auiili. I lo'u faatoa foi mai ai i le misiona, sa leai se faafitauli i le talanoa atu e uiga i le Eklesia toefuataiina a Iesu Keriso.

Mo se umi na le ititi ifo ma le 40 minute, sa ou talanoa ai e uiga i le talalelei ma tuuina atu la'u molimau i le soi-fuaga o Iesu Keriso, le Liliuese, le Uluai Faaaliga a Iosefa

Samita, le Tusi a Mamona, le Toefuataiga o le Eklesia moni a Iesu Keriso, ma aoaoga a le Eklesia.

Sa leai se tasi o le au faifaatalanoaga na taofia a'u a o ou tautala. I ni nai aso mulimuli ane na ofo mai ai ia te au e le kamupani se galuega i se totogi na tulaga ese le maualuga. Mulimuli ane, ina ua ou fesili atu i lo'u pule pe aisea na latou faafaigaluegaina ai a'u, sa ia tali mai, "I le taimi o lou faatalanoaga sa ou mauaina se faamautinoaga sa e mafau-fau toto'a, faamaoni, ma faatuatuaina, ma o oe o se tagata o le a galuega i se auala faapena mo la matou kamupani."

Ou te molimau atu e faataunuina e le Alii Ana folafolaga. I le taimi o lo'u faatalanoaga sa lagona le mana ma le Agaga o le Alii ia te au, e pei lava ona Ia folafola mai ia i latou o e auai atu i le malumalu ma faamamalu a latou feagaiga o le malumalu. Sa ou lagonaina foi Lona Agaga ia te au a o ou galue ai mo le kamupani, lea sa faamanuiaina au e fai ai ni saofaga taua se tele.

Ua Oo Mai Se Malumalu i Iapani

I se konafesi faalisone i Tokyo i le 1975, na fofogaina ai e Peresitene Kimball le fausiaina o le Malumalu o Tokyo Iapani. O le lofituina o le Au Paia Iapani i lagona ootia, na tau fai pati faatasi ai e faaali ai lo latou olioli ma le agaga faafetai.

Na faamaeaina le Malumalu o Tokyo Iapani i le 1980. I le taimi o le fare tatala ma sauniga o le faapaiaga, sa faamanuiaina le Au Paia i aafiaga faaleagaga matagofie ma le olioli tele. O na aafiaga na faaauau pea i le ma'eai o le faapaiaga o le malumalu a'o amata ona maua e le Au Paia o latou sauniga o le malumalu ma fai ma sui mo o latou tuaa ua maliliu.

I le taimi nei, ua toeitiiti atoa le 45 tausaga talu ona ma faaipoipo ma Shiroko, o la'u filifili e mulimuli i fautuaga faaperofeta o loo faaauau pea ona faamanuiaina ai o matou olaga ma olaga o le ma fanau. Ua matou fausia se fare matagofie i le ala a le Alii—ua faavaeina i luga o le talalelei a Iesu Keriso, e aofia ai feagaiga o le malumalu.

Ou te molimau atu pe a tatou tatalo mo le taitaiga, mulimuli i perofeta soifua, ma fai le malumalu o se mea e faamuamua i o tatou olaga, o le a taitai ma faamanuia i tatou e le Tama Faalelagi. ■

FAAMATALAGA

1. *Aoaoga a Peresitene o le Eklesia: Iosefa Samita* (2007), 506.

2. *Bible Dictionary, "Temple."*

3. Spencer W. Kimball, mai le tatalo o le faapaiaga o le Malumalu o Tokyo Iapani, i le *2013 Church Almanac* (2013), 297.

O Ma'ua ma Flora

O se Paaga Tutusa i le Galuega a le Alii



*Agavale: O Flora Amussen
ma Ezra Taft Benson i lo la'ua
soifua talavou. Taumatau:
Flora ma Ezra o loo fiafia i
se aso ma o la alo e toaono.*





*A o tatou aoao e uiga i le paaga
lagolagosua, ma le alofa na fiafia
ai Peresitene Ezra Taft Benson
ma lona faletua o Flora, tatou
te maua se malamalama loloto
atili e uiga i lana auaunaga.*

Saunia e Aaron L. West

Tautua o Lomiga a le Ekalesia

Onisi taimi, pe afai tatou te faalogo ma le totoa, e mafai lava ona tutusa lava le mamana o se fasifuaite puupuu ma se lauga. Na faapena le tulaga i le aso 11 o Novema, 1985. O le fasifuaiupu o le “O Ma’ua ma Flora.”

Na faitauina e Peresitene Ezra Taft Benson (1899–1994) na upu o se vaega o se faamatalaga na tapenaina mo tagata faasalalau o talafou i le aso ina ua uma ona vaetofia o ia e avea ma Peresitene o Le Ekalesia a Iesu Keriso o le Au Paia o Aso e Gata Ai. Na maliu Peresitene Spencer W. Kimball (1895–1985) i aso e ono na muamua atu, ma tuua ai Peresitene Benson o le Aposetolo sinia.

Sa i ai faatasi Peresitene Benson ma lona faletua, o Flora, i le taimi na la mauaina ai le tala i le maliu o Peresitene Kimball, ma o le taimi lava lena na la “tootutuli ifo ai” i le tatalo.¹ Ia, o le parakalafa muamua o le faamatalaga o le a lolomiina i le lalolagi atoa, na tuu ai foi e Peresitene Benson o ia lava i talaane o Flora. Na saunoa o ia: “O se aso lenei ou te le’i faamoemoeina. Sa ma tatalo pea lava pea ma lo’u toalua, o Flora, ina ia tulu’i pea aso o Peresitene Kimball i lenei lalolagi ma ia faia se isi vavega mo ia. Ae o lenei la ua fetalai le Alii, o le a ma faia le mea sili, i lalo o lana taitaiga taiala, e faaalulu ai i luma le galuega i le lalolagi.”²

I le mavae ai o le 59 tausaga talu ona faaipoipo, o le fasifuaite “o ma’ua ma Flora” sa o se faaupuga na masani ona saunoa ai Peresitene Benson. Ma ina ua ia saunoa, “o le a ma faia le mea sili, i lalo o lana taitaiga taiala, e faaalualu ai i luma le galuega” na te lei faaaogaina le upu *matou* e faatatau ia te ia ma le isi au Pulega Aoao, e ui e mautinoa lava o le a toe faatasia o ia ma i latou. O lea la ua fetalai le Alii, o le a ma faia le mea sili ma te mafafia, i lalo o lana taitaiga taiala, e faaalualu i luma le galuega i le lalolagi.” I lenei faamatalaga, o le perofeta, tagatavaai, ma talifaaliga sa saunoa i le lotogatasi ma lona faletua i le galuega a le Alii.

Ina ia faitau i le auala na mama-nuina ai e le olaga faafafaatoaga uiga o Ezra Taft Benson, tagai i le Aoaoga a Peresitene o le Ekalesia: Ezra Taft Benson, itulau 2–5.



Faasolo i le itu taumatau mai luga: O Ezra Taft Benson ma isi faifaa-toaga; O Ezra, Iona Iua mai le agavale, ma Iona tina ma nai ona tei; O tuua o Ezra, o George T. Benson ma Sarah Dunkley Benson.

Ia ae aisea o le a ia le ta'uaina ai? Na aufaatasi i la'ua ma Flora i le galuega a le Alii mo le toeitiiti onosefulu tausaga. E ui o le tele o vaega o o laua soifuaga na suia i le aluga o tausaga, ae sa avea le la faigapaaga ma se faapogai faifai pea o le malosi mo i laua uma.

O le tausaga lenei ua aofia ai i le kosi o sue-suega mo tuafafine o le Aualofa ma e umia le Perisitene Mekisateko se avanoa e aoao mai ai ia Peresitene Ezra Taft Benson. A o e duesue i ana aoaoga, atonu o le a faaosofia oe e aoao e uiga i lona tagata. O lenei tusiga ua tuuina atu ai ni nai vaaiga i lona soifuaga ma [lana] auaunaga, e ala i le vaaiga a lona faletua, o Flora Amussen Benson. O mataupu ma numera o itulau uma i le tusiga ua faatatau atu i le Aoaoga a Peresitene o le Ekalesia: Ezra Taft Benson.

"Ou te Fia Faaipoipo i se Faifaatoaga"

I le tautoulu o le 1920, na malaga atu ai Ezra Taft Benson a o 21 tausaga o lona matua, mai le faatoaga a lona aiga i Whitney, Idaho, ISA, i Logan, Iuta, lea sa lesitala ai i le Kolisi Faafaatoaga a Iuta (lea ua ta'u nei o le Iunivesite a Iuta). I se tasi aso a o latou i ai ma nisi o ana uo i le lotoa o le aoga, sa tosina atu lana vaai i se tasi o tamaitai talavou. Sa ia faamatalaina mulimuli ane:

"Sa matou i fafo e latalata i fale o povi ae pasi ane le taavale laitiiti a se tamaitai talavou—aualei ma lalelei tele—e alu atu i le falegaosi susu e aumai se susu. A o talotalo atu tama ia te ia, sa faapea foi ona talotalo mai i ai o ia. Sa ou fai atu, 'O ai le teine le la?' Sa latou fai mai 'O Flora Amussen.'

"Sa ou fai atu ia i latou, 'Tou te iloa, na ou maua nei lava le musumusuga, o le a ou faaipoipo ia te ia.'"

Na taliē uo a Ezra i lana faamatalaga. Sa latou fai mai, "E lauiloa tele o ia mo se tama faifaatoaga." O lana tali atu? "O le mea atoa lena e manaia ai."³

Sa ese le sese o uo a Ezra i lo latou faaminoina o Flora Amussen. Talu mai lona olaga talavou, sa ia vaaia ai se mea faapitoa i alii o e sa galueaiina le laueele. I se tasi aso ina ua fai atu lona tina o Barbara ia te ia, "e le mafai ona ia maua le tikeri o le mamalu aupito maualuga e aunoa ma le faaipoipoga faaselesitila, sa tali atu Flora, atonu ma le mama o lona mafaufau, ae faapea foi ma sina vaaiga mamaao, 'Ia ou te fia faaipoipo la i se alii e mativa i mea o le lalolagi, ae oa i le faaleagaga, ina ia mafai ona ma maua faatasi ni mea.' Ina ua uma se va, sa ia faaopoopo mai, 'Ou te fia faaipoipo i se faifaatoaga.'⁴

Sa feiloi mulimuli ane Flora ma Ezra i le 1920, ma sa le'i umi ae avea le la faauoga ma se faamasaniga tumau. Ia Ezra Taft Benson, na maua ai e Flora se alii talavou o lē na amata faaputuina ni oa faaleagaga sa ia matuai faatauina. Ma e pei ona sa ia faamoemoeina ai, o a'a o lona malosi faaleagaga sa sosolo maualalo i le eleele o le faatoaga a lona aiga.

Galulue Faatasi e Faamuamua le Atua

E fetau lava le amata vavalalata o le mafutaga a Flora ma Ezra i le tasi ma le isi, ae la iloaina o le a la valavala mo le lua tausaga. Na maua e Ezra se valaauga e auaua atu i le Misisona a Peretania. Sa fiafia i la'ua ma Flora i lona avanoa e auaua atu ai, ma sa la "talanoa e

uiga i le la mafutaga. Sa la mananao e faaauau pea le la faigauo, ae sa la iloaina foi le manaomia ona avea o Ezra ma se faifeautalai tuuto. ‘Ae ou te le’i aluese atu, sa ma filifili ma Flora o le a faatasi lava i le masina ona ma fetusia’i, o lana saunoaga lea. ‘Sa ma filifili foi o a ma tusi o ni tusi o faamalosiauga, talitonuga ma tala fou. O le mea tonu lava lena na ma faia’’⁵

O le taulimaina o le valaauga o le misiona i le auala lenei, na laua faaalia ai se upumoni o le a aoao atu e Ezra i le Au Paia i le tele o tausaga mulimuli ane: “Pe a tatou faamuamua le Atua, o le a taatitia isi mea uma i o latou tulaga e tatau ai, pe aveesea foi mai o tatou olaga. O lo tatou alolofa i le Alii o le a pulea mea o loo manaomia mai lo tatou alofa, o mea o loo manaomia mai ai o tatou taimi, o mea tatou te fafia i ai o loo tuliloaina, ma le faatulagaga o a tatou mea e faamuamua”⁶

A o latalata atu Ezra i le faamaeaina o lana misiona, sa la tulimatai atu ma Flora i le toe vaai o le tasi i le isi. Ae o Flora “na sili atu ni mea na ia faia nai lo le na o le tulimatai atu i le vave faaaluina o le taimi faatasi ma ia. Sa tulimata’i moni atu o ia—i le lumanai ma gafatia o [Ezra]. . . . Sa fafia o ia i le manao moni o Ezra e faamautu i le faatoaga a le aiga i Whitney, Idaho. Ae peitai, sa ia lagonaina e tatau ona faauma muamua ana aoaoga.”⁷ I ana taumafaiga e fesoasoani ia Ezra ia faia lea mea, sa aufaatasi ai ma ia i le faamuamuaina o le Atua. E lei atoa se tausaga talu ona foi mai o ia mai lana misiona, ae ona faateia Ezra i le ta’uina atu o le a alu foi o ia e auauina atu i se misiona. Ina ia aoao atili e uiga i lana faaiuga, tagai i le itulau e 10–11.

O Se Taimane i le Lauleaga

Sa faamauina Flora ma Ezra i le Malumalu o Sate Leki i le aso 10 o Setema, 1926. E ui lava i le lelei masani o Ezra ma lona faamanuiaina i le aoga, “ae sa faaauau pea ona fesiligia e tagata le faaiuga a Flora. Sa latou le malamalamā pe aisea o le a manao ai se tagata ua tele



Ina ia faitau i tala o le auauanaga a Ezra Taft Benson o se faifeautalai faamisiona, tagai i le itulau e 9–10 ma le 103–4 i le tusi lesona. Ina ia faitau i lana tautua i le maea ai o le—Taua Lona II o le Lalolagi a Europa a’o avea ma se apostolo, tagai i itulau 17–21, 54–55, 69–70, 264, ma le 268.



Luga: Ezra Taft Benson a’o talavou, a o le’i mauaina se valaauga faamisiona. Luga ma le taumatau: A o avea ma se Apostolo sa fesoasoani e auauina atu i tagata i le ma’ea ai o le Taua Lona II o le Lalolagi i Europa.

ni mea na ona ausia, mauoa ma laulioa, e nofo i se tama faifaatoaga. Ae sa faaauau pea ona ia fai atu, na ia ‘manao lava e faaipoipo i se faifaatoaga.’ Na fai mai o ia, o Ezra ‘e magafagafa, atamai, ma mausali.’ Ma, sa ia matauina, ‘Sa agalelei o ia i ona matua, ma sa ou iloa afai sa ia faaaloalo ia i la’ua, o le a ia faaaloalo foi ia te au.’ Sa ia iloaina o [Ezra] o ‘se taimane i le lauleaga’, ma sa ia fai mai, ‘o le a ou faia mea uma e mafai ona ou faia e fesoasoani ai ia te ia ia laulioa ma lagonaina mo le lelei, o le a le gata i lenei pitonuu laitiiti, ae mo le lalolagi atoa ia iloa o ia.’⁸

Faatasi ai ma lenei vaiga mamao e uiga i gafatia o lana tane, sa alu ai ma le fafia Flora po o fea lava na manaomia la te o i ai mo le tausiga o le la fanau ma auauina atu i le Ekallesia, lo latou afioaga, ma lo latou atunuu. O lenei mea na manaomia ai lona ola i se olaga faatauvaa nai lo o le olaga sa ia masani ai, ae sa ia taliaina atoatoa le lui.

Mo se faataitaiga, i le aso o le la faaipoipoga, “na pau lava le ‘aiga . . . o se malu



Sa auauna atu Elder Ezra Taft Benson o se failautusi o faatoaga o le lunaite Setete mo le valu tausaga a o auauna atu foi o ia o se Apostolo. Ina ia faitau i le auala na ia faataunuina ai nei tiutetauave, tagai i itulau e 21–25 ma le 47–48.



Luga: Peresitene Benson faatasi ai ma le Au Paia. Agavale ma luga: Auauna atu o se failautusi o faatoaga a le lunaite Setete.

taeao mo aiga ma uo. Ina ua uma le malu taeao, sa o ese atu vave loa le ulugalii fou i le la taavale pikiapu o le ituaiga o le Ford T mo Ames, Iowa,” lea o le a su’e ai e Ezra se tikeri o le matuaofaiva i mea tau tamaoaiga faafaa-toaga. “I le ala, sa la faaaluina ni po se valu i totonu o se faleie tutulu. Ina ua la taunu atu i Ames, sa la nonofo i se potumautotogi e tasi le pitonuu e mamao ai mai le lotoa o le kolisi. Sa laitiiti le potu, ma sa nonofo faatasi ai le au Benson ma se aiga toatele o mogamoga, ae na fai mai Ezra ‘sa lei umi ae foliga mai o le potu laitiiti aupito sili ona matagofie e mafai ona e vaaifaalemafaufau i ai.’”⁹

A o faasolosolo ina avea atili Ezra ma se “taimane” ae ua faaititia le “lauleaga,” na oo ina faateleina foi lona aafia i auaunaga i fafo atu o le aiga. Ae sa fiafia o ia e avea ma se avā ma se tina, ma sa ia faailoa atu le agaga faafetai i le lelei o lana tane ma mo lona tuuto i le aiga. O lenei mea na oo ai i se faagasologa faale-leia atili mo Flora foi ia. Pe a malaga [Ezra], sa tauivi o ia [Flora] i nisi taimi ma le tuuatoatasi ma le lotovaivai. Ina ia aoao atili i le popofou



o le faaipoipoga a Flora ma Ezra ma le tulaga faamātua, tagai i itulau e 12–15.

O Valaau e Lua i le Telefoni na Suia ai Olaga

I le aso 27 o Iulai, 1943, sa maua ai e Flora se valaau mai lana tane. Sa i ai o ia i le Aai o Sate Leki, Iuta, sa sauni e toe foi mai mai se malaga faapisinisi ma le la atalii o Reed. Sa nofo [Flora] i lo latou fale na latalata i Uosigitone, D.C., e tusa ma le 2,000 maila (3,200 km) le mamao. Ina ua mavae se po lemamoe ma na tumu i tatalo ma loimata, sa telefoni mai [Ezra] e faailoa atu ia [Flora] o le aso na muamua atu na valaauna ai o ia e auauna atu o se sui o le Korama a Apostolo e Toasefululua.

Sa le’i faateia Flora i le talafou. Sa “ia maua se uunaiga malosi o le a tupu se mea sili ona taua i le malaga a [lona toalua].”¹⁰ Sa ia faailoa atu lona talitonu ia Ezra, ma o ana upu sa i ai se aafiaga toafimalie ia te ia. Na ta’ua e [Ezra] mulimuli ane: “Sa faalototeleina le talanoa atu ia te ia. Sa ia faaalia i taimi uma se faatuatua faateleina ia te a’u nai lo a’u ia te a’u lava ia.”¹¹

E ui lava ina sa talitonu Flora i lona toalua, ae sa ia iloaina e le mafai ona ia faataunuina na o ia lona valaauga—sa ia manaomia le lagolagosua a lona aiga ma le malosiaga mai le lagi. I se tasi o konafesi aoao, na faaalia ai i se savali taumusumusu le alofa o Flora mo lona toalua ma lona malamalamā i le faalagolago a lona toalua i le Alii (tagai i itulau e 48–49).

Na maua e Flora se isi valaau na suia ai le olaga mai lona toalua i le aso 24 o Novema, 1952. O le taimi lea sa asiiasi atu ai o ia i le eria i Uosigitone, D.C., ae sa faamuli o ia i lo latou fale i le Aai o Sate Leki. O Dwight D. Eisenhower, o lē o le a le toe umi ona amatalia lea o lana tautua o se peresitene o le Iunaite Setete, na faatoa uma ona ia talosagaina Elder Benson e avea ma lana failautusi o faatoaga, o se tulaga maualuga o le a manaomia ai se osigataulaga tele ma le tuuto atoatoa. Sa talia e Elder Benson le tofiga, ona sa fautuaina ai

e le Peresitene o le Ekalesia, o Tavita O. MaKei (1873–1970).

Ina ua ta'u atu e Elder Benson ia Flora ua ofo atu e le Peresitene ua Filifilia o Eisenhower se tofiga ia te ia ma ua ia taliaina, sa tali mai o ia, “Na ou iloaina lava o le a ia [ofofina atu le tofiga]. Ma na ou iloaina foi o le a e taliaina.” Sa ia faailoa atu o le a faigata mo le aiga ae na faaopoopo atu, “E foliga mai o le finagalo lea o le Atua.”¹²

Sa auauna atu Elder Benson o se failautusi o faatoaga mo le valutausaga. I lena taimi, na onosaia ai e le aiga vaitaimi o le nonofo valavalava, ma na tatau foi ona onosaia e Elder Benson ia faitioga ma le viia lea na masani ona o mai faatasi ma auaunaga lautele. Na maua e le au Benson ni avanoa maoae. Mo se faataitaiga, na i ai se taimi na ave ai e Elder Benson ia Flora ma o la alo teine o Beverly ma Bonnie i se malaga e fa vaiaso, lea sa ia galue ai e faatulaga ni sootaga o fefaatauaiga ma ni atunuu eseese e 12 (tagai i itulau 181–82). O se valaaulia mai se tagata faasalalau talafou na taitai atu ai i se aafiaga faafaifeatalai tulaga ese mo le aiga (tagai itulau 24).

O Meafaigaluega Tutusa i Aao o le Alii

E pei o Peresitene uma o le Ekalesia, sa muai faauuina Ezra Taft Benson mo lona valaauga. Ae ana tuu e fai na o ia, e le mafai ona ia faataunuina lena muaifaaugia pe auauna atu ma se malosiaga faapena. E mautinoa lava e leai se isi tagata na tele lona musuiaina o ia e pei ona sa faia e Flora. I le Ekalesia ma i lo latou aiga, sa la'ua galulue



vaavaaluua ai o ni meafaigaluega mamana i aao o le Alii.

E pei lava ona sa tootutuli faatasi Peresitene ma Tuafafine Benson ina ua o la'ua silafiaina o le a pulefaamalumalu o ia i le Ekalesia, sa faapena foi ona la galulue faatasi e “faaalualu i luma le galuega i le lalolagi.”¹³ E pei ona sa ia faamoemoeina a o talavou, sa la maua—faatasi mea na la mananao i ai.¹⁴

Mai le pulelaa, sa apoapoi atu ai Peresitene Benson i le Au Paia o Aso e Gata A e faalilofia le lalolagi ma o latou olaga i le Tusi a Mamona (tagai i le mataupu 9–10). I le fale, e fatau atu e Flora le Tusi a Mamona ia te ia i aso uma, ona la talanoaina lea o mea na la'ua fatauina.¹⁵ Mai le pulelaa, na uunaia ai e Peresitene Benson le Au Paia ia auauna atu ma tapuai e le aunoa i le malumalu (tagai i le mataupu e 13). Sa auai atu Flora ma Ezra Benson, na o i la'ua lava i le malumalu i taeao uma o Aso Faraile i taimi na mafai ai ona la o atu.¹⁶ Mai le pulelaa, na lapatai mai ai Peresitene Benson e uiga i le agasala o le faamaualuga ma “viiga a le lalolagi.”¹⁷

Ae e ui lava ina sa faamanuiaina Flora i le fesoasoani lea i le “lalolagi atoa ia iloa o ia,”¹⁸ ae sa faamalieina faatasi i la'ua i le viiga leleo a le lagi.¹⁹

E fatau selau saunoaga na fofogaina e Peresitene Ezra Taft Benson a o avea ma se Aposetolo ma Peresitene o le Ekalesia. E faigata ona vaai faalemafaufau i soo se tasi o na saunoaga e aunoa ma le faatosinaga a lena saunoaga e fa upu, na ia fofogaina i le aso 11 o Novema, 1985: “O ma'ua ma Flora.” ■

FAAMATALAGA

- | | | | | |
|--|---|--|---|--|
| 1. Sheri L. Dew, <i>Ezra Taft Benson: A Biography</i> (1987), 127. | 4. Dew, <i>Ezra Taft Benson</i> , 74–75. | 10. Dew, <i>Ezra Taft Benson</i> , 176. | President of the Church,” 5. | 16. Tagai i le Dew, <i>Ezra Taft Benson</i> , 511. |
| 2. Ezra Taft Benson, i le Don L. Searle, “President Ezra Taft Benson Ordained Thirteenth President of the Church,” <i>Ensign</i> , Dec. 1985, 5. | 5. Aoaoga: <i>Ezra Taft Benson</i> 8. | 11. Ezra Taft Benson, i le Aoaoga: <i>Ezra Taft Benson</i> , 16. | 14. Tagai Flora Amussen Benson, i le Dew, <i>Ezra Taft Benson</i> , 74–75. | 17. Aoaoga: <i>Ezra Taft Benson</i> 229. |
| 3. Aoaoga a Peresitene o le Ekalesia: <i>Ezra Taft Benson</i> (2014), 7–8. | 6. Aoaoga: <i>Ezra Taft Benson</i> 40. | 12. Flora Amussen Benson, i le Aoaoga: <i>Ezra Taft Benson</i> , 23. | 15. Tagai i le Derin Head Rodriguez, “Flora Amussen Benson: Handmaiden of the Lord, Helpmeet of a Prophet, Mother in Zion,” <i>Ensign</i> , Ordained Thirteenth | 18. Aoaoga: <i>Ezra Taft Benson</i> 11–12. |
| | 7. Aoaoga: <i>Ezra Taft Benson</i> 10. | 13. Ezra Taft Benson, i le Searle, “President Ezra Taft Benson” | 19. Aoaoga: <i>Ezra Taft Benson</i> 229. | |
| | 8. Aoaoga: <i>Ezra Taft Benson</i> 11–12. | 14. Ezra Taft Benson, i le Searle, “President Ezra Taft Benson” | | |
| | 9. Aoaoga: <i>Ezra Taft Benson</i> 12. | 15. Ezra Taft Benson, i le Searle, “President Ezra Taft Benson” | | |
| | | 16. Ezra Taft Benson, i le Searle, “President Ezra Taft Benson” | | |

AUAUNAGA NA TUUINA MAI O SE TAUI O AUAUNAGA NA TUUINA ATU

Ao avea a'u ma se tagata aoga tausaga muamua i le kolisi, sa masani ona ma o ma la'u uo sa ma potu faatasi e asiiasi atu i le toeaina matua o lona aiga, o lē sa ma valauina ma le alofa ia Toeaina Sio. Sa nofo na o ia ma sa tuuatoatasi, o lea sa ma taumafai ai e asiiasi atu ia te ia i ni taimi se tele na mafai ai. I le taimi o a matou asiasiga na te faamatala mai ia i ma'ua ni tala i le taimi sa nofo ai

i Mekisiko ma nisi o aai e lata i tuaoi o Arisona, e aofia ai Nogales.

Ina ua toe malaga la'u uo mo se taimi le tumau i lona aiga, sa ou lagona le musuia o a'u e faaaauau pea ona asiiasi atu ia Toeaina Sio. Sa oo ina avea o ia ma se uo mamae, ma sa ou asiiasi atu ia te ia seja oo ina maliu i se tausaga ma le afa mulimuli ane. Sa ou faanoanoa ina ua maliu la'u uo ae sa ou faafetai mo le taimi taua na ma faaaluina faatasi.

O le sefulu o tausaga talu ona maliu Toeaina Sio, sa ou faitau ai i le api talaaga a le tina o lo'u tina-matua. Na ta'u mai i le api talaaga e uiga i le leai o se tupe na tuua e lona toalua mo ia, \$30 na tatau ona totogi mo le fale, ma ni tamaiti se toaiva e fafaga.

Ona ia tusia lea: "I Bisbee [Arisona] sa ese le lelei o tagata ia i matou. E tusa pe na matou nonofo mamao mai

Sa nofo toatasi ma tuuatoatasi ia Toeaina Sio. O lea sa ma taumafai ai ma la'u uo na ma potu faatasi e asiiasi atu ia te ia i ni taimi se tele na mafai ai.



MATA E MAFAI ONA TA'UTA'U ATU A'U [AGASALA]?

le taulaga i saute o Bisbee, sa latou momoli mai i matou i le fale [mai le lotu]. O Tuagane Joseph Kleinman, o lē sa nofo i Mekisiko, sa tele ni taimi sa ia momoliina mai ai i matou i le fale, ae na le gata i lena, sa ave foi i matou uma e [lona aiga] matou te faiaiga i le afiafi. Sa latou gaseseina se falai lapiti ma ni kuka eseese, ia na matou matuai fiafia ai. Sa siitia atu i latou i Nogales . . . ma sa latou tuua a latou lapiti mo i matou, nai lapiti papae aulelei, ma na matou maua ai ni meaai na mafai ona matou aai ai i lena taimi."

A o ou faitauina lenei tusiga, sa ou iloaina o Joseph Kleinman lea na fesoasoani i le tina o lo'u tinamatua o Toeaina Sio lea! Sa ou lagonaina le musumusu mai o le Agaga e faapea sa musuia a'u e faaaauau ona asiiasi atu ia Toeaina Sio e avea ma se faafetai faatauvaa mo le agalelei sa ia faaalia i le tina o lo'u tinamatua ma lona aiga.

Sa ou fiafia i le avea ma se vaega o se tala o le alofa ma le auauna atu lea na toe tuuina atu. Ou te iloa ua silafia e le Alii Ana fanau. Afai tatou te faa- logo i uunaiga a le Agaga Paia, e mafai ona tatou faamanuiaina olaga o isi ma faapea ai foi ona toe faamanuiaina ai i tatou lava. ■

Krisi Church, Summers, Iuta, ISA

A o ou saofai e faasaga atu i se tasi o le au peresitene o le siteki, sa amata ona tatavale lo'u fatu. Sa ou lagona le popole talu lava ona valaau mai le failautusi o le siteki e faatulaga se taimi [e talanoa ai ma se tasi o le au peresitene o le siteki]. *Mata o le a ia iloa sa ou le agavaa e galue?*

Sa tonu ia te a'u o nisi o agasala o le a faigofie atu ona avatu i le pa faamasino a le Atua nai lo o le faaali atu iinei i le lalolagi, ma le mafaufau o le a manatu faapito le faailoa atu o mea o le a aumaia ai le tiga po o le maasiasi i lo'u toalua. E sili ai lo'u faatoilaloina na o a'u lava ma nofo ai ma le avega. Na pau lava le lave, ona sa le mafai ona ou faatoilaloina na o a'u lava.

Sa ou saofai ai iina a o tuuina mai e le fesoasoani o le peresitene o le siteki se valaauga ou te galue ai. Sa ia fesili mai, "Uso, pe e te taliaina lenei valaauga?" Oka so'u manao e alaga atu, "Ioe!" Ae peitai, na toetoe lava a le mafaufauina, sa ou lagona lo'u faapea atu, "Ou te le taliaina; e manao-mia lou faaleleia o nisi o agasala."

Sa oo mai ia te a'u i lea-taimi e tasi le atuatuvale ma le matuu atu [o se avega] a'o ou tautau atu tulaga atoa o le agasala. Sa ia fesili mai pe ua ma talanoa ma lo'u epikopo. "Leai." Lo'u toalua? "Leai." Sa ia faatalofa mai, ataata, ma fai mai ua fiafia i lo'u ta'uta'u atu o le agasala, ma faatonu a'u e talanoa atu i le epikopo ma lo'u toalua.

Sa ou usiusitai, ma ta'u atu muamua i lo'u toalua—na faapea ona matuu ese ai le vaega na sili ona ou fefe i ai. Sa alofa pea o ia ia te a'u! Ioe, sa le fiafia, ma o le a tatau ona ma galulue i nisi o mea, ae sa alofa ma uunaia au e vaai le epikopo.

Ina ua ou alu e vaai le epikopo, sa vave ona ia taliaina a'u i lona ofisa. Ma le faigata tele, sa ou taumafai ai e faamalamalama atu le pogai na ou i ai iina. Ina ua mavae le nanaina o au agasala mo se taimi umi, sa ou tau le iloa po o fea e amata ai. Na ia fautua- ina ma le alofa au e ta'u atu mea uma. Sa ou faamatala atu i ai le tulaga atoa o a'u agasala ma talosaga mo se taimi e ta'u uma atu ai a'u agasala na fai. Sa vave ona ia malie i ai.

Sa le'i uma lava ona ta'uta'u atua [a'u agasala], ae ua ou lagonaina le aveese atu o se avega mamafa mai o'u tauau. Na iu foi ina ou lagonaina se faafouina o le faamoemoe o le saolotoga, mai lenei avega.

Sa ou faaaluina vaiaso na sosoo ai, i le tatalo, faitauina o tusitusiga paia, ma le faia o la'u lisi e tuuina atu i lo'u epikopo ma lo'u Tama Faalelagi. O le mea muamua, sa faailoa atu la'u lisi i le Tama Faalelagi, faatasi ai ma se loto momomo ma se agaga salamo, e faailoa atu ai ia te Ia, ua ou salamo ma na ou manao faamaoni e sui. Sa ou faatulagaina se isi taimi atofaina ma le epikopo ma faasoa atu i ai lau lisi atoa. Sa le faauu, ee, pe otegia a'u; nai lo lena, na ia tuuina mai ia te au se opo tele lava. Sa ia faailoa mai ia te a'u lona alofa ma le alofa o le Alii, ma ta'u mai ia te a'u, sa ou i ai i le ala o le salamo moni. Na ou iloaina ua moni.

O le ta'uta'u atu o a'u agasala, lea sa avea muamua ma o'u popolega sili lava, na avea ma se tasi o aafia sili ona matagofie o lo'u olaga. O le laasaga muamua lea mo a'u e mala- malama moni ai i le meaalofa ma le mana faamalolo o le Togiola a Iesu Keriso. ■

Taofia le igoa



SA MA MULIMULI I LE ALA

I le eria mulimuli o la'u misiona, sa ma galulue ai ma la'u soa i ni afioaga se lua o loo i totonu o le setete o São Paulo, Pasila. I le va o afioaga e lua sa i ai se auala alo e ui atu i le togavao ma te le'i ui ai lava ona sa ma manatu e lamatia ma ailoga matou te fetaui ai ma se tagata iina.

I se tasi aoauli a o ma latalata atu i le auala alo, sa uunaia a'u e le Agaga Paia, ma ta'u mai e tatau ona ma o atu i le togavao. Sa ou tilotilo atu ia Elder Andrade ma ta'u atu ia te ia e uiga i le uunaiga na faatoa ou maua. Na ia fai mai sa ia lagonaina foi lea lava mea e tasi.

E lei leva ona ma amata savavali atu i le alasopo ma te le'i masani ai, ae ma vaaia se tamaitai o savali mai ia i ma'uua. Sa vaapiapi le auala, ma a o matou fepasia'i, sa ma matauina na tagi o ia.

Ina ua ea a'e o ia i luga, sa ia valaaulia i ma'uua e mulimuli atu ia te ia i lona fale, lea sa ma feiloai ai i lana tane. O le taimi lava lena na amata ai ona ma aoaoina le ulugalii na fialoa le talalelei. Ina ua mavae ni nai vaiaso sa ma valaauliaina i laua ina ia papatisoina. Sa ma fiafia ina ua la vave taliaina, ona ua atoa le tausaga talu ona faia le papatisoga mulimuli a le uarota. Sa ma faafetai ona sa ma faalogo i le uunaiga e ui atu i le auala alo i lena aso.

Ae peitai, o se taimi na le'i toe umi oo i le la papatisoga, ae fai mai le fafine e fia talanoa ia i ma'uua. Fai mai o ia, ua tele tausaga o miti lava i le mea e tasi. I lana miti, sa i ai o ia i le nofoaga autu o São Paulo. Na oo atu se tamaloa matua atu ma fai atu ia te ia, e toalua ni alii talavou o loo

o mai e suia lona olaga. Ona ia vaaia lea o ni alii talavou se toalua o o atu, ae o taimi uma lava e gata ai iina lana miti.

I se tasi aso i ni nai vaiaso na muamua atu, sa salu lona fale ae ta'u atu e se leo ia te ia ua o atu alii talavou e toalua, ma e tatau ona alu atu loa lava i le taimi lena i le auala alo, lea na ma vaai muamua ai ia te ia. O le le malamalamia i le uunaiga ae sa manao e fia iloa le tali o lana miti, sa faataatiaeae ai lana salu ae savali atu i le alasopo.

A o savali o ia, sa oo atu vaaiga o lana miti i lona mafaufau e faapei o se ata tifaga, lea na faaiuina i le vaa

i foliga o alii talavou e toalua. Sa ia vaaia foi na tofu i laua ma se pine uliuli o o la'u igoa. Fai mai o ia, e le'i umi, ae ma oo atu ma Elder Andrade i ona luma i le alasopo. Sa lofituina o ia i le ootia, ma sa le mafai ona taofifi lona tagi.

I le taimi nei, o le manatuaina o lena aafiaga paia, ua ou lagonaina le Agaga ma toe vaaia ai i lo'u mafaufau foliga loimatā o lena tuafafine o lē na taliaina le talalelei. O le mea na faafe-tai ai, sa ma mataala ma la'u soa ma lototetele e mulimuli i le ala na finagalo le Alii ma te uia i lena aso. ■

Rut de Oliveira Marcolino, Rio Grande do Norte, Pasila

E lei leva ona ma amata savavali atu i le alasopo ma te le'i masani ai, ae ma vaaia se tamaitai o savali mai ia i ma'uua. Sa le mafai ona ma 'alo mai le matauina na tagi o ia.



E TE MANAO I NI FUGALAAU?

se tasi aso i le ma'ea ai o se taimi faigaluega sa faapitoa le faigata i le falemai o tamaiti, sa ou lelava ma itata-gofie. A o ou savali atu i le laulau o le puipuiga, sa ou matauina ai ni fugalaau mananaia. Ina ua ou fai atu i le tagata sa i ai i le laulau e uiga i le mananaia o ia fugalaau ma le manaia o lo latou manogi, sa ia fai mai ia te a'u, e mafai ona ave ma a'u.

Sa matuai o'u fiafia lava! Sa ou mafaufau faapea, e mautinoa lava na finagalo le Tama Faalelagi e ave ma a'u fugalaau e faafafiaaina ai lo'u aso.

A o ou savali ese mai mai le falemai, sa ou oo mai i tua o se tamaitai sa nofo i se nofoa faataavalevaled. Sa amata ona ou le to'a ae na iu ina mafai ona ou pasia o ia a'o ma ulufafo mai le fale. A o ou pasia o ia, sa ea a'e lona ulu ma fai mai, "Oi, ta'i manaia fugalaau." Sa ou faafetai atu ia te ia ma faatopetope atu i lo'u toalua, o lē sa faatalitali mai i le matou taavale. Sa ou fiafia e faaali atu ia te ia a'u fugalaau.

Na faafuasei lava ona ou lagonaina le ta'u mai e le Agaga Paia ia te a'u, na sili atu ona manaomia e lena tamaitai ia fugalaau nai lo a'u. Sa ou tau musu e avatu ia te ia, ae sa ou mulimuli i le uunaiga. Ina ua ou fesili atu i ai pe manao i fugalaau, sa ou faamoe-moe o le a fai mai e leai.

"Oi, ioe!" sa ia tali mai ai. "Ou te manao i ai. E ese le mananaia."

Sa ou tuuina atu [fugalaau] ia te ia, ae a o ou liliu ou te aluese, sa amata ona tagi lotulotu o ia. Ina ua ou fesili atu pe ua i ai se mea ua tupu, ae fai mai na maliu lona toalua i ni nai tausaga ua mavae, ma na silia ma le tausaga e le'i toe asiiasi mai se tasi o lana fanau ia te ia. Fai mai o ia, sa ia augani atu i le Atua e faaali

mai ia te ia se faailoga o Lona alofa.

"O oe o se agelu na auina mai e le Atua e tuuina mai ia te au fugalaau e sili ona ou fiafia i ai," o lana tala lea. "Ua ou iloa nei e alofa o Ia ia te au."

Na nutimomoia lo'u loto. Sa matuai o'u manatu faapito lava. Sa manaomia e lenei tamaitai se upu agalelei, ae sa ou le fia talanoa ia te ia. Sa le o a'u o se agelu. A o ma faamavae, na amata foi ona ou tagi.

Ina ua ou taunuut atu i le taavale, na fesili mai lo'u toalua po o le a le mea na tupu ma aisea na ou foa'ia ai a'u fugalaau. Sa foliga mai sa le mautonu o ia ae sa toe to'a mai a o ou faamatalaina le tala.

"Sa ou auina atu ni rosa mo oe ananei. Sa ou manatu sa e manaomiaina," o lana tala lea. "Sa ou popole ua e foa'ia ese atu. Afai la e le o fugalaau la na ou auina atu ia te oe, o fea la o i ai [rosa]?"

Na iloa mulimuli ane, na galo i le faleoloa fugalaau ona tiliva mai ia rosa, o lea na ma tietie atu ai i le faleoloa fugalaau. Sa alu i totonu lo'u toalua ma e le'i leva ae toe sau i fafo ma se teufugalaau matagofie.

Sa le mafai foi ona taofiofi lo'u tagi. Na fetalai mai le Tama Faalelagi ia te a'u e ositaulaga na fugalaau, ma le silafia lelei sa i ai se mea na sili atu sa faatalitali mai mo a'u, ma le isi, na manaomia e Lona afafine tuuatoatasi se faamanatu o Lona alofa. ■

Cindy Almaraz Anthony, luta, ISA

Sa faafuasei ona ou lagonaina le Agaga Paia ua ta'u mai ia te a'u, na sili atu ona manaomia e le tamaitai ia fugalaau nai lo a'u.



FEFAUTUAAI FAATASI E LE AUNOA

Fonotaga Faaleaiga mo Ulugalii

Saunia e Nichole Eck

Oaufono i le Ekalesia e mulimuli i se mamanu paia i tulaga uma, mai le Aufono a le Au Peresitene Sili ma le Korama a Apostolo e Toasefululua, e oo i aufono a le siteki, uarota, paranesi, korama, ma isi tulaga faaleautaitai.

**E feagai ulugalii
ma le tele o faafitauli ma faaiuga.
E mafai ona fesoasoani mataupu faavae nei e ono mo aufono faaleaiga.**

Na saunoa mai Peresitene Spencer W. Kimball (1895–1985), “O le aufono sili ona taua o le Ekalesia, o le aufono a le aiga.¹

Na aoao mai Elder M. Russell Ballard o le Korama a Apostolo e Toasefululua, “o fonotaga faaleaiga o ni talanoaga lelei ia mo le faia o fesootaiga taua.”² Na ia faamalamalama mai, o ni taimi ia e “talanoa ai i manaoga o le aiga ma manaoga o tagata taitoatasi o le aiga, . . . foia ai faafitauli, faia o faaiuga faaleaiga, [ma] fuafua ni gaoioiga ma ni sini faaleaiga i lea aso ma lea aso ma le lumanai.”³

Afai e le’i faia sa outou fonotaga faaleaiga, e mafai ona amata i le taimi nei. Afai o loo outou nonofo ma lau fanau, e mafai ona e faaaofia ai i latou. Ae peitai, e taua foi ona faia se fonotaga faaleaiga e ese mai a tane ma ava lava ia lea e mafai ona laua talanoaina ai na’o laua ni faafitauli faaleaiga ma ni faafitauli patino.

O nisi nei o mataupu faavae ma ni fautuaga aoga e mafai ona e faaaogaina i au fonotaga faaleaiga i le va o le tane ma le ava.

Amata i le Tatalo

“Afaaletonu le fesootaiga ma le Tama Faalelagi, o le afaaletonu foi le fesootaiga i le va o ulugalii.”⁴

E mafai ona avea le Alii ma se sui auai taua i lau faaipoipoga. I lau tatalo, e mafai ona e faafetai i le Tama Faalelagi mo ou faamanuiaga e tele, e aofia ai lou toalua, ma ole atu mo Lona Agaga ia auai i la oulua talanoaga. E mafai e Lona Agaga ona taialaina la oulua talanoaga ma fesoasoani e faaosofia lagona lelei ma fesootaiga lelei.

Filifili Faatasi

“E ao ona maua mai le maliega a tagata o le aufono, e ala i le tatalo ma talanoaga, ima ia ausia ai lena



lotogatasi, o se tulaga manaomia lea i le fesoasoani a le Alii.”⁵

E tatau ona oulua faia ma lou toalua ni faaiuga taua, e pei o le tatau pe le tatau foi ona talia se ofo mo se galuega, po o fea e talosaga ai mo le aoga, po o afea e tatau ai ona faia se fanau, po o le a le auala e vaevae ai galuega i le fale. E mafai e tane ma ava ona fautuaina atu ni vaifofo talafeagai i faafitauli ma talanoaina ia faafitauli. Ia faalogo atu ma le loto-maualalo i manatu faaalia o lou toalua. E mafai ona fesoasoani lenei mea

e te aoao ai ia malamalama i manatu faaalia o le tasi ma o le a faamanatu atu ai i lou toalua e te faatauaina ona manatu.

I fonotaga faaleaiga, e tatau ona tatou ausia a tatou faaiuga taua “e ala i le maliega musuia, ae le o se feu-tagaiga.”⁶ Atonu e le vave ona oulua ausia lenei lotogatasi i faafitauli taitasi uma. Atonu e alu ai ni nai fonotaga ma le tatalo faamaoni—fai toatasī ma fai faatasi foi ma lou toalua—e malilie ai i se faaiuga. Ae “afai o le a oulua talanoaina i aufono e pei ona

faamoeina lua te faia ai, o le a tuuina mai e le Atua ia te oulua tali i faafitauli e luitauina ai oulua.”⁷

Atonu foi e aoga le muai filifilia o se autu mo se fonotaga faaleaiga. O lenei faiga o le a e maua ai le taimi e mafaufau loloto ai i le mataupu, ina ia mafai e oulua ma lou toalua ona lagona le saunia lelei e faaleo atu o oulua manatu.

Iloilo Oe Lava Ia

“Ma aisea e te vaai ai i le fasi laau lena o loo i le mata o lou uso, ae le manatu ifo i le utupoto lena o loo i lou lava mata?” (Mataio 7:3).

Ua ia te oe le mana e suia ai na o se tagata e toatasī: o oe lava. Atonu e faaososoina oe e faaaoga se fonotaga faaleaiga e tuuina atu ai se lisi o fai-tioga e uiga i lou toalua. Nai lo lena, ia faia nei fonotaga ma se manao e faaleleia atili oe lava. Fesili i lou toalua pe i ai se mea o fai ma faafitauli po o se popolega ua ia matauina i au faamatalaga po o amioga. Fai ni sini mo le faaleleia atili o le tagata lava ia ma talosaga atu mo le lagolago a lou toalua a’o e taumafai e sui. Lagolago atu i lou toalua i soo se sini patino o manao e fai.



Talanoa e uiga i Mea Faigata

“E tofu aiga uma ma faafitauli ma luitau. Ae o aiga manuia e taumafai e galulue faatasi agai atu i ni fofo nai lo le liliu atu i faiitioga ma finauga.”⁸

O faaipoipoga malolosi e fausia e ala i le faatoilaloina o luitau, ae le o le le amanaiaina po o le aloese mai ai. O le a i ai taimi e tulai mai ai faafitauli ogaoga ia e tatau ona talanoaina. Mo se faataitaiga, atonu o le a faigata ona oulua galulue i faafitauli o agasala ma le salamo po o avega tautupe, ae o fesootaiga e le faatapulaaina ma faamaoni o se fonotaga faaleaiga, e mafai ona fesoasoani e faamaluluina ai lagona malolosi. E mafai ona avea se fonotaga faaleaiga o se talanoaga talafeagai ma logolelei e aumai ai i luma atugaluga pe fesili atu ai foi mo se fesoasoani.

Ia taulai atu o oulua malosi i fofo talafeagai o faafitauli ae aloese mai finauga po o faiitioga. Ia lotomaulalo.

Faasoa atu le alofa i lou toalua ma faamanatu atu i le tasi ma le isi, o loo oulua galulue faatasi e fausia se faaipoipoga ma se aiga fiafia ma faavavau.

Tausisi i Mea Lelei

Afai e te taloina fonotaga faaleaiga na o “taimi lava o le popole . . . ae le talisapaia lava . . . mea ua ausia po o le faamālo atu [i tagata o lou aiga] ma faaali atu lou alofa ia i latou, o le a latou aoao e fā’atu i fonotaga faaleaiga.”⁹

E le o fonotaga uma faaleaiga e tatau ona taulai atu i faafitauli ma faiga faaiuga. E mafai ona e avea ni avanoa e faasoa atu ai se mea lelei e uiga i lou toalua pe faasoa atu faamanuiaga i lou olaga. E mafai ona e patipatia ausiga faaletagata lava ia, talanoa i ni auala e faamalosia ai faaleagaga lau faaipoipoga ma lou aiga, ma fai faatasi ni sini,

pe faailoa atu le agaga faafetai mo malosiaga po o galuega auauna atu o lou toalua. Faaaoga fonotaga faaleaiga, e “faatulaga ai ni aga masani o le talanoa ma le faaaloalo masani lea e mafai [e oulua ma lou toalua] ona faalagolago i ai pe a tulai mai ni faafitauli ogaoga ma faigata.”¹⁰

Tutumau

“Sei o tatou faia le mea sili tatou te mafai ma taumafai e faaleleia atili i aso taitasi. Pe a alia’e o tatou faaletonu, e mafai ona tatou taumafai pea e faasa’oina. E mafai ona faateleina lo tatou loto faamagalo ia i tatou lava ma ia i latou tatou te alolofia i ai.”¹¹

O le mea mulimuli, ia manatua o le suia o aga masani o fesootaiga le lelei i mamanu lelei e umi se taimi ma ni faiga faamasani e alu ai. Atonu e foliga mai lau fonotaga muamua faaleaiga e ese lava pe taufaamata’u, ae a o e taumafai ma





le lotomaualalo e talanoa atu i le tasi ma le isi e aofia ai ma le Alii i au faa-iuga, o le a sili atu ona e malamalama i faamanuiaga o fonotaga faaleaiga.

E finagalo le Alii ia tatou maua le filemu i o tatou aiga ma i a tatou fesootaiga. E fesoasoani mai o Ia i vaega tatou te le atoatoa ai ma faamanuia mai i a tatou taumafaiga. Faatasi ai ma Lana fesoasoani, e mafai ai ona tatou faafaleleina “se siosiomaga o le faaaloalo, loto malamalama, ma le lotogatasi”¹² lea o le a avea ai o tatou fale, e pei ona folafola mai e Peresitene Thomas S. Monson, “o se vaega itiiti o le lagi iiinei i le lalolagi.”¹³ ■

E alala le tusitala i Iuta, ISA.

FAAMATALAGA

1. *Aoaoga a Peresitene o le Ekalesia: Spencer W. Kimball* (2006), 211.

2. M. Russell Ballard, *Counseling with Our Councils: Learning to Minister Together in the Church and in the Family* (2012), 165.
3. M. Russell Ballard, “Fonotaga Faaleaiga: O Se Talanoaga ma Elder ma Sister Ballard,” *Liahona*, Juni 2003, 14.
4. M. Russell Ballard, “Fonotaga Faaleaiga,” *Liahona*, Juni 2003, 17.
5. Ronald E. Poelman, “Priesthood Councils: Key to Meeting Temporal and Spiritual Needs,” *Ensign*, Me 1980, 91.
6. Ronald E. Poelman, “Priesthood Councils,” 91.
7. Stephen L Richards, i le Conference Report, Oke. 1953, 86.
8. Ezra Taft Benson, “Fautuaga i le Au Paia,” *Ensign*, Me 1984, 6.
9. *Pe a Liua Mai Oe, Faamalosi i Lou Uso* (Melchizedek Priesthood study guide, 1974), 168.
10. “Fonotaga Faaleaiga: O Se Mamanu Faalelagi,” *Mulimuli Mai ia te Au: Taiala Suesue a le Tagata Lava ia a Le Aualofa* (1989), 171.
11. Russell M. Nelson, “Perfection Pending,” *Liahona*, Nov. 1995, 88.
12. “Working Together in Family Councils,” *Ensign*, Fep. 1985, 31.
13. Thomas S. Monson, “Hallmarks of a Happy Home,” *Ensign*, Nov. 1989, 69.

O A MEA TATOU TE TALANOA I AI?

Afai e te le iloa ni mea e talanoa i ai i se fonotaga faaleaiga, mafaufau i fesili faapenei:

- E faapefea ona tatou vae-vaeina galuega ina ia tofu tagata taitoatas i le aiga ma maua ni lagona lelei e uiga i le mea o loo ia faia?
- O a ituaiga o ala o faasala-lauga o le a tatou faataga-in a le fale?
- O a ni tomai fou e mafai ona tatou aoaoina o se aiga?
- O a ni mea e mafai ona tatou faia o se aiga e ave-ese ai le femisaa’i?
- O a ni gaoioiga o le a uunaia ai i tatou e tausia le aso Sapati ia paia?
- E mafai faapefea ona tatou saunia mo se faalavelave faalenatura?
- E faapefea ona tatou aafia atili i lo tatou afioaga?
- O a ni tu ma ni aga masani fou e mafai ona tatou amataina o se aiga?
- E faapefea ona tatou faaleleia atili le puleaina o a tatou mea tautupe?
- O a ni mea e mafai ona tatou faia e faamalosia ai faaleagaga a tatou faaipoipoga?

Le Lototele e

Saunia e Christian Hägglund

na ua ou toe foi mai i Suetena ina ua maea la'u misiona, sa ou tauivi mo se taimi umi ma le isi laasaga i lo'u olaga—faaipoipoga i le malumalu. Sa faamautinoa mai e le Agaga e tatau ona amata lo'u aiga ina ia avea ai a'u ma tagata e tatau ona ou avea ai. Sa matele lo'u taulai atu i le avea o lenei mea ma faaiuga aupito sili ona ta'ua o lo'u olaga, e ui ina sa ou lagonaina ua ou maua le soa e faavavau mo au, ma ua faamaonia e le Alii la'u filifiliga, ae sa masalosalo lava lo'u faatuatua. Na ma filifilia ma la'u uo teine o Evelina, se taimi mo le ma faamauga i le malumalu, faatulaga fuafuaga mo le ma tafaoga pe a uma le faaipoipoga, ma faatauina mai mama faamau a o lei faalauloinaina aloaia le ma faamauga—ona o lo'u fefe e faia se tautinoga i le faaipoipoga. Sa ou manao i le Tama Faalelagi e poloai mai ia ou faaipoipo ia Evelina ona sa ou fefe e tuuaia mo le faaiuga ina ne'i faamutaina le ma faaipoipoga. O le mata'u ma tatalo lē taitalaina na ou le minoi ai i la'u filifiliga taua na faamalumalu mai pea.



O le Faitalia—o le Ala a le Alii

Na iu ina faia e uunaiga a le Agaga Paia se eseeseaga ina ia ou susueina le Mataupu Faavae ma Feagaiga 58:26–29: “Aua faauta, e le tatau ona ou poloai atu i mea uma; aua o ia o le e tau faamalosia i mea uma, o ia lava lea o se [paie]. . . .

“. . . E tatau i tagata ona auai ma le naunautai i se faamoemoega lelei, ma fai mea e tele i lo latou lava loto malie, ma aumai le amiontonu tele;


“Aua ua i totonu ia te i latou le mana lea ua latou pule ai ia te i latou lava. . . .

Sa ou aoao e faaaoga lo'u faitalia e galue ai nai lo le tau faamalosia ina ia ou faia le faaiuga aupito sili ona taua o lo'u olaga.

“Ae o ia o lē e lē faia e ia se mea seja poloaiina ai o ia, ma talia se poloaiga ma le loto masalosalo, ma ia tausia ma le paie, o ia lava lea e tausalaina.”

A o ou mafaufau loloto i nei fuai-upu, sa ou maua ai se malamalamaaga i le matafaioi a le faitalia i le fuafuaga a lo tatou Tama Faalelagi, lea na suia ai lo'u mafaufau, ma tuuina mai ai ia te au le lototele e agai ai i luma. Na aoao mai Elder Richard G. Scott o le Korama a Aposetolo e Toasefululua e faapea, afai tatou te maua le taitaiga musuia e aunoa ma se taumafaiga a le tagata

Faaipoipo



lava ia, o le a tatou misia le “taua o le tuputupu a'e faaletagata lava ia” lea e oo mai “a o [tatou] taumafai e iloa auala ina ia taitaiina ai e le Agaga.”¹

Mana e Agai ai i Luma

Ona tonu ai lea ia te a'u e faaaoga lo'u faatuatua ma faia se faaiuga, ma na faamanuiaina a'u e le Alii i le talitonu i lo'u gafatia e faia ai se faaiuga. Sa ou iloa ai sa tatau ona ou “auai ma le naunautai. . . . ma faia ni mea e tele i [lo'u] lava loto malie”—e aofia ai le faamau atu i se tasi. Ua uunaia e le Alii i tatou e faaaoga lo tatou mana i le avea ai o ni suli e pulea ai i tatou lava. O le faaaogaina o lenei mana o se vaega totonugalemu lea i o tatou olaga.

Ou te talitonu e sili atu le naunau mai o le Alii e silasila mai o tatou faaaogaina lo tatou faitalia nai lo le silasila mai o tatou faia i taimi uma ni faaiuga atoatoa. Peitai, ua Ia tuuina mai ia i tatou ni fesoasoaniga ina ia faia ai faaiuga lelei, aemaise lava pe a oo mai i le filifiliaina po o ai e faaipoipo i ai. E pei ona aoao mai Peresitene Spencer W. Kimball (1895–1985), “E le na o lagona e tatau ona faamautu atoatoa ai ni faaiuga, ae o le mafaufau



ma le loto, e faamalosia e ala i le anapogi ma le tatalo ma manatunatuga loloto, o le a tuuina atu ai i se tagata se avanoa aupito maualuga o le fafia i le faaipoipoina. E aumaia faatasi ai ma le osigataulaga, fefaaasoaa'i, ma se manao-mia tele o le le manatu faapito.”²

Ua tatou maua foi ni aoaoga faale-tusi paia i le auala e maua ai faamautu noaga faaleagaga: “E ao ina e suesue i ai i lou mafaufau; ona ao lea ona e ole mai ia te au pe ua sa'o, ma afai ua sao o le a Ou faia ia mu lou loto i totonus ia te oe; o lea, o le a e lagona ai ua sa'o.

“Ae afai ua le sa'o, o le a e le maua ni lagona faapena, ae o le a e maua se mafaufauga papa” (MF&F 9:8–9). Ae peitai, e le o i tatou uma o le a oo i ai se mu i totonus o o tatou loto i le tali atu i faamautinoaga faaleagaga a le Alii. O i tatou taitoatasi e tatau ona aoao ia iloa o tatou lava ala faapitoa o le mauaina o nei faamautinoaga.³ O le mulimuli ai i lenei mamanu, o le a tatou maua ai le faatuatua i o tatou gafatia e fai ai filifiliga.

Na silafia e le Tama Faalelagi manoga o lo'u loto, agaga, ma le mafaufau. Na Ia tuuina mai ia te au nei upumoni, ia na faia ai se eseesege tele. Sa ma faaipoipo ma Evelina. Ua ma olioli nei i le tele o tausaga o le olaga fafia faaleaiga, ma ua ma maua ni fanau aulelei se toatolu. Ou te matua faafetai lava i le Alii mo la'u molimau o le faitalia ma lana matafaioi i le faia o faaiuga aupito sili ona taua o le olaga. ■

E alala le tusitala i Stockholm, Suetena.

FAAMATALAGA

- Richard G. Scott, “Ia Maua le Taitaiga Faaleagaga,” *Liahona*, Nov. 2009, 7.
- Spencer W. Kimball, “O le Tasi i le Faaipoipoga,” *Liahona*, Oke. 2002, 36.
- Tagai foi i le Mataupu Faavae ma Feagaiga 8:2–3.

AUTU O LE MUTUALE 2015

"O lea, outou e o e e o atu i le galuega a le Atua, vaai ia outou auauna atu ia te ia ma o outou loto atoa, mafaufau atoa, manatu atoa, ma le malosi atoa, ina ia mafai ona outou tutu ma le lē pona i luma o le Atua i le aso gataaga." (MF&F 4:2).



OUTOU E O E
O ATU
I LE GALUEGA A LE ATUA

AUAUNA ATU MA LOU LOTO ATOA

Saunia e le Au Peresitene Aoao o Tamaitai Talavou

A o tatou aoao i le autu o le Mutuale mo le 2015, o se avanoa paia le auauna atu i le Atua. Matou te faamoeome o le tausaga lenei, o le a iloa ai e i tatou taitoatasi ona auauna atu ma se tautinoga sili atu i le ala na aoao mai e le Faaola—ma o tatou loto atoa, mafaufau atoa, manatu atoa, ma le malosi atoa. E faapefea ona tatou faia lena mea? O ni nai manatu nei.

Muamua, tatou te auauna atu ma o tatou **loto atoa**. Ua tatou malamalama o le uiga o lenei mea, o lau auaunaga i le Atua e ao ona faaosofia e lou alofa ia te Ia ma Lana fanau. "O lo tatou alofa mo le Alii o le a pulea ai mea o loo manaomia mai lo tatou alofa, o mea o loo manaomia mai ai o tatou taimi, o mea tatou te fiafia i ai o loo tatou tulituliloaina, ma le faatulagaga o mea tatou te faamuamuaina."¹ E te faaali atu i le Alii lou alofa pe a e tausia Ana poloaiga (tagai i le MF&F 42:29). E te auauna atu i lou aiga ma faamalosia lou auaiga. E te faalauteleina lou valauga ma aapa atu ia i latou e manaomia se uo. E te sueina igoa o le aiga e ave i le malumalu.



Bonnie L. Oscarson, peresitene (ogatotonu);
Carol F. McConkie, fesoasoani muamua (agavale);
Neill F. Marriot, fesoasoani lua (taumatau)

Lona lua, tatou te auauna atu ma o tatou **mafaufau atoa**. E manaomia ai galuega faatino ma taumafaiga filiga. O le galuega faafafeatalai e manaomia ai le tumau ma le onosai. E te auauna atu ma le mafaufau atoa pe a e tali atu i manaoga o isi, “e pei o le fafagaina o e ua fia aai, faaoofuina o e ua lē lavalavā, asiiasi atu i e mamai ma auauna atu mo lo latou mapusaga, faaleagaga ma faaletino” (Mosaea 4:26).

O le isi, tatou te auauna atu ma o tatou **manatu atoa**. O ou manatu e tatau ona mama ma lē ponā, ma tau-lai atu i le Faaola. Ua e osifeagaiga e manatua pea o la. E te sailia le taitaiga a le Agaga Paia e ala i le suesueina o tusitusiga paia ma le tatalo. A o e faaogatasia ou mafauauga, upu, ma faatinoga ma le mafaufau ma le finagalo o le Atua, e te iloa manaoga o isi ma e agavaa ma saunia e auauna atu.

O le mea mulimuli, tatou te auauna atu i le Atua ma lo tatou **malosi atoa**. O se tasi o auala e maua ai le malosi o le faaaoga lea o le faatuatua i le Togiola a le Faaola. E te salamo ma faapaiaina oe lava e ala i le usiusitai i Ana poloaiga. E te lagona le mana gafatia o le Faaola ma molimaunuva vavega a o e auauna atu i le malosi o le Alii (tagai i le Alema 26:12).

A o e auauna atu i le Atua ma lou agaga atoa, ua Ia folafola mai o le a faamamaina oe mai agasala ma sau-nia e tu i Ona luma ma maua Lona mamalu e faavavau. ■

FAAMATALAGA

1. Ezra Taft Benson, “O le Poloaiga Sili—Alofa i le Alii,” *Liahona*, Iulai 1988, 4.

O LENEI GALUEGA OFOOFOGIA

Saunia e le Au Peresitene Aoao o Alii Talavou

Pe a e faalogo ai i le upu o *atu*, o le a se mea e te mafaufau i ai? O se vaa ua sauni e folau? Auai i se faamoemoega sili? O le amataga o se faigamalaga?

Pe a outou “o atu i le galuega a le Atua,” ua outou auai i le faigamalaga silisili ona maoae. Ua e fesoasoani i le Atua e faanatinati Lana galuega, ma o se aafiaga maoae, fiafia, ma le ofoofogia.

Aua ne’i tau na ona outou talitonu i la matou upu. O le tausaga ua mavae i se nuu laitiiti i luta, sa asiiasi ai alii talavou o le korama a le au aoao i le uepisaite o gaoioiga a le autalavou (lds.org/youth/activities) e sue ai ni manatu mo se gaoioiga. E tasi se gaoioiga faapitoa na latou tosina atu i ai: “Auaunaga mo Aso e Fitu.”

Sa tonu i nei alii talavou e fai se mea e sili atu ona tele: o le a latou tuuina atu ni auaunaga i aso taitasi mo se vasio atoa i soo se tasi o le uarota e talosagaina [le auaunaga]. Ina ua saini ni aiga e 19 e manaomia la latou auaunaga, sa faateia ma lofituina teisi alii talavou. O le a faapefea ona latou faia nei auaunaga e tele i se taimi puupuu? Peitai, na latou faia se tautinoga, o lea na tonu ai o le a latou auauna atu i ia aiga uma.



David L. Beck, peresitene (ogatotonu);
Larry M. Gibson, fesoasoani muamua (agavale);
Randall L. Ridd, fesoasoani lua (taumatau)

Sa na o le tasi le vaiaso, ae na latou tuuina atu ai le silia ma le 250 itula o auaunaga tuufaatasi, i le faia o galuega faatino e pei o le la’ueseina o se faaputuga maa telē, eliina o se pa oneone, faamamaina o talivai, ma le faaputuina o fafie. Ma na suia ai foi ma alii talavou.

Sa latou maofa i le malosi sa latou lagonaina ma faamanuiaga na latou mauaina. Na latou faamatalaina le lagonaina o le lotogatasi i le avea ai o se korama ma le mauaina o le fesoasoani faalelagi e fai ai a latou meaaoga ma isi tiutetauave. O le taimi nei, a manaomia e le latou uarota ni galuega e fia faataunu, sa tali atu ma le naunautai le korama a le au aoao. Sa le na’o se vaiaso na latou auauna atu ai—sa latou taumafai e auauna atu i aso uma.

O le auauna atu ma le fausia o le malo o le Atua e moni lava o se galuega ofoofogia. Na aumaia ai le olioli i nei alii talavou, ma o le a aumaia ai foi le olioli ia te oe a o e siitiaina isi ma vaaia le suiga o o latou olaga e ala i taumafaiga mamā ma le faamaoni. E pei ona ta’ua e le au peresitene aoao o Tamaitai Talavou i le itulau e 48, o se faamanuiaga le auauna atu i le Atua.

Alu atu nei i lau auaunaga i le Atua “ma lou loto atoa, manatu atoa, mafaufau atoa ma le malosi atoa” (MF&F 4:2). Matou te fia iloa ou aafiaga o le auauna atu! Fai ni vitio ma pue ni ata o au auaunaga, tuu i luga o saite o faasalalauga o agafesootai, faasoa atu i lou aiga ma uo, ma imeli mai i le liahona@ldschurch.org. E mafai foi ona faamatala atu i isi e uiga i ai i luga o le saite o gaoioiga a le autalavou. Faamolemole ia valaaulia isi e auai faatasi ma outou i lenei galuega ofoofogia, ma sei o tatou vaai i le tele e mafai ona tatou suia ai le lalolagi. ■

TASI LE LAA I LE TAIMI



Ua faasoa mai e le autalavou i Italia le auala na latou auauna atu ai i le Atua ma o latou loto atoa, manatu atoa, mafaufau atoa, ma le malosi atoa.

Saunia e Hillary Olsen

Olea la ua outou iloa, o le autu a le Mutualie i le tausaga lenei ua faatatau i le auauna atu, o le a la sau mea a fai? Ua finagalo mai le Alii e te auauna atu ia te Ia ma lou loto, manatu, mafaufau ma le malosi *atoa* (tagai i le MF&F 4:2). Matuai tele na mea, ma e mafai foi ona lagonaina ai le lofituina. Ae e le tatau ona faapena.

“E pei o le a'e i se mauga, o le tala lea a Marco D., o Taranto, Italia. “O le mafaufau i le taimi lena i le a'e i le mauga atoa e faigata, ae afai e te mafaufau i ai i le laa e tasi i le taimi, e sili atu lena ona faigofie. Tuu le vae e tasi i luma o le isi vae, ma a e laa loa, ia mafaufau i ai, ‘ua ou faial’ ona sosoo atu ai lea ma le isi laa.”

I le lotolotoi o pisa [pizza], pasta, ma paema'a o le olaga i Italia, na maua ai e le autalavou i Italia i saute nisi o auala aogā e taulai atu i ai a o latou taumafai e auauna atu ma latou loto, manatu, mafaufau ma le malosi *atoa*.

SAILI LE TAITAIGA FAALEAGAGA

O le mauaina o le taitaiga faaleagaga o se laasaga taua lea i le auauna atu i le Alii, ma ua iloa e Davide C., e 15 tausaga, o le a le tupu e aunoa ma se taumafaiga i lana pitolaau. "E manaomia ona avea a'u ma se meafaigaluega i aao o le Atua," o lana tala lea. "E tatau ona ou saunia e maua ma mulimuli i uunaiga a le Agaga. Ina ia faia lena mea, e manaomia ona siomia a'u e le aunoa i mea a le Alii."

O Davide ma lona aiga o ni tagata liliu mai i le Ekalesia. A o lei papatisina o ia, sa iloa e Davide le taua o le suesue i tusitusiga paia. O lona uso o le tagata muamua lea na papatiso, sa lei umi ae sosoo atu ai ma ona matua. Na iloa e Davide na ia manaomia lana lava molimau. A o ia suesueina le Tusi a Mamona, sa ia lagonaina le Agaga. O lagona lelei sa ia lagonaina sa fesoasoani i lona faia o le faaiuga e auai i le Ekalesia.

E fa tausaga mulimuli ane, o faalagolago pea Davide i le taitaiga mai le Agaga. "E tatau ona tatou faaauau ai pea lava. E le mafai ona tatou faatalale i a tatou suesuega o tusitusiga paia ma tatalo," o lana tala lea.

TUMAU I LE MAMA

Ua faailoa mai e Marco D., 17, le taua o le usiusitai i poloaiga, aemaise lava o le tulafono o le ola mama. "E faosooso i tatou e le fili i soo se auala lava, ma taumafai ia tatou faia mea sese," o le tala lea a Marco. "E mafai foi ona avea uo ma se faatosinaga leaga." I ni nai tausaga ua mavae sa tatau ai ia Marco ona sui ni uo e tafao

ai ona sa ia iloaina ni faatosinaga lē lelei sa latou faia i ana filifiliga. "Na tatau ona ou sailia ni uo na taliaina au mo le ituaiga tagata ua ou i ai, ae le o le ituaiga tagata ua faamoemoe le lalolagi ia ou avea ai."

O nisi taimi i la tatou feaeiga i luga o le mauga, tatou te tautevateva ai. Pe a tupu lenei mea, "alu e vaai le epikopo ma talanoa sa'o ia te ia," o le faamalosiau mai lea a Marco. "O le epikopo o lo tatou uso. E mafai ona tatou faatuatuaina o ia."

O ana taumafaiga ia usiusitai ma tumau i le mama na tuuina atu ai ia Marco ni avanoa e auauna atu ai i le Atua i le taimi nei, ma ua latou saunia ai foi o ia ia agavaa e auauna atu o se faifeautalai faamisiona i se aso.

FAAAVANOA SE TAIMI

Ua iloa e Manuel M., 17, e le o taimi uma e faigofie ai ona auauna atu i le Atua. "E masani ona tofotofoina i tatou," o le tala lea a Manuel. "O nisi taimi e pei e sili ai lo tatou faia o isi mea. O nisi taimi e sili ai ona ou moe, alu i se taaloga soka, po o le tafafao ma au uo. Ae ua aoaoina a'u e lo'u tina i taimi uma e tatau ona tatou filifili e auauna atu i le Alii. E le afaina foi le fai o isi mea, ae o le auauna atu



i le Alii e tatau ona ave i ai la tatou faamuamua."

Ua iloa e Miriam D., 14, na pau lava le mea e mautinoa e tupu ai le suesueina o tusitusiga paia ma tatalo i aso taitasi, o le faataatia ese lea o se taimi faapitoa e fai ai. "Ou te lagona e pei lava ua mafai ona ou ausia ni mea se tele pe a ou faataatia ese le taimi lena," na fai mai ai Miriam. "Ma le isi, a tele se taimi tatou te tuuto atu i le Alii, e tau le tele foi le faosoosoina o i tatou—tatou te atili malolosi ai."

AUAUNA ATU MA LE LOTOMALIE

Mo Sabrina D., 15, o le auauna atu ma lona loto, manatu, mafaufau, ma le malosi atoa, o lona uiga o le auauna atu ma le *buona volontà*. O le uiga o lena mea, o le faia o mea ma se uiga faaalia o le lotomalie ma le fiafia.

E ioe foi i ai Alessio I., 12: "E leai se uiga o le tau ina fai, ona ua fai atu ai le epikopo po o ou matua. E le tatau ona e lagonaina le faamalosia [o oe] e auauna atu. E finagalo le Alii ia tatou auauna atu mo ni mafuaaga tonu."

E mafai faapefea ona tatou maua atili le *buona volontà* a o tatou auauna atu? "E fesoasoani le faitauina o tusitusiga paia ia te au, aua e aoao mai ia i tatou o le auauna atu o le mea sa'o lena e fai," o le tala lea a Sabrina.

O le suesue ma malamalamalama lelei i le Togiola, e mafai foi ona fesoasoani ia i tatou e auauna atu ai ma le lotomalie



ma le fiafia. Fai mai Elvisa D., 17, "E pei lava ona auina mai e le Tama Faalelagi Lona Alo, o lē na ositaulagaina mea uma mo i tatou, e tatau foi ona tatou lotomalilie e tuuto atu mea uma tatou te mafaia e auauna atu ai i le Alii."

TAULAI ATU I ISI

Na iloa e tuafafine o Giulia, 16, ma Veronica D., 14, le taua o le taulai atu i isi. "O le auauna atu e fesoasoani, tatou te vaai atu ai i tagata i se vaiga

e ese mai. Pe a e auauna atu i se tasi, e faamanuaina uma ouluu," o le tala lea a Giulia.

Fai mai Veronica, "I se tasi taimi sa ou manao lava e faasoa atu le talalelei, ae sa ou lagona le le saunia. Sa ou fefe. Ae ina ua ou taulai atu i tagata na ou auauna atu i ai, sa ou lagona atili ai le to'a aua sa ou iloa o le a fesoasoani mai le Alii ia te au."

Na mafai e Giulia ma Veronica ona auauna atu i le la uo o Virginia i se auala na suia ai olaga. Sa amata ona la valaaulia o ia latou te o atu i gaoioiga a le Ekalesia. Sa la valaauliaina foi le aiga o Virginia e faia ni gaoioiga ma lo latou aiga. E lei umi ae amata ona feiloai le aiga o Virginia ma faifeautalai. O le tausaga mulimuli ane, na papatisoina ai Virginia ma lona uso laitiit.

O lea la ua avea o ia ma se tagata o le Ekalesia, ua vaavaai foi Virginia mo ni auala e auauna atu ai i tagata o siomia o ia. E manao lava e faasoa atu le talalelei i isi. O nisi taimi e taufaalilili ai ana uo i le aoga ia te ia ona o ona talitonuga fou, o lea na tatalo ai ia iloa po o ai e tatau ona talanoa atu ai. I se tasi aso na uunaia ai o ia e le Agaga e

talanoa atu i se teineitiiti sa ia iloaina. "Sa ou tuuina atu ia te ia se Tusi a Mamona ma valaaulia o ia e sau ma te o i le lotu. Sa sau o ia! Ma o le taimi nei o loo ia faitauina le Tusi a Mamona."

E vaavaai Samuele D., 14, mo ni avanoa e faamalolosia ai tagata o lana korama: "Ou te taumafai e fesoasoani i isi tama o la'u korama e ala i le uunaia o i latou i le vasega. O nisi taimi latou te lagona ai le matamumuli po o le popole e auai." Fai mai Samuele o le fesoasoani atu i isi ia lagonaina le to'a o se tasi lea o auala e mafai ona ia auauna atu ai i le Atua ma saunia ai mo tiutetauave i le lumanai.

AMATA NEI LOA

Ia, o le a la *lau* mea a fai? Fai mai Alessio I., "Ou te le tau faatali seia ou matua e faia ai se eseesega. E tatau ona ou faia i le taimi nei."


O nei laasaga o le a fesoasoani foi ia te oe, pe a oo ina e iloa o oe o se vaega taua o le galuega a le Alii. Ia fai ia tasi se laa i le taimi. O le a e faia se eseesega taua a o e aoao e tuu atu atoa lou tagata i le galuega a le Alii. ■
E alala le tusitala i Iuta, ISA.



AUAUNA ATU I LE ATUA MA LOU

MANATU


ATOA



AUAUNA ATU I LE ATUA MA LOU

LOTO

ATOA



AUAUNA ATU I LE ATUA MA LOU

MALOSI

ATOA



AUAUNA ATU I LE ATUA MA LOU

MAFAUFUAU

ATOA



AUAUNA ATU MA LOU MANATU ATOA

"O le malosiaga e mafaufau ai o se meaalofa mai le Atua.... O le ala tatou te mafaufau ai e aafia tele ai o tatou uiga faaalia ma amioga, faapea foi ma lo tatou tulaga pe a mavae lenei olaga" (Tiala i Tusitusiga paia, "Manatu," scriptures.lds.org). O o tatou mafaufau e fesoasoani tatou te aoao ai ma suia ai mo le lelei sili atu—pe afai tatou te saili atu i mea lelei uma. O nisi nei o manatu mo auaunaga i le Atua ma lou manatu atoa:

- Suesue i tusitusiga paia ma upu a perofeta.
- Mafaufau i mafaufauga lelei e uiga i le isi ma oe lava ia.
- Saili le malamalama, ae maise lava o mea e faagaeetia ai.
- Filifili faafiafiaga lelei ma faagaeetia.
- Suesue i se mea e taua ia te oe—mo se faataitaiga, o se mea na tupu i le talafaasolopito o le Ekalesia po o se tuua.
- Taulai atu ou manatu i le Faaola i le taimi o le faamanatuga.
- Tusi se api o talaaga ma toe faitau i ai mai lea taimi i lea taimi.

AUAUNA ATU MA LOU LOTO ATOA

O le loto e tausia le ola. O le "Loto" e masani ona faauigaina o le ogatotonu po o le ute o se mea, ma o le nofoaga lea e nonofo ai manaoga ma lagona. O le auauna atu i le Atua ma o tatou loto atoa, o le tuu atu uma lea ia te la o tatou manaoga, finagalo, ma le alofa. Ua la fetalai mai ia i tatou ia alofa atu ia te la e ala i le tausia o Ana poloaiga ma alofa atu i isi. O nisi nei o manatu mo le faia o lenei mea:

- la tuu le faamuamua i le tatalo, suesue i tusitusiga paia, ma le auai i le Lotu nai lo o mea e te manao lava oe i ai.
- Faaali atu le agaalofa ma le agalelei i se tasi i lou aiga po o le aoga.
- Faaalu se taimi e fai ai se mea o loo manao se isi tagata e fai.
- Taumafai ia malamalama i lagona o se isi tagata.
- Tuu atu se faamālo faamaoni i se tasi.
- Talanoa po o le saofai i autafa o se tagata o nofo toatas.

AUAUNA ATU MA LOU MALOSI ATOA

O le malosiaga lea tatou te auauna atu ai i le Atua, o se vaega o le tuuina atu ia te la o lo tatou malosi atoa. O le malosi foi o le mana faaleagaga, tautinoga i le loto, maufetuuna'i, ma le filiga i le faia o mea lelei. E mafai ona tatou faaali atu lo tatou malosi a o tatou ola i mataupu faavae na soifua ai le Faaola lava la. Ona mafai lea ona tatou maua le mana paia faaleagaga. O nisi nei o manatu mo auaunaga ma lou malosi atoa:

- Tuu atu atoa lou tuuto i au suesuega o tusitusiga paia.
- Galulue ma le lotogatasi ma i latou o loo i lau uarota po o le paranesi.
- Tu malosi mo tulaga faatonuina o amioga mama.
- Faatino uunaiga mai le Agaga Paia e faamanuia ai isi.
- Tautino e ola amiotonu ma tumau i lau tautinoga pe a tulai mai faaososoga.
- Tausia o lou tino e ala i taumafa tatau ma faamalositino.
- Tausi au feagaiga ina ia maua ai le mana faaleagaga faateleina.

AUAUNA ATU MA LOU MAFAUFAU ATOA

O le auauna atu ma o tatou mafaufau e mafai ona faauigaina, o le faia o mea e mafai ona tatou faia, i le faaleagaga ma faaletino, ma e taulai atu i isi tagata [nai lo o i tatou]. Po o a lava a tatou taleni taitoatas (mai le siina o se nofoa mamafa i le tumau o lagona lelei i taimi faigata), e mafai ona tatou faaaogaina e faamalolosia ai isi. O nisi nei o manatu mo auaunaga ma lou mafaufau atoa:

- Fesili ifo ia te oe lava, "O ai o manaomia la'u fesoasoani i le asō?"—ona fai lea o se fuafuaga i ai.
- Fai se galuega mo se tasi, e pei o le saluina o le pito i luma o le fale, faamamaina o se potu, po o le fululu o ipu.
- Faaaoga au taleni: faaleleia se taavale po o se komepiuta, faamatagofie se potu, fatu se meaalofa e fai i le fale, tusi se solo.
- Fai se mea e ese mai i au aga masani e avea ai o se uo ma se faataitaiga lelei.
- Aoao se tasi i se tomai ua e aoaoina.

O ATU

"O lea, outou e o e e o atu i le galuega a le Atua, vaai ia outou auauna atu ia te ia ma o outou loto atoa,
ia mafai ona outou tutu mafaufau atoa, manatu atoa, ma le malosi atoa, ina
ma le lē pona i luma o le Atua i le aso gataaga."

(MF&F 4:2)



AISEA E. Taua ai Iesu Keriso I LO'U OLAGA?

*Pe a tatou malamalama i mea
uma e faia e le Faaola mo i tatou,
e avea o la ma tagata aupito sili
ona taua i o tatou olaga.*



Saunia e Michael R. Morris

Mekasini a le Eklesia

Talu ai nei sa ou faitau ai i se tusiga i luga o le initonetia lea sa talanoa mai ai le tagata na tusia e uiga i le auala o loo faia ai e le Faaola se matafaioi taua i lona olaga i aso taitasi. Sa ou fiafia i lona manao e faasoia mai o ona lagona, ae sa ou faanoanoa i le tali atu a se tasi o tagata faitau: “E leai lava ma se taua o Ia i se mea o lo’u olaga—e le’i i ai ma o le a le i ai lava.”

O lena tagata faitau ua matuai sese lava. E i ai se taimi, o le a tatou manaomia uma ai le Faaola. Tatou te faia uma ni mea sese e le mafai ona tatou faaleleia, oo i le oti lea e le mafai ona tatou toe maua mai, ma feagai ma le tiga, sauaga, mala, avega, ma le le fiafia e le mafai ona tatou taulimaina na o i tatou.

O le tala fiafia e faapea e le *tatau* lava ona tatou taulimaina na o i tatou.

“I se taimi o le vaivai tatou te ono tagi atu ai, ‘E leai se tasi na te iloaina pe faapei. E leai se tasi e malamalama i ai.’ Ae ua silafia ma malamalama atoa i ai le Alo o le Atua, aua sa Ia lagonaina ma tauave a tatou avega tai-toatasi,” na saunoa ai Elder David A. Bednar o le Korama a Apostolo e Toasefululu. “Ma ona o Lana taulaga e lē iu ma faavavau (tagai i le Alema 34:14), ua Ia malamalama lelei i ai ma mafai ona faaloaloa mai ia i tatou Lona aao o le alofa mutimutivale.”¹

E taua Iesu ia i tatou ona e auala mai i Lana Togiola, aoaoga, faamoe-moega, filemu, ma faataitaiga, ua Ia fesoasoani mai ai ia i tatou e suia o tatou olaga, feagai ma o tatou tofotofoga, ma agai i luma ma le faatuatua a o tatou malaga e toe foi atu ia te Ia ma Lona Tama.

O Iesu Ua Mafai ai Ona Salamo

O se tasi o mafuaaga e taua tele ai Iesu ia i latou o e e taumafai faamaoni e mulimuli ia te Ia e faapea, o i tatou uma lava e le atoatoa ma manaomia le meaalofa o le salamo na ofoina mai e ala i le Togiola.

Pe a tatou tautevateva ma pauu, e manao Satani ina ia tatou mafaufau e le lava lo tatou lelei tatou te toe tutu a’e ai i luga ma toe foi i le ala sa’o. E manao foi o ia ia galo ia te i tatou o le talalelei o “le talalelei o le *salamo*” (MF&F 13:1; faaopoopo le faamamafa). Ae ua tatou iloa “e moni le alofa tunoa o Keriso, ua maua uma ai le faamagaloina ma le faamamaina o le tagata agasala ua salamo.”²

O loo avanoa mo i tatou taitoatasi le mana o le Togiola a Iesu Keriso, ae e tatau ona tatou filifili ina ia mafai ai ona aoga i o tatou olaga. Vaai



faalemafaufau i le tuuina atu o se mealofo faapitoa i se uo—o se mea o loo matuai manaomia lava e lau uo ma o se mea na e saunia e ala i le ositaulaga patino. Ona vaai faalemafaufau lea i le tali mai o lau uo, “Faafetai, ae ou te le manao moni i lau meaalofa.” O le a sou lagona?

A tatou le valaaulia Iesu e fesoasoani ia i tatou ina ia tatou mama e ala i le salamo, e pei lava ua tatou teenaina Lana meaalofa.





Ua Aoao Mai e Iesu le Upumoni

I se tasi taimi, ina ua mumusu se vaega o tagata e toe savavali faatasi ma Ia, sa fesili Iesu i Aposetolo e Toasefululua, “Pe tou te fia o ese foi?” Sa tali atu Peteru, “Le Alii e, a matou o ea ia te ai? o ia te oe upu o le ola e faavavau” (Ioane 6:67–68).

E mafai ona e maua le “afioga o le ola faavavau” a le Faaola i tuisusiga paia, i aaoaga a perofeta soifua, ma musumusuga a le Agaga Paia. Latou te ofoina atu se faavae mo le “fiafa i lenei olaga ma le ola e faavavau i le lalolagi a sau,”³ ma latou taitai saogalemu i tatou e toe foi atu i lo tatou Tama Faalelagi ma lo tatou Faaola.

O a nisi o upumoni maoae na aoao mai e le Faaola? Sa lisi mai e Peresitene Dieter F. Uchtdorf, Fesoasoani Lua i le Au peresitene Sili, [ni upumoni] se fa i se lauga o le konafesi aoao talu ai nei:

- “Ua tuu mai e lo tatou Tama i Ana fanau le fuafuaga sili o le fiafa.”
- “E auala mai i le Togiola . . . , e mafai ona tatou ola ai e faavavau faatasi ma e pele ia i tatou.”
- “O le a tatou mauaina ni tino mamalu, atoatoa, ma ola pea, ua le toe mafatia i ma’i ma le le atoatoa.”
- “O le a suitulagaina o tatou loi-mata o le faanoanoa i le anoanoai o le fiafa ma le olioli.”⁴

Ua Ofo Mai e Iesu le Faamoemoe

Pe a tatou feagai ma luitau ogaoga, o nisi taimi e faigata ai ona tatou faalagolago i le Alii. Ae o le faalagolago ia te Ia e aumaia ai ia i tatou le faamoemoe tatou te manaomia ina

ia mafai ona feagai ma o tatou luitau.

O le mea lena na tupu i tagata o le auaiga o Gatrell, o loo nonofo i totonu o le uarota a Sister Jean A. Stevens. Na fai mai Sister Stevens, o le fesoasoani muamua o le au peresitene aoao a le Peraimeri, sa pipiimau le aiga i le talalelei ma a latou feagaiga o le malu-malu ina ua maua Tuagane Gatrell i le kanesa. O le faia o lena mea na tuuina atu ai ia te i latou le faamoemoe i folafolaga a le Atua o le a latou toe faatasi pe a mavae lenei olaga.

I aso faigata a o lei maliu lana tane, na fai mai ai Uso Gatrell, “Sa ou iloaina sa leoleoina i matou e le Alii. Afai e te faalagolago i le Alii, e moni lava, e mafai ona e faatoilaloina soo se lui-tau o le olaga.”⁵

O le meaalofa o le Togiola e aumaia ai ia i tatou le faamoemoe o le ola faavavau—o se mea tatou te manaomia pe a tatou puapuagatia i tofotofoga po o le maliu o se tasi e pele.

“Na tuu mai e lo tatou Tama Faalelagi alofa ia i tatou le meaalofa o Lona Alo Pele, o Iesu Keriso, e fai ma o tatou Faaola,” na saunoa mai Peresitene Henry B. Eyring, Fesoasoani Muamua i le Au peresitene Sili. O lena meaalofa maoae ma le faamanuiga o le Togiola a Iesu Keriso ua aumaia ai se tofi mo tagata uma: le folafolaga o le Toetu ma le mauaina o le ola e faavavau mo i latou uma e fananau.”⁶

Ua Ofo Mai e Iesu le Filemu

Afai na e feagai ma se faalavelave faalenatura, fai ma autu o ni faiga faitatalaga faalealofa, aafia i se luitau na suia ai le olaga, i ai se feesese-e-aiga ma se uo, po o le tu atu foi mo le mea sa’o, e te iloa e te manaomia le filemu o le Alii. “E faatoilalo e le

filemu o le Faaola,” Na saunoa ai Elder Neil L. Andersen o le Korama a Aposetolo e Toasefululu, “ia taa-viliga o asiosio o le lalolagi.”⁷

I se konafesi aoao lata mai nei, na faasoa mai ai e Elder Andersen se tala e uiga [i se tamaitai o le] Lora sa tauemuina ma faifaiupu i ai tagata ona o le tu atu mo le faaipoipoga masani [o se alii ma se tamaitai]. Ua ia aoaoina, o le tauemuina o nisi taimi o le tau lea o le “faamaoni i le Atua ma aoaoga a Ana perofeta soifua.”⁸

Ae o le tu atu e le faapea o le tu na o oe. E mafai ona tatou liliu atu i taimi uma i le Alii o le Filemu pe a tatou lagonaina le tuuatoatasi po o le lofi-tuina, faanoanoa po o le popole, fefe po o le le tāua. Tatou te faia lena mea e ala i le:

- Tatalo i le Tama Faalelagi mo le Agaga e faatasi ma i tatou.
- Faitau afioga a le Alii i tusitusiga paia ma e pei ona faaalia mai e perofeta soifua.
- Auai atu i le malumalu.
- Suesueina o le soifuaga o le Faaola i le lotu ma i le seminare.
- Faaaogaina o Lana Togiola e ala i le salamo i a tatou agasala.
- Faasoaa atu a tatou molimau e uiga ia te ia.

A tatou lagonaina le filemu o le Faaola, e le tatau ona atatuavale o tatou loto pe mata’u (tagai i le Ioane 14:26–27).

Na saunoa Peresitene Thomas S. Monson, “Ua na o le Matai lava Na te silafaina le matuitui o o tatou tofotofoga, o tatou tiga, ma o tatou mafatiaga. E na o Ia lava tatou te maua ai le filemu e faavavau i taimi o faigata. Ua na o Ia lava e pa’i mai i o tatou

agaga ua faamanualia i Lana fetalaiga faamafanafana.”⁹

Ua Faia e Iesu le Faataitaiga

I Lana galuega, e lē na ona faasino atu e Iesu o le ala i le fiafia—ae Na te taitaia foi le ala. E ala i Lana Togiola, Na te taitai atu ai i tatou i le alofa. E ala i Ana aoaoga, Na te taitaia atu ai i tatou i upumoni e faavavau. E ala i Lona soifuaga atoatoa, Na te taitaia ai i tatou i le ala o le usiusitai.

Na saunoa Elder Richard G. Scott o le Korama a Aposetolo e Toasefululu, “O le faataitaiga aupito sili lava na savalia le fogaelele o lo tatou Faaola, o Iesu Keriso. Sa faatumulia Lana galuega faaletino i aoaoga, auaunaga, ma le alofa i isi. Na ia faaopoopo mai, “Ua valaaulia i tatou e le Faaola ia mulimuli i Lana faataitaiga atoatoa.”¹⁰

A tatou malamalamo o le Faaola ua mafai ai le salamo ma le toetu,

aoao mai upumoni taua, ofoina mai le faamoemoe ma le filemu, ma faia le faataitaiga atoatoa, e avea o Ia ma totonugalemu o o tatou olaga. Ma i le avea ai o Ia ma a tatou uo, ua tatou maua ai le lototole e lafoa’i ai le mata’u ae agai i luma ma le faatuatua. ■

FAAMATALAGA

1. David A. Bednar, “Tauave ma le Faigofie a Latou Avega,” *Liahona*, Me 2014, 90.
2. D. Todd Christofferson, “O Le Toetu o Iesu Keriso,” *Liahona*, Me 2014, 113.
3. “O Le Keriso Soifua: O Le Molimau a le Au Aposetolo,” *Liahona*, Ape. 2000, 3.
4. Dieter F. Uchtdorf, “I Lotofafetai i Soo Se Tulaga,” *Liahona*, Me 2014, 76.
5. Jean A. Stevens, “Aua le Fefe; Ou te Ia te Oe,” *Liahona*, 2014 Me, 83.
6. Henry B. Eyring, “O Le Tofi o le Faamoemoe e Le Mafaatauina,” *Liahona*, Me 2014, 24.
7. Neil L. Andersen, “O Asiosio Faaleagaga,” *Liahona*, Me 2014, 18.
8. Tagai Neil L. Andersen, “O Asiosio Faaleagaga,” 19–20.
9. Thomas S. Monson, “Ou Te Le Tuua Lava Oe, Ou Te Le Tuulafoai Lava ia te Oe,” *Liahona*, Nov. 2013, 87.
10. Richard G. Scott, “Ua Ou Avatu le Faaa’oa’o ia te Outou,” *Liahona*, Me 2014, 35.

AUAI I LE TALANOAGA

O Mea e Mafaufau Loloto i ai mo le Aso Sa

- Ua faapefea ona faamanuiaina lou olaga ona o le Togiola a Iesu Keriso?
- O a fetalaiga a lesu e te liliu atu i ai mo le faamafanafanaga?
- E mafai ona e mafaufau i se taimi na e lagonaina ai le filemu o le Faaola e ala i le Agaga Paia?

O Mea E Te Ono Faia

- Tusi i lau api talaaga se isi taimi na fesoasoani ai le faataitaiga po o aoaoga a le Faaola ia te oe e filifili le mea sa’o.
- Suesue i le Togiola e sauniuni ai mo le tagofia o le faamanatuga.
- Faasoaa atu ou lagona e uiga ia lesu Keriso i lou aiga, i le lotu, po o luga o faasalalauga faaagafesootai.



Saunia e Elder
Robert D. Hales

O Le Korama
a Aposetolo e
Toasefululu

AUALA E AUSIA AI SINI E FAAVAVAU

O u te fia fautuaina atu ni nai sini aupito sili ona taua i le olaga, o le a e maua ai le olioli a o e faataunuina lau misiona i lenei lalolagi—sini e faavavau o le a fesoasoani e toe foi atu ma le mamalu i lou Tama oi le Lagi. E aofia ai:

1. **Faaipoipo i le malumalu ma atiina ae sootaga faaleaiga e faavavau** e ala i le faapalenii ma le agaga tatalo o le tele o mea o le olaga, e pei o le aiga, galuega, faaauauina o aoaoga, gaoioiga e fiafia i ai, ma faafiafiaga.
2. **Ia ola faamaoni ma usiusitai i lau tapuaiga ma faamaoni i au feagaiga o le papatisoga ma le malumalu**, ia le aunoa ona faatauaina mea lelei o le olaga.
3. **Taoftimau pea i le vaaiaga e faavavau**, ia manatua o mea o le malo e faavavau ma le mea o le lalolagi e faaletino, pe le tumau.
4. **Ia manatua e tuuina atu auaunaga tuuto** i lou olaga

atoa ma ia le aunoa ona **tausia ē le tagolima** o e atonu e manaomia lou **alofa** ma isi **fesoasoaniga**.

O sini nei o le olaga atoa e manaomia le taulai atu i ai ma e umi se taimi e ausia ai. E lē lava le na ona fai o nei sini; ae e tatau ona tatou **faia se fuafuaga** e faataunu ai.

O le po nanei po o taeao **ia mafaufau loloto i mea e te manao e ausia i lou** olaga ae o a foi *au* sini e tatau ona i ai. Faaalu se taimi e **tusi i lalo ma iloilo na mea** i le gasologa o tausaga o lumana. Ona faaalu lea o ni nai itula e te fesili ai ia te oe lava, po o a ni mea e mafai ona e faia e faataunu ai nei sini i le asō, taeao, vайaso a sau, ma i masina o lumana.

E faapefea ona e filifilia ma faamatalaina nei sini taua e faavavau? Ma, e tusa ai foi ma lona taua, e faapefea ona e faia se fuafuaga e ausia ai? Ia manatua: o le taimi o le elemene autu lea—e taua tele—i au fuafuaga. Mai le tulaga o loo e i ai nei, atonu e foliga mai e te matuai le iloa po o le a le umi o se taimi e ausia ai nei mea e faavavau.

E i ai taimi o tagata uma; e moni. Ae e le faapea la o le mavae atu o le taimi o lo tatou alualu foi lea i luma.

“O le olaga lenei o le taimi lea mo tagata e saunia ai e feiloai ma le Atua; ioe, faauta o le aso o le olaga lenei o le aso lea mo tagata e fai ai a latou galuega” (Alema 34:32).

O le mea lilo, o le **filifili lea ma le atamai o na gaoioiga** ia o le a fesoasoani ai ia i tatou ia ausia a tatou sini musuia mai le lagi, ona tatou maua ai lea o le malosiaga o uiga faaalia ma le talitonuga mau-maututu e **lafoai ai mea o le a faalavefau pe taotaomia ai i tatou** mai lo tatou taunuuga e faavavau.

Ou te molimau atu o le a lava lou taimi i le lalolagi e faataunu ai au sauniuniga ma faatino galuega o le misiona o lou olaga—pe afai e te **faaaogaina ma le tatau lou taimi**. Ma e leai se taimi e sili atu ona lelei e faia ai lena mea nai lo le taimi nei, i lou talavou (tagai i le Alema 37:35). ■

Mai se saunoaga na tuuina atu i le Junesite o Polika Laga-Idaho i le aso 11 o Tesema, 2004.





O Le TOTONUGALEMU o LO'U OLAGA

Sa ou iloaina galuega a Keriso mai le Tusi Paia, ae pe na mafai moni ona la asiasi atu i le atu Amerika?

Saunia e Roberto Pacheco Pretel

na ua atoa lo'u 18, na faataga a'u e lo'u tamā ou te papatiso i soo se ekalesia sa ou manao ai. Sa ou manao e auai i se lotu Kerisiano aua sa ou suesueina le Tusi Paia i nisi o aulotu ma talitonu ai ia Iesu Keriso.

I se tasi aso na valaaulia mai ai e se tamaloa o le matou aiga ni tamaitai faifeautalai se toalua i le matou fale. Sa la talanoa mai ma se tautinoga mau-maututu i lo la'ua talitonu i le Tusi a Mamona o se tasi molimau ia Iesu Keriso, ma fai mai sa asiiasi atu o Ia i le konetineta o Amerika.

I le taimi lena, sa faailoa atu i ai i lo'u manatu, atonu na sese i la'ua, ona e le'i i ai se taimi o lo'u olaga na ou suesue ai e uiga i lena mea. Sa maligi loimata o se tasi o tamaitai faifeautalai ma fai mai ia te a'u ma le agalelei, "Tuagane Roberto, o le mea moni e faapea e te le iloa e moni le Tusi a Mamona e le faapea ai ua ma sese. Ou te iloa e alofa Iesu Keriso ia i tatou ma

sa i ai o Ia i lenei konetineta, ma sa Ia aoao mai Lana talalelei e pei ona sa Ia faia i le Nuu Paia."

Sa la taumafai e fesoasoani mai ia te au i le tele o o'u popolega ma masalosaloga i le taimi o lena talanoaga muamua, ma na malilie o le a toe asiiasi mai ia te au i le vaioso na sosoo ai.

O le po lena sa amata ai ona ou susueina itulau o le Tusi a Mamona. A o ou faitauina le itulau autu, sa ou tosina atu i se fasifuaiteau e tasi: "O Iesu o le Keriso, o le Atua e Faavavau, e faaali mai o ia lava i atunuuma." Sa ou faitau foi i le 3 Nifae 11 e uiga i le asiasia a le Faaola i le atu Amerika, ma sa ou lagonaina se fiafia i lo'u loto. O lea na ou faia ai le mea sa ta'u mai e faifeautalai ia te au e fai: Na ou tootuli ma ole atu i lo'u Tama Faalelagi pe moni le tusi.

Ina ua uma le tatalo, sa ou lagonaina se filemu ma se iloatino o lea

lava. Sa i ai se taimi sa ou faapea ai, o loimata o tamaitai faifeautalai na ou ootia ai ma mafua ai ona ou talitonu i la la'ua molimau. O lea sa faaauau ai ona ou faitauina le Tusi a Mamona seia oo ina te'a laitiiti le 4:00 i le vaveao. O taimi uma lava sa ou tatalo ai, sa ou lagonaina ma se malosi faateleina le faamautinoaga na afio mai Keriso i le atu Amerika, ma ua finagalo o Ia ia ou aoao atili e uiga i Lana talalelei moni.

I ni nai vaioso, sa ou faaumaina ai le faitauina o le Tusi a Mamona ma lagonaina le tatau ona ou papatiso i totonu o le Ekalesia moni.

O le faitauina o le Tusi a Mamona na fesoasoani ou te latalata atili atu ai ia Iesu Keriso ma faia o Ia ma totonugalemu o lo'u olaga. Ou te matua faafetai lava ona o le tuu e le Faaola o faifeautalai ma Lana Ekalesia i totonu o lo'u ala. ■

E alala le tusitala i Arequipa, Peru.

TUUSAO I LE MATAUPU



Sa masani ona ou **faia ni uiga faalealofa, ae ua ou suia, nei ma ou manao e faasoa atu le talalelei.** E mafai faapefea ona ou faatoilaloina tulaga ta'uleagaina?

Ole mea muamua lava, aua le faatagaina le fefe e taofia oe. Afai ua pa'i atu le Agaga ia te oe ma o loo taumafai e salamo ma suia, o se mea manaia tele lena. Ia manatua, o lenei suiga e mafua mai i le mana gafatia o le alofa tunoa o Iesu Keriso. Faatasi ai ma Lana fesoasoani, e mafai ai ona avea oe ma se tagata fou ma amata ai ona suia lou tulaga. O le a fesoasoani atu foi o Ia ia te oe e faasoa atu le talalelei. E ui o le suia o lou tulaga o le a umi se taimi e alu ai, ae o le a aoga. O ni nai mea nei e mafai ona e faia i lena faagasologa:

- Faatoese i tagata e te iloa ua e faatiga i ai.
- Fai ni mea sa le masani ona e faia e faaali atu ai le agalelei i tagata e le mafai ona e faaali atu i ai lou alofa i le taimi muamua.
- Ia e amiosa'o ma faamaoni i taimi uma.
- Afai o tagata o loo outou faifaimea faatasi e agaleaga i isi, a le o le fai atu i ai e tuu ia po o le aua foi le toe faifaimea faatasi ma i latou. A le o lena, o le a tutusa pau ai lava oe ma i latou.
- Mafaufau e suesue le Moronae 7 ma tatalo mo le alofa mama. ■

Na fetalai le Faaola o le agaga o finauga e mai le tiapolo (tagai i le 3 Nifae 11:29). O le a le eseeseiga i le va o le le ioe ma le fefinaua'i?

Ole mea masani mo tagata le eseese o o latou manatu, ma e i ai taimi e manaomia ai e soo o Iesu Keriso ona tutu atu e tetee i le itu agai mo mea tatou te talitonu i ai. Ae e manaomia

ona tatou faailoa atu lo tatou tulaga i se auala lelei ma sao e aunoa ma le ita, tiga, po o le le mafaufau. E faapefea la ona tatou aloese mai feeseseaiga faafinai? Atonu ua outou faalogo

e mafai ona tatou "le ioe e aunoa ma le fefinaua'i." O le aloese mai finauga e amata i ou faamoemoega ma manaoga. Fai mai le mau e "na o le faamaualuga lava e tupu ai le misa" (Faataoto 13:10). Afai e sili atu lou popole i le "manumalo i se feupuaiga" po o "i [lou] sa'o," e toetoe lava a mautinoa le sosoo atu ai ma le agaga o finauga.

Na aoao mai e Elder Russell M. Nelson o le Korama a Apostolo e

Toasefululua, nisi o auala e aloese ai ma finauga: (1) "faaali atu le popole alofa mo isi"; (2) "taofiofi le manao e tautala atu pe tusitusi faafinai mo lou lava viiga po o le mamalu"; ma le (3) "i le usitai lotomaualalo, ia [alofa] moni i le Atua."¹ Ona mafai lea ona i ai le Agaga o le Alii ma i tatou, ae le o le agaga o finauga. ■

FAAMATALAGA

1. Russell M. Nelson, "The Canker of Contentions," *Ensign*, Me 1989, 70-71.

TUUINA ATU O LE Meaalofa Sili Ona Lelei

Sa ou tuuina atu i la'u uo le meaalofa aso fanau sili ona lelei na ia mauaina.

Saunia e Mariela Rodriguez

Ina ua 13 o'u tausaga, sa saunoa mai le perofeta i tagata o le Ekalesia e faitau le Tusi a Mamona i totonus o le lima masina i le faaiuga o le tausaga lena, ma folafola mai ni faamanuiaga mo le faia o lena mea. I se tasi aso a'o faitau la'u tusi i luga o le pasi, sa saofai mai se teineitiiti e igoa ia Cynthia i o'u talaane ma fesili mai po o le a lena tusi. Sa ou fai atu o le Tusi a Mamona ma o se tusi faapitoa. Sa ou fai atu i ai sa ou manao ia uma ona faitau a o le'i uma le tausaga ina ia mafai ona ou maua faamanuiaga.

Sa amata ona ia faia mai nisi fesili, ma sa ou fai atu i ai, e mafai ona sau i lo'u fale ina ia mafai ona ma talanoa atili e uiga i ai. Sa ia taliaina la'u valaaulia, ma sa ma faaluina le tele o ni itula i aso na sosoo ai e talanoa e uiga

i le Tusi a Mamona ma le Ekalesia.

O le Aso Gafua na sosoo ai, sa ou valaauliaina ai o ia i le afiafi faaleaiga, lea sa ou faailoa atu ai o ia i faifeatalai. Sa amata ona la aoaoina o ia i lesona, ma sa amata ona sau i le lotu ma i gaoioiga uma a le autalavou ma isi sauniga a le Ekalesia.

Sa tonu ia te ia ua manao e papatiso, ma faatasi ai ma le faatagaga a ona matua, sa faapea ona papatisoina ai o ia i lona aso fanau i le tausaga lena. Sa fai mai o ia, o le meaalofa sili lea na ia mauaina. Sa auai lona tina ma nai ou tei i le papatisoga. Sa fai mai o ia ou te usuina le pese "O Le Agaga o le Atua" (*Viiga*, nu. 2), ma sa ia talosagaina lo'u tama e faia le papatisoga. Ina ua sau o ia mai le vai, sa ma feopoa'i ma fetagisi. O le a ou

le faagaloina lava lena aso, aua sa ou lagonaina ai se fiafia tulaga ese.

O se tausaga mulimuli ane, na siitia ese ai lo'u aiga. Sa faigata ona sa mamae le ma faigau ma Cynthia ma ni uso i le talalelei.

E ui lava ma te le o toe nonofo felata'i i le tasi ma le isi, ae o loo ma uo lelei pea. E ma te talanoa soo i le telefonu, ma talu ai nei sa ia valaaui mai ai e ta'u mai na faalogo-lona tina i lesona a faifeatalai. O lenei mea sa ou fiafia ai lava, ona o le taimi muamua sa le fia faalogo lona tina i lesona. Fai mai Cynthia e i ai se aso e faamoemoe e o atu ai i le lotu ma lona aiga atoa. Sa ia faafetai mai ia te au mo le faailoaina atu o ia i le Ekalesia. ■

E alala le tusitala i Texas, ISA.



Fesoasoani Mai ia i Matou!

O aso uma, e faaali atu ai e tamaiti i le lalolagi atoa latou te alo-lofa e ala i le sailia o auala e fesoasoani ai i isi!



O PESE FIAFIA

I la matou aso faapitoa o le auauna atu, sa matou asiisi atu ai i se nofoaga autu e fesoasoani i tagata ua le mafai ona tausia i latou lava. Ina ua amata ona matou usuina pese o le Peraimeri ma isi pese, sa amata ona pati ma pepese faatasi mai ai ma tagata. O nisi o i latou sa sisiva foi! Sa matou tuua ai ni feopoaiiga ma ni kata sa matou faia mo i latou.

Itu o Leiria, Potukale

O KUKI MA PAPETI

O le matou aiga e i ai se "vaitaimi o auaunaga." Sa matou faia ma o'u uso ni papeti mo tamaiti i se nofoaga o tamaiti matuaoti. Sa matou aveina atu foi ni kuki sukalati i nisi o alii tineimu ma faamama le vaituloto. Ou te fiafia ona o le mafai ona matou auauna atu!

Tobin P., 9 tausaga, Idaho, ISA



SILI ATU NAI LO LE KERISIMASI

Sa le lavavā lo'u tina ma lo'u tamā mai se aso umi. Sa ou fufuluina ipu ma teu, ma faamama le fola, laulau, ma le fata. Ona ou faamamaina lea o le potu malolo ma le potu taalo. Ina ua feala a'e lo'u tina ma lo'u tama, sa la'ua fai mai sa sili atu nai lo le Kerisimasi!

Cambrie G., 11 tausaga, Georgia, ISA

Sa ou saluina
le faapaologa
[o le fale] o
Tinamatua.
Ana

Sa ou aoina
ni meaai mo le
fale teumeaai.
Peni

AUINA MAI IA I MATOU LE ATA LOLOMI O LOU LIMA

E toafia ni lima fesoasoani e manaomia
ona o atu ai i le lalolagi atoa? Fai se galu-
ega lelei ma fesoasoani ia tatou iloa ai!

1. Tosi le ata o lou lima i luga o se
fasi pepa ona oti ese lea.
2. Tusi e uiga i se galuega auauna
atu sa e faia mo se tasi—po o se
galuega auauna atu na faia e se
tasi mo oe. E mafai ona tusi ai se
mea telē pe laitiiti.
3. Tuu i ai ma sou ata.
4. Fai atu i ou matua po o se
tagata matua e fesoasoani ia
te oe e auina mai lau tusiga i le
liahona@ldschurch.org po o le
tuatusi i le itulau e 3.

O le a matou aoina lima fesoasoani e
amata atu nei seja oo ia Oketopa 2015.

GALUEGA FAATINO O LE PUSA TOTINI

*E matuai maalilili lava i le taumalulu
ia tagata e leai ni fale! Sa matou fili-
fili e ao mai ni totini mafanafana mo
tagata i le matou eria e leai ni fale.
Sa fesoasoani mai alii ma tamaitai
talavou, ma e lei umi ae tumu saisai
le matou pusa totini i le fiaselau o
totini mo tagata e leai ni fale!*


Alberta, Kanata



Lu'i o le [Faitauina] o Mau **O LE FEAGAIGA FOU**

Na faamatala e Iesu se tala e uiga i se leoleo mamoe na alofa i ana mamoe ma le sueina o le tasi na leiloa. O le tausaga lenei e mafai ona e aoao atili ai e uiga i aoaoga a Iesu i le Feagaiga Fou. O taimi taitasi e te faitauina ai se tasi o mau o loo i le itulau e 68, ona valivali lea o le numera e sosoo ai. Afai e te faitau i vaiaso uma lava, o le a e faamaeaina i le faaiuga o le tausaga!

Fai atu i se tagata matua e fesoasoani ia te oe e aveese le siata lenei pe lolomi le siata mai le liahona.lds.org. ■





Fautuaga i le faitauina faalevaiaso mo le lu'i o le faitauina o mau o le Feagaiga Fou (tagai i itulau e 66–67).

VAIASO	FAITAUGA	
1	Na Sauni e Ioane le Papatiso le Ala mo Iesu Keriso Mataio 3:1–6; Luka 1:5–25, 57–80	26 O Le Toetu o Iesu Keriso Mataio 27:52–53; 28: 1–20; Luka 24; Ioane 20; Galuega 1:3, 9–11; 1 Korinto 15:5–6, 22
2	O Le Soifua Mai o Iesu Keriso Mataio 1:18–25; Luka 1:26–38; 2:1–20	27 Fafaga Au Mamoe Mareko 16:15; Ioane 21:1–17
3	O Le Soifuaga Tamaitiiti o Iesu Keriso Mataio 2; Luka 2:21–52	28 O Le Aso o le Penetekoso Ioane 14:25–27; Galuega 2:1–24, 32–33, 36–47
4	O Le Papatisoga o Iesu Keriso Mataio 3:13–17; Ioane 3:5	29 Peteru le Apostolo Mataio 4:18–19; 14:22–33; 16:13–17; 17:1–9; Luka 22:31–34, 54–62; Galuega 3:1–9, 19–21; 4:6–20; 5:12–42
5	Na Faaosoosoina Iesu Keriso e Satani Mataio 4:1–11; Mareko 1:12–13; Luka 4:1–13	30 Panapa, Anania ma Safaira; Setefano, le na Oti Faamaturo Galuega 4:32–5:10; 6; 7:54–60
6	Ua Faamama e Iesu Keriso le Malumalu Mataio 21:12–14; Luka 19:45–48; Ioane 2:13–16	31 Peteru ma Konelio Galuega 10:1–11:18
7	Ua Tofia e Iesu Keriso Ana Apostolo Mataio 4:18–22; 16:13–19; Mareko 3:13–19; 16:15; Luka 5:1–11; 6:12–16	32 O le Liua o Saulo Galuega 7:57–60; 8:1–3; 9:1–30; 26: 9–23
8	O Le Lauga i luga o le Mauga Mataio 5:1–6:4; 7:12; Luka 6:17–36	33 O Le Misiona Muamua a Paulo Galuega 13:4–11, 14–43; 14:5–10
9	Ua Aoao Mai Iesu Keriso e uiga i le Tatalo Mataio 6:5–13; 7:7–11; 26:36–46; Luka 9:28–29; 11:2–4, 9–13; Iakopo 1:5–6	34 O Le Misiona Lona Lua a Paulo Galuega 15:36–41; 16:16–34
10	Ua Faamalolo e Iesu Keriso Ē Mama'i Mataio 8:5–10, 13; 25:34–40; Mareko 1:40–45; Luka 4:38–40; 7:11–17; Ioane 4:46–54; 13:34–35	35 O Le Misiona Lona Tolu o Paulo Galuega 18:23; 19:1–7, 11–12, 20
11	Iesu Keriso ma le Aso Sapati Mataio 12:1–13; Mareko 2:23–28; 3:1–6; Luka 13:11–17; 14:1–6; Ioane 5:2–16	36 O Le A Toe Afio Mai Iesu Keriso Galuega 1:9–11; Iosefa Samita—Mataio 1:1–4, 21–55
12	Na Faaaoga e Iesu Keriso Lona Mana o le Perisitua e Faamanua ai Isi Mataio 14:23–33; Mareko 4:35–41; 6:33–44; Luka 9:37–43; Galuega 10:38	30 Tusi a Paulo i Roma Roma 1:16; 8:13–18, 31–39; 12:3–21
13	Na Faia e Iesu Keriso Vavega Mareko 2:1–12; 5:21–43	341 O Le Tusi Muamua a Paulo i Korinito 1 Korinito 6:19–20; 12:4–27; 13; 15:20–22, 40–42
14	O le Lulu Saito ma Saito ma Titania Mataio 13:1–9, 18–30, 37–43; Mareko 4:14–20; Luka 8:11–15	115 O Le Tusi Lona Lua a Paulo i Korinito 2 Korinito 4:5–18; 9:6–8; 12:6–10
15	O Le Mamoe na Leiloa, o le Tupe na Leiloa, ma le Atalii Faamaumau Oa Mataio 18:12–14; Luka 15	40 Tusi a Paulo i Kalatia Kalatia 2:16–21; 5:22–23; 6:7–10
16	O Le Samaria Agalelei ma le Fale e Fausia i luga o le Papa Mataio 7:24–27; 22:34–40; Luka 6:47–49; 10:25–37	41 Tusi a Paulo i Efeso Efeso 1:3–12; 4:11–16; 6:10–18
17	Ua Faamalolo e Iesu Keriso Lepela e 10 ma se Tagata Tauaso Luka 17:12–19; Ioane 9	42 Tusi a Paulo i Filipi Filipi 1:2–11; 2:12–13; 4:4–13
18	O Le Leoleo Mamoe Lelei Mataio 19:13–15; Mareko 10:13–16; Ioane 10:1–18	45 Tusi a Paulo i Kolose Kolose 1:9–20; 3:1–16
19	O le Auaua Lē Alofa Mataio 6:12, 14–15; 18:21–35	44 Tusi a Paulo i Tesalonia 1 Tesalonia 2:1–12; 4:1–7; 2 Tesalonia 2:1–4; 3:10–13
20	O Taoupou e Toasefulu, o Talenii, ma le Tupe Itiiti a le Fafine ua Oti Lana Tane Mataio 25: 1–13, 14–46; Mareko 12:41–44; Luka 21:1–4	45 Tusi a Paulo ia Timoteo 1 Timoteo 1:12–17; 5:1–3; 2 Timoteo 3:1–5, 14–17
21	Ua Faatu Mai e Iesu Keriso Lasalo mai le Oti Ioane 11:1–46	46 Tusi a Paulo ia Tito ma Filemoni Tito 1:1–4; 2; Filemoni 1:3–9
22	O Le Ulufale Manumalo o Iesu Keriso ma le Talisuaga Mulimuli Mataio 21:1–11; Mareko 14:12–26; Luka 19:29–38; 22:15–20	5 Tusi a Paulo i Eperu Eperu 1:1–6; 5:1–4; 11:1–11; 12:1–2
23	Iesu Keriso i Ketesemane Mataio 26:36–46; Luka 22:40–46; Ioane 3:16; 15:12–13	53 Aoaoga a Iakopo Iakopo 1:5–6; 2:17–18; 3:2–13; 5:12
24	Ua Faalataina, Molia, ma Faamasinoina Iesu Keriso Mataio 26:14–16, 47–27: 31; Luka 22:47–23:25	49 Aoaoga a Peteru 1 Peteru 1:3–11; 3:18–20; 4:6; 2 Peteru 1:2–8
25	O Le Faasatauroga ma le Tanumia o Iesu Keriso Mataio 27:32–66; Luka 23:26–56; Ioane 10:17–8; 15:13; 19:13–42	50 Aoaoga a Ioane ma luta 1 Ioane 2:1–6; 3:10–18, 23; 4:7–10; 5:1–3; 2 Ioane 1:4; 3 Ioane 1:4; luta 1:20–22
		51 O Le Faaaliga a Ioane Faaaliga 1:1–3; 2:7; 4; 12:7–9; 20:12
		52 O Mai ia Iesu Keriso—o la o le Malamalamā ma le Ola o le Lalolagi Mataio 11:28–30; Ioane 4:3–14; 6:35–51; 8:12; 14:6, 15

Faia o se Mea Lelei i Lo'u Taimi

Clayton W., 10 tausaga, Misuri, ISA

O nisi taimi e matuai malulu ma kiona ai le mea o loo matou nonofo ai. O nisi taimi foi matou te nonofo ai i le fale mai le aoga ma tietie i a matou taavale faase'e i lalo o se mauga telē e i autafa o le matou fale. I se tasi aso, a o matou sauni e faamaulu o matou suti mo le kiona, pulou, ma totinilima, sa fai mai lo'u tina ua fai si

malulu tele ma savili mo le ō i fafo. Sa ou lagona le māitaita ona sa tatau ona matou nonofo i totonu. Sa amata ona ou faitio, ma sa fai mai lo'u tina, "E tatau ona e alu i luga i lou potu e su'e ai se mea lelei e faaaoga ai lou taimi."

Ina ua ou taunuū i lo'u potu, sa ou mafaufau pe o le a se mea o le a finagalo le Faaola ou te faia. Sa tonu o le a ou taulotoina Mataupu Faavae o le Faatuatua. Ina ua ou sau i le fogafale i lalo ina ua mavae ni nai itula, sa ou ta'u atu i lo'u tina, lo'u uso ma tuafafine ua ou salamo ona o lo'u maitaita ma ua ou taulotoina uma Mataupu Faavae o le Faatuatua.

Sa matuai tete'i lava! Sa ou taulotoina taitasi atu lea mo i latou ma sa ou lagona le fiafia ona sa ou faaaogaina lelei lo'u taimi.

Ou te manatu sa fiafia le Faaola ona sa ou filifili e aoao atili e uiga ia te Ia i le taimi faaopoopo na ou maua i lena taeao. Ou te faafetai i Lona tuuina mai ia te au o se aiga ma tusitusiga paia e fesoasoani tatou te aoao atili ai e uiga i lo tatou Tama Faalelagi ma Lona Alo, o Iesu Keriso. ■



O LA TATOU ITULAU




O lo'u tamā o le epikopo o la matou uarota, ma sa ia faia lo'u faatalanoaga a o lei ona papatisoina a'u. Sa ou fiafia lava. Sa ou filifili e valaaulia lau uo sili ona lelei mai le aoga ma lona aiga i le papatisoga. Sa latou o mai! O le a le galoo lava ia te au lena aso faapitoa.

Efrain W., 8 tausaga, Sepania



Ua ou iloa tatala le uepisaite o talafaasolopito o aiga ma su'e se igoa o se tuaa. Ou te siakia pe manaomia e lena tuaa galuega o le malumalu. O la'u vaega lenei i le faia o le galuega a le Alii.

Stephen S., 6 tausaga, Filipaina



Laura D., 8 tausaga, Pasila





Saunia e Peresitene
Boyd K. Packer

Peresitene o le
Korama a Aposetolo
e Toasefululua

*O uso o le Korama a
Aposetolo e Toasefululua
o ni molimau
faapitoa
a Iesu Keriso.*

E mafai faapefea ona fesoasoani **TUSITUSIGA PAIA** ia te a'u?



O TUSITUSIGA PAIA . . .

- E aoao mai ia i tatou po o fea e o i ai ae o a foi mea e fai.
- E aumaia ia i tatou le faamoemoe ma le malamalamā.
- E fesoasoani tatou te maua ai se molimau ia Iesu Keriso.
- E tuuina mai le puipuiga faaleagaga ia i tatou.

Ia fai le faitauina o tusitusiga paia ma se vaega o lau fuafuaga masani, ma o le a mulimuli mai ai faamanuiaga.

Afai e te aoao mai tusitusiga paia a o e laitiiti, o le a oo ina e iloa le ala e tatau ona e savali ai. ■

Mai le "O Le Ki i le Puipuiga Faaleagaga," Liahona, Nov. 2013, 26–28.

O Le Auupega



Saunia e Jessica Larsen

E faavae i se tala moni

"O loo i ai se mea e mafai ona avatu e tagata uma" (Tusipese a Tamaiti, 116).

Ae leai Ivy! O ia o se *teine*," o le Amusumusu mai lea a Braden i tua atu o Atamu.

Ae o Atamu o le kapeteni o le aso mo le au togitogigā i'a, ma ua uma ona fai lana filifiliga. "Ou te filifilia Ivy, na ia toe fai leotole teisi a'e ai. Sa ataata aamu Taila, o le kapeteni a le isi au. E oo lava foi ia Faiaoga Garcia na foliga faateia i le filifiliga lona lua a Atamu.

Sa vaaia foi le te'i o Ivy ona laa atu lea i luma ma le matamuli. Na mapuea le fafia Braden.

O Ivy sa le pei o isi teineiti. O ia o le teineitiiti sa sili ona tino laitiiti i le vasega. Sa le'i foliga mai na saoasaoa tele, ae o le polo sa foliga na telē atu foi nai lo o ia. "Atonu foi e le mafai ona ia siia i luga le polo," na fai mai ai Braden a'o savali atu i ai Ivy.

"Atonu o le a avea o ia ma a tatou auupega lilo," o le tala lea a Atamu, ma taumafai ia foliga mautinoa. Ae e le o le mafuaaga lena sa ia filifilia ai o ia. Sa i ai se taimi na fai atu ai Ivy ia Atamu e le fafia pe a fai a latou taaloga ona e mulimuli lava filifili o ia. Sa ula isi tama ia Ivy, ae na ta'u atu e Tina ma Tama ia Atamu e tatau i tama ona faaali atu

le faaaloalo i teine. O lea sa ia filifilia ai Ivy. A o ia vaai atu i le filifilia e Taila o tama e sili ona tino tetelē i le vasega, sa faamoemoe Atamu na ia faia le filifiliga sa'o.

Ina ua i ai tagata uma i se au, na ili e Faiaoga Garcia le faaili, ma sa taufetuli atu au i tulimanu faafeagai o le malae. Sa tuu atu e Faiaoga Garcia le polo ia Taila, ona siaki lea e Taila le au a Atamu a o le'i taulai atu ia Ivy. Sa tuu i tua lona lima ma togi loa le polo.

Pa! Na tau le polo i le eleele ma fiti e aunoa ma le tau i se tasi. Na le talitonu Atamu i le mea na ia vaaia. Na fetau lelei lava ma le

Lilo

TAMAITI



Sa manatu mama tagata i le mea e mafai ona faia e Ivy.

minoi o Ivy. Sa foliga mai na tete'i uma tagata sa siomia o ia, ae na ona ataata o Atamu. Atonu o le filifilia o Ivy sa o se manatu lelei lea.

Na faaaauau le taaloga. Sa taumafai pea Taila ia lavea Ivy i le polo, ae sa fe'afolai solo ma puna solo o ia. Sa pisi lava Taila ma nisi o lana au i le taumafaiga ia pe Ivy, o lea sa latou le faaaluina ai se taimi tele e tulituli ai se isi tagata. Sa leai se tasi na mafai ona togiina o ia i se polo. Na ataata Atamu—o le tino laitiiti o Ivy na avea ai o ia ma tagata *lelei atu* i le togitogiga i'a aua o lona faatinoiti ma le saoasaoa na fafaigata ai ona lavea o ia.

Mulimuli ane sa manumalo le au a Atamu i le taaloga. "Na sa'o lava le auupega lilo," o le tala lea a Braden. "E lelei mo'i lava Ivy."

"Ioe," o le tala lea a Taila. "O le isi la taimi, e i ai o ia i *la'u* au. E mautinoa lava o le a matou malo!" Sa ataata Ivy a o savali atu o ia i le vasega, a o siomia e tamaiti o lana au.

Sa le mafai ona taofiofi le ataata o Atamu a o mulimuli atu i le vaega. Sa agalelei o ia ia Ivy, ma sa ia fesoasoani i isi tama ia faaaloalo teisi atu i teine. O le auupega lilo maoae sa le avea o se mea lilo—o le agalelei lava. ■

E alala le tusitala i Arisona, ISA.



E LEAI SE TASI O FAAMOE MOE IA TOILALO

"E eseese tagata uma ma e i ai ni sao eseese e faia. E leai se tasi o faamoemoe ia toilalo."

Peresitene Henry B. Eyring, Fesoasoani Muamua i le Au Paereistene Sili, "Fesoasoani la i Latou e Faatutu ni Sini Maualuluga," *Liahona*, Nov. 2012, 60

O se Malaga e Aoao e uiga ia Iesu Keriso



O le tausaga lenei i le Peraimeri o le a outou o ai i se malaga e mulimuli i tulagaaao o Iesu, ma aoao e uiga i Lona soifuaga mai itulau o le Feagaiga Fou. O le a aoao foi e o outou matua ia lava mau e tasi i a latou vasega.

O nisi nei o gaoioiga e fesoasoani ia te oe ma lou aiga e aoao atili e uiga i le Feagaiga Fou. ■

MANATU MO TAUTALAGA FAALEAIGA

Aisea e taua ma manaia ai le suesueina o le Feagaiga Fou? O le a faapefea ona fesoasoani le aoao atili e uiga i le Faafola ia i tatou ia malolosi atili? la mautinoa e tuu atu i tagata taitoatasii se avanoa e faasoa atu ai. A uma lea, e mafai ona outou usuina le pese "The Books of the New Testament" (*Children's Songbook*, 116). E mafai foi ona outou faia ni kata ma tusi igoa o tusi ma tuu i latou i le faasologa sa'o.

PESE MA LE MAU

- "Tau Mai Tala la Iesu" *Tusipese a Tamaiti*, 36
- Mataio 11:29.

MOTUGAAFA MO TUSITUSIGA PAIA

O le faailogaina o au tusitusiga paia e mafai ona fesoasoani ia te oe e sue ai i se taimi mulimuli ane fuaiupu e te fiafia i ai!

E mafai ona e faaaogaina se penitala, se peniutu, po o se penivali.

Vase lalo o fuaiupu o loo tautala ai lesupe na o le li'o o numera o fuaiupu.

E mafai ona oka e ou matua se kopi o le Feagaiga Fou mo oe i le gagana Peretania po o le Sipaniolo mo le \$2.50 i le store.lds.org.

AOAO ATILI

Na o mai iinei Maria ma losefa ina ia faitaulia ai e le malo.

AOAO ATILI

Sa lotoleaga le Tupu o Herota ia lesu, o lea na ave atu ai e losefa ma Maria ia lesu iinei mo le saogalemu.

AOAO ATILI

Mataio 2:23

AOAO ATILI

Ina ua fanau mai lesu, na o mai leoleo mamoe ma le au Makoi iinei e tapuai atu ia te la.

AOAO ATILI

Mataio 2:14

AOAO ATILI

Na ave atu iinei e losefa ma Maria ia lesu a o pepe, ma toe avatu foi ina ua 12 Ona tausaga. Sa nofo ai o la ma aoao atu i alii i le malumalu.

AOAO ATILI

Mataio 2:1–2

AOAO ATILI

Na nofo iinei Maria i le taimi na faaali atu ai le agelu o Kaperielu e ta'u atu ia te ia o le a fanau mai lesu.

AOAO ATILI

O le malumalu na fausia e Herota sa iinei i le aai tele lenei na si'o i se puipui.

AOAO ATILI

0 le atunuu lenei e latatala i Israelu.

AOAO ATILI

A o laitiiti lesu, sa latou nonofo iinei ma Maria ma losefa.

AOAO ATILI

Luka 2:42–49

O MEA NA FEMALIUA'I AI IESU

Ia auauai e filifili se tasi o kata "Aoao Atili". Faitau le mea moni pe su'e ma faitau le mau. Ona faafetaui lea o le kata i se nofoaga i luga o le faafanua.





O le Lisi o le 10 Pito i Luga a Abby

Saunia e
Rosemary M. Wixom

Peresitene Aoao o le Peraimeri


*"O le fuafuaga lenei o le faaoalataga
mo tagata uma" (Mose 6:62).*

I se tasi taimi a o ou asiiasi atu i se vasega o tamaitai talavou, sa fai atu ai le faiaoga i le vasega e tusi atu a latou sini o le 10 aupito maualuluga i le olaga. Ona ia fai atu lea ia i latou e faasoa atu mea na latou tusia. O Abby o lē sa le'i leva ona atoa lona 12 tausaga, sa

nofo i ou tafatafa. O le lisi lenei a Abby:

Sa i ai ia Abby se vaaiga mamao o le fuafuaga a le Tama Faalelagi mo i tatou uma. A taulai atu lou ala i luga o lena sini aupito taua o le toe foi atu i le Tama Faalelagi, o le a e oo i ai! ■

*Mai le "Faaavanoaina o le Taimi
e Talanoa ma Faalogo Ai,"
Liahona, Apr. 2012, 37.*




O LAU LISI O LE 10 PITO I LUGA

Tusi i lalo ni sini se 10 mo *lou* olaga. Ona tuu lea i totolu o lau api o talaaga, i luga o lou puipui, po o soo se mea e mafai ona e vaai soo atu i ai.

O loo Aoao Atu Iesu i le Malumalu

Luka 2:42–47



Faapipii le itulau lenei i se pepa mamafa po o se pepa malo. Ona otí ese lea o faatusa o tagata ma faapipii i i ni fasilaau po o ni taga pepa. Ia teu i se teutusi faatasi ma le mau e tusi i le pito i luma. ■

E mafai ona lolomi mai nisi kopi i le liahona.lds.org.

TATALO i luga

Saunia e Mitzy Jiménez Ramírez

E faavae i se tala moni

Na toeitiiti lava atoa le valu tausaga o Sofia. Sa sauni o ia ina ia papatisoina. E tele ni mea taua sa ia aoaoina. O se tasi o mea sa ia aoaoina o le tatalo. Sa ia iloa e mafai ona ia tatalo atu i le Tama Faalelagi i soo se taimi. Sa ia iloa e mafai ona ia tatalo i soo se nofoaga.

I se tasi aso sa tonu ai

ia Sofía ma lona tina e asiisi atu i lona tamā i le galuega. O se malaga o le a umi. Sa galue lona tamā i se isi nuu. O le a la o atu i se pasi, ona o ai lea i se loli, ona toe o ai lea i se taavale la'upasese.

I le taimi o le malaga i le pasi, sa faapea ona moe ai Sofía. Na ala o ia ina ua ia faalogoina le

tagi a se pepe. Sa tulioso mai i luga o le pasi se tina ma se tamā ma se pepe. Sa ma'i le pepe ma sa tagi leotele. Sa foliga popole matua o le pepe.

Sa faanoanoa alofa Sofia mo le pepe. Sa faanoanoa alofa foi i matua. Ona oso ae lea sona manatu. Sa musumusu atu o ia i



ole PASI

le taliga o Tina. "E mafai ona ou faia se tatalo e ole atu ai i le Tama Faalelagi e faamanuia le pepe?"

"Ae a, na fai atu ai Tina ma ataata.

Na punou Sofía ma faia se tatalo le leoa. Sa tatalo malosi o ia. Sa ia ole atu i le Tama Faalelagi e faamanuia le pepe. Sa ia talosagaina

o Ia e fesoasoani ina ia toe manua le pepe ma ia uma lona tagi.

Na iloa e Sofía e le o taimi uma tatou te maua ai mea tatou te ole atu ai. Sa ia iloa foi, e le o taimi uma e vave maua mai ai tali o a tatou tatalo. Ae i se taimi e le'i umi, ae to'a mai le pepe. Ona uma ai lea o le tagi o le pepe. Sa

foliga mai na faasolo manuia o ia. Sa tau le foliga popole foi ona matua.

Sa lagona e Sofía le mafanafana ma le fiafia o lona loto. Sa fiafia o ia mo le pepe—ma mo matua o le pepe. Sa ia iloa na faafogaina e le Tama Faalelagi lana tatalo. ■

E alala le tusitala i Chihuahua, Mekisiko.





Saunia e
Peresitene
Harold B. Lee
(1899–1973)

E MAFAI FAAPEFEA ONA OU ILOA UA FAAMAGA- LOINA A'U E LE ALII?

E faapefea ona e tali atu i se tasi na sau ia te oe ma fesili mai i lena fesili?

Ini nai tausaga ua mavae sa ma saofafai ai ma Peresitene [Marion G.] Romney [1897–1988] i lo'u ofisa. Sa matala mai le faitotoa ma sau i totonus se alii talavou lelei ma se vaaiga atutuvale i ona foliga, ma fai mai, “Usu e, o taeao o le a ou alu ai i le malumalu mo le taimi muamua lava. Na ou faia ni mea sese i le taimi ua mavae, ma ua uma ona ou alu i lo'u epikopo ma lo'u peresitene o le siteki, ma na ou ta'u mama i ai mea uma; ma ina ua mavae se vaitaimi o le salamo ma le faamautinoaga ou te le'i toe foi atu i na mea sese, ua la'ua fofogaina mai nei ua ou saunia e alu atu i le malumalu. Ae, uso e, ua le lava lea. Ou te fia iloa, ma e faapefea ona ou iloa, ua faamagaloina foi a'u e le Alii.”

O le a sau tali i se tagata o le a sau ia te oe e fesili atu lena fesili? A o ma mafaufau loloto mo sina taimi, sa ma manatua le saunoaga a le Tupu o



Peniamina o loo i le tusi a Mosaea. O se vaega lenei o tagata o e na talosaga mo le papatisoga, ma na latou fai mai na latou vaaia i latou lava i lo latou tulaga faaletino:

“Ma sa latou alalaga uma leotele i le leo e tasi, fai mai: E, ia alofa mutimutivale mai ia, ma faaaoga le toto togiola o Keriso ina ia mafai ai ona matou maua le faamagaloga o a matou agasala, ma mafai ona faamamaina o matou loto. . . .

“. . . Ina ua uma ona latou tautatalaina o nei upu, sa afio ifo i o latou luga le Agaga o le Alii, ma faatumuina i latou i le olioli, ina ua latou mauaina se faamagaloga o a latou agasala, ma ina ua latou maua le filemu” (Mosaea 4:2–3).

Sa i ai iina le tali.

“Afai o le a oo mai le taimi ua maea ai mea uma e te mafai ona e faia e te salamo ai i au agasala, po o ai lava oe, ma po o fea foi o loo e i ai, ma ua uma ona e toe faaleleia ma toe totogi atu i mea uma e tusa ai ma lou iloa; afai o se mea e aafia ai oe i le Ekalesia ma ua uma ona e alu i e o i ai le pule, ona e manao ai lea i se tali e faamaonia ai pe mata ua talia oe e le Alii. I lau sailiga ia te oe lava, afai o loo e saili ma maua lena toafilemu o le mafaufau, ma o le failogia lea e te iloa ai ua talia e le Alii lou salamo. O le a manao Satani ia e mafaufau i le isi itu ma tauanau ai oe i nisi o taimi e faapea, o le faia ai o le mea sese e tasi, atonu o le a e faia ai pea lava pea ma e le toe mafai ona e lafoaia. O se tasi lena o mau aupito sili ona sese. O le vasega o le faamagalo atu o loo avanoa ia i latou uma o e liliu ese mai a latou amioga leaga ma le toe foi atu lava i ai. ■

Mai le “Ia Outou Tutu i Nofoaga Paia,” Ensign, Tulai 1973, 122.

MALAMALAMAAGA



E mafai faapefea ona ou maua le olioli pe a faigata le olaga?

"O le tele lava o le olaga e fuafua i o tatou uiga faaalua. O le auala tatou te filifili e vaai ai i mea ma tali atu ai i isi e tele se ese esega e faia ai. O le faia o le mea sili tatou te mafaia ona filifili lea ia fiafia i o tatou tulaga, e tusa lava po o le a, e mafai ona aumaia ai le filemu ma le faamalieina."

E | Ai Foi i Lenei Lomiga

MO TALAVOU MATUTUA

FEFAUTUAAI FAATASI E LE AUNOA

Faaaoga mataupu faavae nei e ono mo fonotaga faaleaiga faamanuiaina.



MO LE AUTALAVOU



AUTU O LE MUTUALE 2015

Ua tuuina mai e le au peresitene aoao o Tamaitai Talavou ma Alii Talavou ni aoaoga i le Mataupu Faavae ma Feagaiga 4:2.

MO TAMAITI

Lu'i o le [Faitauina] o Mau o le Feagaiga Fou

Faaaoga gaoioiga valivali lenei a o e faitauina fuaiupu nei i le Feagaiga Fou i le tausaga lenei.

